

32



# ELEMENTA

ARITHMETICÆ, ALGEBRÆ,  
ET GEOMETRIÆ

INSTITUTIONIBUS PHYSICIS  
PRÆMITTENDA

AUCTORE

FRANCISCO JACQUIER

EX MINIMORUM FAMILIA

PRIMARIARUM PER EUROPAM ACADEMIARUM SOCIO,  
IN LYCEO ROMANO, ET IN COLLEGIO URBANO  
DE PROPAGANDA FIDE PROFESSORE.



ROMÆ MDCCLXXVII.

APUD MARCUM PALEARINIUM

PRESIDUM FACULTATE.

*Adm. D. Lodovici Ghisli.*



1870-1871

1872-1873

1874-1875

1876-1877

1878-1879

## AUCTOR LECTORI.

**P**hysicam inter Geometricamque doctrinam tam arcta est necessitudo, ut apud omnes cultiores viros tanquam vanissimum merito habeatur Physices studium, Geometriæ præsidio destitutum. Quæ cum ita sint, nemo mirari debet quod a studiosis adolescentibus, sacræ licet Theologiæ destinatis, Arithmeticæ & Geometriæ elementa requiram; si enim his careant doctrinæ Physicæ adjumentis, satius est eos huic præclarissimo studio valedicere omnino: *Melius est nihil scire quam male scire*; tale enim cognitionis, potius dicam ignorantia, genus mentis aciem hebetat rectumque judicium corrumpit, & omni studiorum generi nocet plurimum. At me fortasse reprehendent censores aliqui quod nova elementa ediderim, cum nihil fere in orbe litterario frequentius sit Elementorum libris. Neque talem me esse quis sibi falso persuadeat ut de aliis elementis minus laudabiliter sentiam, huncque meum libellum supra alios omnes extollam, quod tamen a plerisque Elementorum auctoribus nimis arroganter factum video. Et quidem variis Elementis ratione licet & methodo diversissimis suam justam laudem concedendam esse facile quisque fatebitur, si varias attenderit adoles-

\* 2

scen-



## IV

fcentum conditiones atque voluntates. Alii  
 sublimiorem Physicam Mathesimque univer-  
 sam addiscere, & funditus haurire sibi pro-  
 ponunt; alii autem aliis studiis gravioribus-  
 que negotiis nati Institutiones Geometricas  
 strictim leviterque tantum arripiunt quan-  
 tum scilicet expoliendo perficiendoque in-  
 genio satis est. Alii ultra Geometriam,  
 quam *practicam* vocant, nolunt progredi,  
 illaque minus nobili geometriæ parte con-  
 tenti sunt; alii tandem alios fines aliaque  
 consilia in animo habent. Quid ergo mirum  
 quod ego Arithmeticæ & Geometriæ Ele-  
 menta ad meas physicas institutiones accomo-  
 datissima proponam? At quæcumque sit Ele-  
 mentorum ratio, demonstrationis severitas  
 religiose semper tenenda est, neque obscura  
 multarum propositionum farragine juvenum  
 mens est obruenda, sed splendidiori accura-  
 tioris Geometriæ lumine illustranda. Monen-  
 di ergo sunt studiosi adolescentes ut ab iis  
 caute abstineant Elementis, quæ nec satis ac-  
 curata methodo conscripta sunt, nec firmis-  
 simo demonstrationum robore munita. Per-  
 niciosissima quidem sunt studiosæ juventuti  
 talia Elementa quæ eos habent auctores, quo-  
 rum doctrina tota in Elementis continetur.  
 Verum si recto proportionum ordine nexu-  
 que necessario colligatæ fuerint demonstra-  
 tio-

tiones omnes, ex hoc studio diligenter &, ut  
 par est instituto, in quolibet scientiarum gene-  
 re fructum maximum sine ulla dubitatione  
 polliceor. Nec quidquam existimationis Geo-  
 metrico studio detrahi debet, si aliqui exti-  
 terint in rebus Geometricis etiam versatissi-  
 mi, in vulgari tamen agendi ratione & in  
 rebus familiarissimis omnino inepti. Id qui-  
 dem, quod summa injuria objici solet, tri-  
 buendum est præcipiti quorundam Geome-  
 trarum judicio; non desunt, fateor, celeberrimi etiam viri, qui in rebus Mathematicis  
 toti occupati, necessaria rerum tractanda-  
 rum vel gerendarum principia & elementa  
 non satis tenent, atque hinc mirum non est  
 quod aliquando errent graviter, Geometra-  
 rum non Geometriæ vitio. Et requidem ip-  
 sa, si fons erroris probe attendatur, vitium  
 in principio, non vero in *consequentibus* latere  
 prehenditur; contra autem alii homines  
 non pauci, veris utuntur principiis, errant  
 autem in *consequentibus*. Itaque huc mihi maxi-  
 me reducendum videtur Geometrici studii  
 pretium; si nempe duos fingere liceat homi-  
 nes eadem ingenii vi, eodemque cognitio-  
 num gradu præditos, atque *cæteris*, ut vul-  
 go dicunt, *paribus*, unus autem sit Geome-  
 triæ auxilio adjutus, alter autem destitutus,  
 facile mihi persuadeo virum Geometram in  
 quo-

quolibet scribendi genere, in tractanda etiam quæstione theologica multo excellentiorem futurum; neque enim quæ prima sunt, postrema dicet, & vicissim; nec quæ perspicua sunt & illustria, minus accurata methodo obscurabit, aut quæ abstrusa sunt & involuta densiori caligine non obvolvet. Verum ne Geometriæ studio nimis tribuere videar & hanc, quam maxime amo disciplinam, magnificentius prædicare, de iis non loquor melioris ingenii viris in quibus excellens iudicium meditatione & experientia subactum atque perfectum miramur, siue graviora tractanda sint negotia, siue studiis quibuscumque danda sit opera. Has justissimas Geometriæ laudes attigisse satis sit ad excitandam adolescentum voluntatem. Faxit D. O. M. ut hoc meo qualicumque labore utantur, non in rebus physicis tantum, sed etiam ut in studiis gravioribus, quem quidem fructum maxime exopto, ratiocinandi vim accuratiori methodo augeant atque amplificent, hujus tamen sanctissimi dogmatis probe memores: *Captivare intellectum in obsequium fidei.*

*Ceterum Scholia & appendices in his Elementis pratermitti possunt ab iis qui majori pollent intelligendi facilitate; minus enim necessaria sunt hæc additamenta.*



## I N D E X

CAPUT I. De præcipuis utriusque Arithmeticæ operationibus generatim consideratis .	Pag. I
CAPUT II. De quatuor primis arithmeticæ operationibus in numeris integris .	7
PROBL. I. Numeros integros addere , sive in unam summam colligere .	ibid.
PROBL. II. Numeros integros subtrahere .	8
PROBL. III. Numeros integros multiplicare .	9
PROBL. IV. Numeros integros dividere .	11
CAPUT III. De quatuor præcedentibus operationibus in Arithmetica speciosa absolvendis .	18
PROBL. I. Quantitates litterales addere .	ibid.
PROBL. II. Quantitates litterales subtrahere .	20
PROBL. III. Quantitates litterales multiplicare .	21
PROBL. IV. Quantitates litterales dividere .	24
CAPUT IV. De iisdem operationibus in numeris fractis .	27
CAPUT V. De radicum extractione .	38
CAPUT VI. De proportionibus .	51
APPENDIX. De Æquationibus .	61
PROEMIUM. De definitionibus & divisione Geometriæ .	69
SECTIO I. De Geometria linearum .	74
CAPUT I. De lineis rectis quoad mutuam positionem consideratis , nullo tamen spatio seu nulla figura terminatis .	ibid.
CAPUT II. De linearum rectarum respectu circuli positione .	77
CAP. III.	

## VIII

**CAPUT III.** *De lineis rectis quæ spatium claudunt ,  
seu de figurarum rectilinearum pro-  
prietatibus .* 83

**CAPUT IV.** *De linearum ratione seu de proportioni-  
bus .* 90

**APPENDIX.** *De proportionum usu in triangulorum  
resolutione , sive de Trigonometria .* 99

**SECTIO II.** *De Geometria superficierum .* 107

**CAPUT I.** *De præcipuis planarum superficierum  
proprietatibus .* ibid.

**CAPUT II.** *De Superficierum mensura .* 110

**SECTIO III.** *De Geometria Solidorum .* 116

**CAPUT I.** *De Solidorum genesi & proprietatibus .* ib.

**CAPUT II.** *De Solidorum mensura .* 121

**APPENDIX.** *De Lineis curvis .* 129



# **REIMPRIMATUR,**

*Si videbitur Reverendissimo Patri Magistro Sac. Pa-  
latii Apostolici .*

*F. A. Marcucci Episc. Montis-Alti Vicofg.*

# **REIMPRIMATUR,**

*Fr. Th. Aug. Ricchini Ord. Prædicat. Sac. Palatii  
Apost. Magister .*

# ELEMENTA ARITHMETICÆ TUM VULGARIS, TUM SPECIOSÆ.



## CAPUT I.

*De præcipuis utriusque Arithmeticæ operationibus  
generatim consideratis.*

### I



*Arithmetica* generatim definitur *scientia computandi*. Computatio autem vel fit per vulgares numeros, ac proinde & determinatos 1, 2, 3 &c., vel per alphabeti litteras a, b, c &c. quæ numerum quemlibet, aut quantitatem quamlibet designant. Prima computandi ratio *Arithmetica* simpliciter dicitur; altera autem vocatur *Arithmetica speciosa*, vel *Algebra*; convenientius a Newtono *Arithmetica universalis* appellatur. Has quidem definitiones juxta vulgarem docendi consuetudinem præmittimus; monendum tamen est scientias quasdam vix clare definiri posse, nisi earundem scientiarum diligens præcedat analysis atque accurata explicatio. Ita in præsentī casu, explicatis *Arithmeticæ* & *Algebræ* operationibus, recte jam dicere liceret: Hæc quam vobis explicavimus scientia, ea est, quæ *Arithmetica* vel *Algebra* vocatur. Per numerum arithmetici intelligunt *imitatum multitudinem*. At accuratius a Newtono definitur numerus, *relatio* seu *ratio* quantitatis cujusvis ad aliam ejusdem generis quantitatem; quæ quidem definitio ut in bono lumine collocetur, observandum

*Arith.* A est

est quantitatem quamlibet cum alia ejusdem generis quantitate comparatam, vel ea minorem esse, vel majorem, vel tandem ipsi æqualem, hoc est, magnitudinem aliquam vel in alia contineri, vel hanc aliam certo modo continere; hic autem modus, quo magnitudo aliqua aliam continet, vel in ea continetur, *numerus* dicitur. E. G. numerus 3 exprimit rationem magnitudinis alicujus ad aliam minorem quæ pro unitate assumitur, & in majori ter continetur. Contra autem si quantitas major 3, pro unitate adhibeatur, erit quantitas 1 tertia pars quantitatis majoris, quæ tanquam unitas consideratur, sive 1 ter in quantitate majori continetur. Inde autem intelligitur quid sit numerus *integer*, quid numerus *fractus*. Integer dicitur quem unitas metitur; fractus qui est pars unitatis; ita 1, 2, 3 &c. sunt numeri integri; sed dimidia, tertia, quarta, &c. pars unitatis sunt numeri fracti, ita autem exprimi solent numeri fracti  $\frac{1}{2}$ ,  $\frac{1}{3}$ ,  $\frac{1}{4}$ ,  $\frac{2}{3}$ ,  $\frac{3}{4}$  &c. Ratio quam modo definivimus, si nempe consideretur, quomodo quantitas una alteram contineat, dicitur *geometrica*. Vocatur autem *arithmetica*, si excessum tantummodo quantitatis unius supra aliam consideremus. Duarum rationum æqualitas *proportio* dicitur vel *geometrica* vel *arithmetica* pro diversa rationum qualitate. Quare ad habendam proportionem quatuor quantitates requiruntur, & prima ad secundam esse dicitur ut tertia ad quartam.

II. Numeri omnes in vulgari arithmetica, decem notis sive characteribus designantur; sunt autem 1, 2, 3, 4, 5, 6, 7, 8, 9, 0 quorum ultimus *cyphra* sive *zero* appellatur. Harum notarum varia est significatio non solum ex diversa illarum figura, sed etiam ex diverso quem occupant loco. Quæ ad sinistram postremæ occurrunt designant unitates, quæ proxime præcedunt unitatum decadas; exinde centenarii sequuntur, millenarii & sic deinceps per decades & centenarios progrediendo. Huic autem usui potissimum

num cyphra destinatur; cum nempe ipsa nullum designet numerum, auget tamen reliquarum notarum significationem, longius illas ab extremo versus sinistram numero removens; sic unitatis nota, quæ sola unicam designaret unitatem, beneficio unius vel duplicis cyphræ in secundum aut tertium locum reiecta, denas unitates aut centenas significabit. Breviores numeri facile leguntur; ita 247, exprimunt ducentas quadraginta septem unitates; at in prolixioribus numeris aliquo opus est artificio, ita si legere

B

A

oporteat numerum S. 3, 234 | 057, 906 | 234, 402. D: illum divide, quantum fieri potest, in classes, quarum singulæ tres notæ contineant, incipiendo a dextra D, & progrediendo versus sinistram S; quamlibet classem divide per virgulam singulis ternis notis interjectam. Deinde post duas primas classes, seu post sextam notam duc superius longiorem lineam verticalem A, quæ sex notas sejungat; & rursus progrediendo versus sinistram S, linea verticali B, dividantur aliæ sex notæ, & ita porro quantum opus est. Manifestum est ex dictis, in prima classe 402, contineri unitates duas, nihil decadam, & centenaria quatuor; quare classis ista legitur quadringenta duo: in 2.<sup>a</sup> classe 234, continentur quatuor unitates, tres decades, & duo centenaria millium, hoc est, ducenta triginta quatuor millia. Quapropter in separatione sex primarum notarum ab A ad D, continentur tantum unitates usque ad centena millia inclusive & tota illa separatio legenda est in hunc modum. A. 234402. D; ducenta triginta quatuor millia quadringenta duo. Tertia classis 906 pertinet ad miliones & legenda est sic: nongenti sex miliones. Nam cum in secundo hujus classis loco reperiatur 0, indicium est nullam esse in hac classe decadem millionum. Quarta classis B. 057, continet septem & quinquaginta millia millionum; cum enim in tertio

A 2

loco

#### 4. ELEMENTA ARITHMETICÆ

loco reperitur 0, nihil est centenariorum millium millionum; & ideo classis ista quarta legitur 057, quinquaginta septem millia millionum, ac totus numerus 57, 906, 234, 402 legetur: quinquaginta septem millia nongenti sex milliones, ducenta triginta quatuor millia, quadringenta duo.

III. Vulgares explicavimus arithmeticæ characteres, quorum auctores feruntur astronomi Arabes; aliquid jam dicendum est de notis quæ *Romanæ* appellantur. Notæ illæ, quarum in physicis institutionibus usus recurret, majusculis alphabeti litteris exprimentur. His characteribus *Romanorum* nomen factum fuisse creditur, quod eos in monetis publicisque monumentis usurpaverint veteres Romani. Litteræ quæ numeros Romanos componunt sunt septem, sequentes I, V, X, L, C, D, M. Harum notarum hæc est significatio, I unitas, V quinque, X decem, L quinquaginta, C centum, D quingenta, M mille. Si duo I scribantur in hunc modum II, æquivalent binario; si tria scribantur, significant ternarium. Numerus quaternarius ita exprimitur, IV. & numerus novenarius hoc modo IX, nempe unitas numeris V, X præfixa eos multiplicat unitate. Verum ad exprimendos numeros vulgares 6, 7, 8 scribi solet VI, VII, VIII. Si numero L, vel C, præmittatur X, numeri illi decade minuuntur; ita XL significat 40, & XC 90; contra autem si numerum L sequatur X, in hunc modum LX, numerus præcedens augetur decade significans 60 &c. Aliquando numerus 400 expressus fuit litteris CD, sed raro. Præter litteram D, quæ exprimit 500, idem numerus significatur etiam hoc modo 10. Ita etiam loco M, aliquando scribitur 100. Eodem modo exprimi potest 600 per 100; & 700 per 1000 &c. Si litteræ C & D, ante & post addantur, numerus 100 augetur in ratione decupla; ita CC100 significant 10000, CCC1000, 100000 &c. Hi erant communes arithmeticæ characteres apud veteres

veteres Romanos, qui etiam numerum millenarium designare solebant, adscripta numeris millenario minoribus lineola hoc modo.  $\overline{V}$  significat 5000,  $\overline{LX}$  designat 60000. Similiter  $\overline{M}$  æquivalet 1000000.  $\overline{MM}$  designat 2000000; a recentioribus nonnullis Scriptoribus variationes aliquæ fuerunt adhibitæ, ita litteris IIX designat 8, litteris IICIX exprimunt 89. Qua ratione horum numerorum ope computationes suas iniverint veteres Romani nos omnino latet. Aliquam procul dubio habuerunt arithmetica, quam quidem invenire problema est haud difficile variisque solvi posset modis; quænam vero fuerit apud Romanos usitata, ignotum est omnino.

IV. Quoniam numeri nihil aliud sunt quam rationes quædam mente perceptæ & certis signis distinctæ, evidens est arithmetica sive scientiam numerorum esse artem diversas illas rationes inter se combinandi illasque certis characteribus distinguendi. Hinc nascuntur arithmetice operationes præcipuæ. Etenim diversæ numerorum combinationes huc revocari possunt, ut nempe mutuus eorum excessus, vel modus quo se invicem continent examinetur & assignetur. Ex his autem intelliguntur mox explicandæ quatuor vulgares arithmetice operationes: *Additio, subtractio, multiplicatio, divisio*.

V. Additio vocatur illa arithmetice operatio quæ plures numeri simul colliguntur; subtractio autem dicitur operatio, qua numeri a se invicem subtrahuntur. Ita si addantur 2 & 3 ut efficiantur 5; vel minor numerus 2 a majori 3 subtrahatur ut remaneat 1; in primo casu dicitur additio, in altero autem subtractio. Pater in additione & subtractione considerari mutuum numerorum excessum; etenim in additione excessus summæ ab alterutro numero innotescit, in subtractione autem mutua numerorum differentia investigatur. Multiplicatio appellatur illa arithmetice operatio, qua idem numerus sibi metipso pluries ad-

ditur; ita si 3 per 4 multiplicari debeat, idem est ac si 4 sibi ipsi ter addatur, vel 3 sibi ipsi quater adjungatur, prodibitque 12. Divisio est arithmeticae operatio in qua numerus unus ab alio subtrahitur, quantum fieri potest; ita numerus 4 ex 12 ter subtrahi potest. Itaque patet in multiplicatione & divisione considerari modum, quo numeri sese mutuo continent. Ita in præcedenti multiplicatione innotescit numerum 12 ter continere numerum 4; per divisionem autem demonstratur numerum 4 ter contineri in 12. Ex his evidens est multiplicationem nihil aliud esse, quam additionem compositam; atque etiam divisio nihil aliud est quam composita subtractio. Quare ad duas duntaxat revocari possunt quatuor vulgares arithmeticae operationes. Hinc arithmeticae operationes accurate omnino definivit Newtonus: *Compositionem & resolutionem arithmeticam*, quæ quidem definitio ex ipsa arithmeticarum operationum natura derivatur. Quamvis autem numeri sint rationes geometricæ, ex dictis tamen evidens est additionem & subtractionem proprie revocari ad rationem arithmeticam, multiplicationem vero & divisionem ad rationem geometricam referri. Cæterum præter vulgares quatuor enumeratas operationes aliæ sunt plurimæ, sed hæ omnes ad primas referuntur, ut ex dicendis manifestum fiet. Hic autem regulas arithmeticae generatim considerasse satis fit; patet autem hanc quam tradidimus arithmeticae notionem, arithmeticae speciosæ communem esse. Itaque licet arithmeticae nomen generatim usurpemus, illud tamen de arithmetica speciosa intelligi quoque volumus. Jam vero universam arithmeticae utriusque doctrinam breviter & distincte explicemus, quantum postulant nostrarum Institutionum necessitas, atque injuncta brevis.



## CAPUT II.

*De quatuor primis arithmetice operationibus  
in numeris integris.*

I. **P**rima arithmetice operatio dicitur *additio*, quæ ex præcedentibus satis intelligitur. Totam hujus operationis praxim declarabimus atque demonstrabimus.

## PROBL. I.

*Numeros integros addere, seu in unam  
summam colligere.*

**A**ddendi proponantur numeri in hoc exemplo expressi. Quatuor numerorum columnas ita alias aliis adscribe serie descendente, ut unitates unitatibus subjiciantur, decades decadibus, & sic de reliquis. Tum infra omnes numeros ducta lineola & a postrema columna exorsus dic 1 & 8 efficiunt 9, 9 & 2 efficiunt 11, 11 & 1 efficiunt 12. Habes ergo in hac columna unam decadem unitatum ac præterea duas unitates. Quare scribe 2 in columna unitatum, & decadem rejice in sequentem decadam columnam dicens: 2 & 1 efficiunt 3, 3 & 6 efficiunt 9; 9 & 9 efficiunt 18, 18 & 6 efficiunt 24, hoc est, duas decadas decadam sive duo centenaria & 4 decadas, scribe ergo quatuor in loco decadam, & duo centenaria in sequentem columnam rejice, eodemque pacto in hac & reliquis operare, & tandem invenies summam quæsitam 82042.

Demonstratio ex tota operationis serie facile patet. Etenim in unaquaque columna numeri ita colliguntur tanquam si essent unitates, ex eaque summa tot unitates in columnam proxime sequentem rejiciuntur quot decades collectæ sunt; quod quidem faciendum esse evidens est, cum tota quolibet ab unitatum co-

lumna a d reliquas progrediendo, valorem habeat in columna sequente decuplo majorem quam in præcedente. Igitur in hac operatione adduntur singulæ unitates, decades, singula centenaria. Quare patet hujus operationis ratio; quæ quidem evidens est; cum totum æquale sit omnibus partibus simul sumptis, ex notissimo principio.

## PROBL. II.

*Numeros integros subtrahere.*

II. **S**Ecunda arithmeticæ operatio dicitur *subtractio*, cujus totum hoc est artificium. Ut numerum datum a dato numero subtrahas, numerum subtrahendum alteri a quo subtrahi debet ita subicies, ut unitates unitatibus respondeant, decades decadibus, & sic de reliquis. Tum ab unitatibus exorsus quamlibet inferiorem notam a superiori subtrahes & residuum scribe infra lineolam, habebis numerum qui sit datorum numerorum differentia. Si vero occurrat inferiorem notam superiori majorem esse, hanc augebis decem unitatibus, easque mutuas accipies a proxime sequenti nota, quam proinde deinceps habebis tanquam unitate multiplicatam. Subtrahendus proponatur numerus 4245 a numero 23897. Aufereudo 5 ex 7 relinquitur numerus 2, aufereudo 4 ex 9 relinquitur 5, 2 ex 8 remanet 6. At cum numerus 4 ex 3 subduci nequeat, adice huic denas unitates & aufereudo 4 ex 13, residuum habebis 9. Tum vero notam superiorem proxime sequentem unitate multiplicabis; hanc enim ab ea mutuam accepisti ut denis unitatibus præcedentem augeres; habebis ergo residuum 1, ideoque residuum totum 19652.

Demonstratio satis per se constat, cum unitates ab unitatibus auferantur, decades a decadibus &c. Nam quod in hoc exemplo numerus 3 decem augeatur

*Exempl.*

23897

4245

19652

unitatibus & numerus sequens 2 unitate mulctetur, ratio patet. Hæc nempe unitas in numero 3 decadi unitatum æqualis est, earum scilicet quibus constar idem numerus 3; quare etiamsi unitatem duntaxat ille amittat, huic tamen decem accedunt. Simili modo si plures sequerentur cyphræ, ex quibus proinde nulla fieri potest subtractio, ex numero proxime antecedenti mutua accipienda est unitas, quæ in cyphram sequentem translata decem unitatibus æquivaleret. Rursus ex illa decade unitas in secundam cyphram transfertur atque ita deinceps. Quare patet cyphram ultimam decem unitatibus æqualem esse, cæteras vero antecedentes æquari novenario. Itaque evidens est hujus operationis ratio.

Ex additionis & subtractionis natura manifestum est duas illas operationes sibi mutuam probationem conferre & sese invicem confirmare. Etenim cum residuum in subtractione sit ipsa numerorum differentia, patet minorem numerum residuo sive differentię additum majori numero æqualem esse. Item cum additio sit plurium numerorum aggregatum, si ex aggregato alteruter numerus auferatur, numerum alterum remanere necessum est. Si igitur explorare velis utrum additio rite peracta sit, subtractione utendum est; contra autem ad explorandam subtractionem additio adhibenda.

### P R O B L. III.

*Numeros integros multiplicare.*

III. **T**ertia arithmeticæ operatio vocatur *multiplicatio*, in qua, ut patet ex capite præcedenti, toties sumitur numerus multiplicandus, quoties unitas continetur in numero, per quem debet multiplicari. Singulæ notæ in singulas facile ducuntur, si numeri breviores sint. Sic nemo non videt 3 in 4 ductum, sive 4 ter sumptum 12 efficere. At si numeros

meros pluribus notis constantes multiplicare oporteat, horum alterutrum infra alterum scribe ita ut unitates unitatibus subjiciantur. Deinde notas omnes superioris numeri per singulas inferioris multiplica, initio a postremis facto. Decadas quæ inter multiplicandum colliguntur seponere, adjiciendas productum ex eadem numeri inferioris nota in proxime sequentem superioris. Facta quæ emergunt ex singulis notis inferioris in omnes superioris, infra lineolam seorsim notentur, ita ut uniuscujusque unitates subjiciantur numero per quem multiplicatio peragitur. Si horum omnium summa colligatur, ea erit productum quæsitum.

Multiplicandus proponatur numerus 235 per 43. Scribe 43 sub 235; tum ducta lineola dic 3 in 5 efficiunt 15, scribe 5 sub numero multiplicante 3, & unam decadem seponere adjiciendam facto sequenti ex 3 in 3, quod est 9, cui si addas 1, habebis unam decadem, & nullas præterea unitates; scribe igitur 0, & facto ex 3 in 2 adjiciens 1, scribe 7; rursus dic 4 in 5 efficiunt 20, scribe 0, ita ut multiplicatori 4 subjaceat; & facto sequenti 4 in 3, quod est 12, adjiciens 2, habebis 14; scribe igitur 4, & seponens 1, dic 2 in 4 efficiunt 8, & adjecto 1 scribe 9. Demum ducta linea, collige in unam summam hos numeros ita dispositos, eritque 10105 productum quæsitum.

*Exempl.*

$$\begin{array}{r}
 235 \\
 \times 43 \\
 \hline
 705 \\
 940 \\
 \hline
 10105
 \end{array}$$

Demonstratio evidens est ex ipsa notarum arithmeticarum natura; si nempe in memoriam revocetur numerorum characteres decuplo plus valere in locis anterioribus quam in posterioribus; illico enim manifestum fiet toties sumi in productum numerum multiplicandum, quoties unitas continetur in numero per quem fit multiplicatio.

## PROBL. IV.

*Numeros integros dividere.*

IV. **Q**uarta arithmeticæ operatio vocatur *Divisio*. Cum numerus datus per alium datum dividendus proponitur, eo reducitur quæstio, ut inveniatur quoties in numero, dividendo contineatur divisor, totiesque auferatur, atque totidem unitates scribantur in numero qui idcirco *quotus* dicitur. Hæc ergo genuina est divisionis notio, nempe dividendus est ad divisorem, ut quotus est ad unitatem; vel dividendus est ad quotum, ut divisor est ad unitatem.

Proponatur dividendus numerus 10105 per 43. Numero dividendo divisorem præfige lineola interjecta, tum operationem instituens in primis notis dividendi, quæ exhibeant quantitatem divi-  
 fori æqualem vel proxime majorem, dic quoties 43 continentur in 101, quotus erit 2. Scribe ergo 2, lineola pariter interjecta ex

<i>Exempl.</i>	
43	1 10105. 1 235
	86
	<hr/>
	150
	<hr/>
	129
	<hr/>
	215
	<hr/>
	215
	<hr/>
	000

altera parte dividendi, & factum ex 2 in 43 sive 86 aufer ex 101, & residuo 15 notam appone quæ in dividendo proxime sequitur quantitatem jam divisam 101. Dic iterum, quoties 43 continentur in 150, quotus est 3 quem scribe ut ante, & factum ex 3 in 43 seu 129 aufer ex 150. Residuo 21 adnecte sequentem notam dividendi 5, & dic iterum, quoties 43 continentur in 215, quotus erit 5, quem scribe cum aliis quoti notis, & aufer ex 215 factum ex 5 in 43, sive 215; cum nihil ex ea divisione superfit, patet numerum 235 illum accurate esse qui oritur ex divisione 10105 per 43.

Tota operationis ratio facile patet, si animadvertamus

tamus in hujusmodi operatione, rem perinde se habere, ac si quæreretur, quota pars quantitatis alicujus singulis hominibus obveniret, si eam ex æquo tot hominibus distribui oporteret, quot unitates continet divisor. Nam in tota operationis serie inquiremus, quot unitates, decades &c. singulis dari possint, iisque datis quæ dari possunt, quot adhuc distribuendæ supersint. Facile autem intelligitur post quamlibet subtractionem peractam, id quod relinquitur, antequam ulteriorem dividendi notam adjicias, divisore minorem esse oportere; nam si residuum æquale foret, vel majus, divisor in quantitate jam divisa pluries containeretur, quam indicet numerus in quotum relatus. Omnis difficultas in eo sita est, quod in numeris majoribus statim non pateat, quoties divisor in dividendi notis contineatur, & tentamine utendum est; divisor nempe per numeros ab 1 ad 9 multiplicandus est, atque numeri ex hac multiplicatione producti debent comparari cum dividendi notis, & explorandum est quinam ex illis numeris sit proxime minor; pones in quoto numerum, in quem ductus divisor hunc efficit numerum, ipsum vero numerum ex dividendi notis subduces. Cæterum qui in arithmetica satis fuerit exercitatus, facile conjiciet ex primis utriusque numeri notis, dividendi scilicet & divisoris, ipsum numerum pro quoto eligendum.

Probe autem observari debet in quoto notarum valor, ut in aliis Arithmeticæ operationibus jam antea monuimus; at in præsentí operatione, quæ est omnium difficillima rem brevi exemplo illustrabimus. Dividendus proponatur numerus 416 per 2; statim patet, in quoto contineri centenarios, decadas, & unitates. Dividatur jam 4 per 2, quotus erit 2, qui per 2 multiplicatus producit 4, quo subtracto ex 4 fit 0. Patet ergo, divisum fuisse 400 per 2. Progredior deinde ad notam sequentem 1, hoc

hoc est dividi debet 10 per 2. Statim autem video 2 in 10 decies non contineri; quare scribitur 0 in quoto: tum ut indicetur, quotum nullam decadem continere, tum ut primæ quoti notæ 2 suus servetur centenarii valor. Tandem progrediendum ad 6, qui numero præcedenti 1 apponitur, divisoque 16 per 2, habetur quotus 8, ideoque quotus totus est 208. Hinc generatim intelligitur, qua de causa in quoto scribatur cyphra, imo & plures cyphras aliquando scribi oporteat. Hac divisione peracta, nulla relinquitur in dividendo nota, si autem aliquid residui ex postrema subtractione superfit, quoto adjicienda est fractio. Ita si in exemplo præcedenti haberetur numerus 417 per 2 dividendus, ita ut numerum 417 ex æquo hominibus 2 parti debear, singuli acciperent nummos 208, & dimidiam partem nummi, quæ ita scribitur  $\frac{1}{2}$ .

Ex hæcenus explicatis generatim etiam patet, factis esse primam dividendi notam per primam divisoris notam dividi, si in divisore & dividendo idem sit notarum numerus. Verum si dividendus plures contineat notas, sæpe necesse est duas primas dividendi notas primæ divisoris notæ subjici; idque fieri debere evidens est, quoties datus notarum numerus in divisore majorem habet valorem, quam habeat æqualis notarum numerus in dividendo: verum si duæ adhibeantur dividendi notæ, per primam divisoris notam divisio semper fieri potest. Quare generatim ostenditur, sumptis in dividendo tot notis quot sunt in divisore, notarum numerum in quoto æqualem esse residuo notarum numero in dividendo. Si vero, quod sæpe fieri necessum est, notarum numerus in divisore unitate minor sit quam in dividendo, unitate quoque minuatur notarum numerus in quoto. Hinc etiam patet nullum in quoto numerum novenario majorem adhiberi posse; alioqui enim notarum numerus in quoto major foret quam oportet; ut jam demonstratum est. Di-

Divisionis rite peractæ argumentum habebis, si divisorem in quotum ducas, redeatque divisus numerus, nam si non redeat, manifestum est, alicubi errorem esse admissum; quod quidem patet ex ipsa divisionis natura, cum dividendus toties contineat divisorem, quoties unitas continetur in quotu: quare cum quotus exprimat quoties divisor contineatur in dividendo; si divisor per quotum multiplicetur, dividendum ipsum restitui necesse est. Cæterum patet, si divisorem accuratum habere non licuit, facto ex divisore in quotum addendum esse residuum ex ultima divisionis subtractione, ut redeat divisa quantitas. Contraria ratione evidens est multiplicationis rite peractæ haberi argumentum, si productum dividatur per multiplicandum aut per numerum multiplicatorem; in primo casu quotus fit multiplicator; in casu autem altero quotus est multiplicandus. Cum enim divisio sit multiplicationi contraria, per divisionem resolvitur quod in multiplicatione componitur, & contra. Cæterum in multiplicatione & divisione compendia plurima usus docebit; hic monere fatis erit, multiplicationis per plures cyphas faciendæ compendium haberi, si in producto scribantur tot cyphæ quot occurrunt in multiplicando & multiplicatore simul; multiplicatio autem aliarum notarum fiat secundum regulas prædictas. Item in divisione, si divisor & dividendus cyphas contineant, in dividendo delendæ sunt tot cyphæ, quot occurrunt in divisore, quæ etiam in ipso divisore deleri debent, & reliqua operatio peragenda, ut antea. Notandum autem est compendium illud valere duntaxat, si cyphæ fuerint ultimæ tum divisoris tum dividendi notæ; quod quidem manifestum est ex cyphrarum natura.

*Scholium.* In præfenti capite sermonem habuimus duntaxat de numeris homogeneis, sive ejusdem speciei; at pari facilitate in numeris heterogeneis, seu diver-



diversæ speciei absolventur operationes arithmeticæ. Antequam vero operationes illas explicemus, definiendum est quid per numerum *concretum*, quid per *abstractum* intelligant Arithmetici. Numerus concretus dicitur, quo res aliqua determinata designatur, ita si dicas tres homines, tres horas, tres pedes &c. At si numerus 3 generatim enuntiaveris, nec rem aliquam designaveris; numerus vocatur abstractus. Jam in numeris diversæ speciei additio, & subtractio facile intelliguntur. Probe tenenda est diversâ numerorum species; ita si addi debeant lineæ, pollices, pedes, hexapedæ; sciendum est lineas 12 pollicem unum æquare; pollices 12 pedem unum, & hexapedam ex pedibus 6 constare. Ubi autem in linearum additione summa efficitur quæ 12 excedit; tot unitates inter pollices referri debent, quot sunt numeri duodenarii; quod vero reliquum est, seu quod duodenario minus est, in linearum columna scribi debet: & ita deinceps de alia qualibet numerorum specie. Similiter in subtractione tota patet operationis ratio; si quantitas subtrahenda, E. G. linearum numerus, justo major sit; jam ex quantitate præcedenti, pollicum scilicet, mutuo accipienda est unitas, quæ duodenario numero æquivalet, atque ita reliqua operatio peragenda. Illud unicum est discrimen inter operationes arithmeticas in numeris abstractis atque heterogeneis peragendas, quod scilicet in numerorum abstractorum additione vel subtractione unitas mutuo accepta decadi æquivalet; at in numeris heterogeneis unitas quæ mutuo accipitur, eum retinet valorem, qui speciei suæ respondeat. Hæc de additione, & subtractione.

Quod multiplicationem spectat, improprie omnino a quibusdam arithmeticis proponi videntur concretorum numerorum multiplicationes. Ita ineptum est, quod faciunt aliqui, quærere productum ex nummis 3, juliis 3, assibus 3, in nummos 3, julios 3, asses 3.

affes 3. Etenim in eo sita est multiplicatio ut data quædam quantitas datis vicibus sumatur, ac proinde multiplicator debet esse numerus abstractus. Qua ratione autem quantitates diversæ speciei per numerum abstractum multiplicentur facile patet. Si, E. G. productum ex lineis in numerum abstractum majus sit numero duodenario, jam inter pollices rejici debent tot unitates, quot sunt numeri duodenarii, quod autem reliquum est inter lineas scribendum. Porro quamvis in multiplicatione numerus abstractus esse debeat multiplicator, res tamen aliter se habet in divisione; nam dividendus semper censetur numerus concretus, divisor autem vel concretus vel abstractus esse potest. Ita dividi possunt nummi 6 per nummos 2, hoc est, investigari potest quoties 2 contineatur in 6, quotus 3 erit numerus abstractus. Potest etiam dividi numerus concretus per numerum abstractum; ita nummos 6 dividere possumus per 3, hoc est, investigare possumus tertiam partem nummorum 6, quotus erit numerus concretus, nempe nummi 2. Jam ut perspicua habeatur divisionis notio, ad ipsam definitionem redeamus. In divisione scilicet dividendus est ad divisorem, ut quotus est ad unitatem, vel dividendus est ad quotum, ut divisor ad unitatem. Probe autem observari debent illæ duæ proportionēs, licet una eademque videantur. Dividendus tanquam numerus concretus semper habetur, concretus autem vel abstractus esse potest numerus divisor. In 1.<sup>o</sup> casu, quotus erit numerus abstractus, & locum habet prima proportio; in casu altero, ubi nempe divisor est numerus abstractus, quotus est numerus concretus & locum habet proportio altera; quæ quidem omnia exemplo facile licebit intelligere. Si nummi 6, *numerus concretus*, dividantur per nummos 2, *numerus* itidem *concretum*, quotus erit numerus abstractus 3, hic enim non indicabit numerum nummorum, sed exprimet quoties divisor contine-

rinetur in dividendo; erunt nempe 6 nummi ad 2 nummos, ut numerus abstractus 2 est ad unitatem abstractam 1. Dici autem non posset, 6 nummi (*numerus scilicet dividendus & concretus*) sunt ad quotum 3 (numerum abstractum), ut nummi 2 (*numerus divisor & concretus*) ad 1 (numerum abstractum). Talis proportio nullam in mente relinqueret distinctam notionem; cum enim numerus concretus & numerus abstractus diversi sint generis, nulla inter eos comparatio & ratio proprie dicta institui potest.

Si divisor sit numerus abstractus, ut in casu secundo, quotus est numerus concretus, & secunda valet proportio. Ita si dividantur 6 nummi per numerum abstractum 3, quotus erit nummi 2, (numerus scilicet concretus), habebiturque hæc proportio: numerus concretus nempe 6 nummi erit ad quotum nummos 2, ut divisor 3 ad 1. Id vero notandum est in utraque proportionem unitatem esse semper numerum abstractum. Quare divisio sub duplici ratione considerari potest; vel enim quæritur quoties quantitas una in altera ejusdem generis quantitate continetur, & hic est primus casus; vel quæritur quantitas quæ certis vicibus in alia ejusdem generis quantitate contineatur, & hic est casus secundus. Facile autem patet ex demonstratis quomodo numeri concreti per abstractos dividantur, aut etiam concreti per concretos, etiamsi fuerint diversæ speciei. Etenim si concreti per abstractos dividantur, initio sumpto ab iis qui majorem habent valorem, divisio ex regulis præscriptis instituatur; si autem supersit aliquid, ad minorem speciem reducatur. E. G. Si residui fuerint pedes, reducantur in pollices, atque iterum divisio de more fiat. Si concretos numeros diversæ speciei per concretos itidem diversæ speciei dividi oporteat, jam numeri tum dividendi tum divisoris ad minimam speciem deprimantur; quod per multiplicationem fieri

manifestum est, atque divisio fiat eodem modo ac in numeris abstractis. Cæterum in multiplicatione & divisione quantitatum diversæ speciei, varia adhiberi possunt operandi compendia, quæ sine fractionum doctrina intelligi non possunt. Divisionis notionem ex genuinis principiis jam hausimus; in operationibus arithmeticis abstrahi solet a concretis abstractisque numeris, an concreti sint vel abstracti, ad maiorem operationum facilitatem; verum ad formandam earundem operationum ideam distinctam, necesse est ut numeris sua deinde restituatur conveniens notio.

### C A P U T. III.

*De quatuor præcedentibus operationibus  
in Arithmetica speciosa absolvendis.*

#### P R O B L. I.

*Quantitates litterales addere.*

I. **Q**uantitatibus litteralibus præfiguntur signa, quorum significationem præmitti omnino necessum est. Signum additionis est  $+$ ; signum autem subtractionis est  $-$ ; æqualitas duabus lineolis exprimi solet hoc modo  $=$ . Ita  $a = a$ ,  $a - a = 0$ . Quantitas addenda dici solet *quantitas positiva*; quantitas autem subtrahenda vocatur *negativa*. Si quantitati litterali præfigatur numerus aliquis, hic *coefficientis* vocatur; ita in quantitate litterali  $2a$  numerus  $2$  coefficientis appellatur. Si autem quantitas litteralis nullum numerum præfixum habeat, jam unitas tanquam illius coefficientis censeri debet: ita  $a = 1a$ , ut patet. Quantitates litterales dicuntur *similes*, si easdem contineant litteras, & eundem earundem litterarum numerum, etiamsi diversis coefficientibus notentur; ita  $+2a$ , &  $-5a$  sunt quantitates similes: at *dissimiles* sunt quantitates  $a$  &  $b$ , atque etiam quantitates  $a$  &  $aa$ . Quantitas aliqua ex pluribus terminis

*minis composita* dicitur, quæ plures habet litteras signo  $+$ , vel  $-$  connexas. Ita  $a + b$  constat ex duobus terminis & *binomium* dicitur;  $a + b + c$  ex tribus terminis componitur, & *trinomium* vocatur. Quantitas ex unico termino composita dicitur *quantitas simplex*, atque etiam *monomium*; ita  $a$ ,  $ab$ ,  $abc$  sunt quantitates simplices. His præmissis definitionibus, quantitarum literalium additio jam explicanda est. Si quantitates simplices fuerint, tota operationis ratio statim patet. Ita si  $a$  &  $a$  addi debeant, habebitur  $2a$ ; si addere oporteat  $a$  &  $2a$ , summa erit  $3a$ , & ita deinceps; satis nempe est in hoc casu addi coefficientes, & coefficientium summam quantitatibus literalibus præfigi, eodem servato signo  $+$  vel  $-$ , si quantitates eodem signo afficiantur. At si diversa fuerint signa, jam coefficientis minor a majori subtrahi debet, & differentia cum majoris coefficientis signo scribenda.

Id quidem evidens est ex negativarum, & positivarum quantitarum natura. Etenim quantitates positivæ quantitatibus negativis sunt directe contrariæ. Quare si quantitates addendæ similes sint, signisque contrariis affectæ, vel se omnino destruunt, vel aliqua ex parte tantum; nempe si quantitas una sit altera major, destruitur in majori quantitate pars minori æqualis, & residuum est quantitatæ utriusque differentia, quæ quidem differentia signo majori quantitati præfixo affici debet. Ita evidens est, quantitates  $+ 5df$  &  $- 3df$  reduci ad  $+ 2df$ ; nam  $5df$  est quantitas  $df$  quinquies sumpta, &  $- 3df$  est quantitas  $df$  ter subtracta; sed eadem quantitas quinquies sumpta & ter subtracta reducitur ad quantitatem bis sumptam. Similiter  $+ 5fm$  &  $- 6fm$  reducitur ad  $- 1fm$ , vel ad  $- fm$ . Nam  $- 6fm$  est quantitas  $fm$  sexies subtracta, &  $+ 5fm$  est eadem quantitas quinquies addita, ac proinde quantitas  $fm$  semel subtrahitur, & remanet negativa, seu fit  $- fm$ . Eadem ratione operandum est in aliis

quantitatibus utcumque compositis. Quantitates addendæ ita disponuntur, ut similes termini sibi invicem respondendant. Singulæ partes

<i>Exemplum</i>	
$3ab - 5cs - 4dr + 2s$	
$-ab + 4cs + 4dr - s$	
$2ab - cs$	$* + s$

seorsim considerantur ut simplices, & additio fit ut modo præscriptum est; summa autem infra lineolam scribitur. Sub terminis, qui sese mutuo destruunt; scribi solet stellula vel zero. Totæ operatio patet ex præsentis exemplo. Si quantitates aliquæ fuerint dissimiles, eas signo  $+$  vel  $-$  connectendas esse evidens est. Ita si addi oporteat  $a$  &  $b$ , vel  $a$  &  $-b$ , scribendum est  $a + b$ ,  $a - b$ .

## PROBL. II.

*Quantitates litterales subtrahere.*

II. **I**N subtractione considerantur quantitates singulæ subtrahendæ tanquam si haberent signum ei, quod habent, contrarium, & fiat summa ex legibus jam præscriptis; nempe in quantitate subtrahenda mutetur signum  $+$  in  $-$  &  $-$  in  $+$ , & additio de more fiat. Ita subtrahitur  $b$  ex  $a$ , scribendo  $a - b$ . Si  $b - c$  ex  $a + c$  subtrahi oporteat, scribitur  $a + c - b + c = a - b + 2c$ . Simili modo in quantitatibus utcumque compositis operandum est.

Quantitas subtrahenda inferiori loco scribitur, alia autem, ex qua subtractio fieri debet, supra apponitur; deinde mutatis signis, ut jam

<i>Exemplum.</i>	
$ab + abb - dd$	
$ab - bc + dd$	
$ab + abb - dd - ab + bc - dd$	
$= abb + bc - 2dd$	

dictum est, tota quantitarum series scribitur, & postea reducitur, ut factum est in additione; habebitur quantitarum differentia infra lineolam scribenda. Quod autem in quantitate subtrahenda signum  $-$  mutetur in  $+$ , ratio facile patet. Si ex  $a$  sub-

subtrahi debeat  $b - d$ , scribaturque primo  $a - b$ , subtractio iusto major est; subtrahenda enim non proponitur tota quantitas  $b$ , sed  $b$  multiplicata quantitate  $d$ ; quare iusto major est subtractio, & excessus est ipsa quantitas  $d$ , quæ proinde cum signo positivo  $+$  restitui debet, & scribendum est  $a - b + d$ . Id vero numerorum exemplo illustratur. Si ex numero 6 subtrahendus proponatur numerus  $5 - 3$ , ex præscripta regula scribendum est  $6 - 5 + 3$ , hoc est 4, reductione facta; quod evidens est. Si enim scriberes  $6 - 5 - 3$ ; subtraheres 3 ex 6, quod quidem faciendum non proponitur; cum enim sit  $5 - 3 = 2$ , ex numero 6 subtrahi debet duntaxat numerus 2. Cæterum patet in calculo litterali non secus ac in arithmetico, additionem, & subtractionem sibi mutuam probationem præbere, ita ut operatio una per alteram mutuo exploretur.

## PROBL. III.

*Quantitates litterales multiplicare.*

III. **S**ignum multiplicationis est  $\times$ , quod tamen in multiplicatione facta per litteras omitti solet, & sola conjunctio litterarum sine signo multiplicationem significat. Sit  $a = 2$ ,  $b = 10$ ; erit  $ab = 2 \times 10 = 20$ . Si eadem quantitas per seipsam multiplicetur, apponitur post ipsam paulo supra numerus, qui exprimat quoties scribenda esset. Ita  $aa = a^2$ ,  $aaa = a^3$ . Cavendum ne confundatur  $a^2$  cum  $2a$ ; sit  $a = 5$ , erit  $a^2 = 25$ ,  $2a = 10$ ; sit  $b = 2$ , erit  $(a + b)^2 = a^2 + b^2 = 7 \times 7 = 49$ ; parenthesis autem  $( )$ , vel lineola  $-$  producta designat totam quantitatem  $a + b$  in seipsam multiplicari. Numerus supra positus est *index*, seu *exponens potentie*, ut vocant, vel *potestatis*, seu *dignitatis* quantitatis ipsius, & exprimit quot vicibus unitas per illam quan-

ritatem multiplicetur. Ita  $1 \times a = a^1$ ;  $1 \times a \times a = a^2$ ;  
 $1 \times a \times a \times a = a^3$  &c.

In quantitatuum compositionum multiplicatione scribenda est altera quantitas sub altera, tum tota prima quantitas multiplicanda per unum ex terminis secundæ, scribendo productum in una linea, deinde tota prima quantitas per aliam & ita porro, scribendo singula producta in singulis lineis, ac notando similes terminos diversorum hujusmodi productorum alios sub aliis, deinde omnium linearum colligenda summa. Omnium vero hujusmodi operationum patet ratio; multiplicatio enim fit per partes non secus ac in quantitatibus simplicibus. Porro in multiplicatione quatuor operationis partes considerari debent, nempe signa, coefficientes, litteræ, & exponentes; hinc quatuor præscribuntur regulæ. 1.<sup>a</sup> Si signa fuerint eadem, positiva scilicet, vel negativa; productum fit positivum: contra autem si fuerint diversa, productum est negativum. Ita  $++ = +$ ,  $+- = -$ ;  $-+ = -$ ; &  $-- = +$ . 2.<sup>a</sup> Coefficientes in se invicem multiplicantur. 3.<sup>a</sup> Litteræ ordine alphabetico scribuntur, nullo interposito signo. 4.<sup>a</sup> Si quantitas aliqua exponents afficiatur, eaque multiplicari debeat per eandem litteram exponents itidem affectam, littera illa semel in producto scribenda est; ita ut tamen hujus quantitatis exponents æqualis fiat exponentium summæ. Operatio tota patet exemplo. Quantitas multiplicanda superiori loco scribitur. Deinde multiplicatur per a, & producta singula infra lineolam scribuntur. Postea fit multiplicatio per b, productaque infra apponuntur, & tandem productorum partes singulæ, ut moris est, in summam colliguntur.

*Exemplum.*

$$a^2 + 2ac - bc$$

$$a - b$$

$$a^3 + 2a^2c - abc$$

$$-a^2b - 2abc + b^2c$$

$$a^3 - a^2b + 2a^2c - 3abc + b^2c$$

colli-



colliguntur. Id vero pro majori additionis facilitate observandum est, ut scilicet similes productorum partes aliæ sub aliis scribantur & sibi invicem respondeant, ut in additione præscripsimus. Quod spectat tres ultimas operationis partes, hæc satis patent ex antea demonstratis; verum quod attinet signorum leges, illarum rationem exponemus.

Signorum multiplicatio, quæ tyronibus difficultatem asferre solet, ex ipsa quantitatum negativarum natura intelligi potest. Dum quantitas positiva  $+a$  multiplicatur per aliquem numerum positivum  $+n$ , sensus est quantitatem  $+a$  toties sumi, quoties unitas continetur in  $n$ , ac proinde productum fit  $na$ . . . . . Si  $-a$  multiplicari debeat per  $n$ , sensus est  $-a$  quantitatem negativam toties sumi, quoties unitas continetur in  $n$ , ideoque productum est  $-na$ . Simili modo si multiplicetur  $+a$  per  $-n$ , sensus est quantitatem  $a$ , toties subtrahi quoties unitas continetur in  $n$ , ideoque productum est negativum seu  $-na$ . Si  $-a$  multiplicare oporteat per  $-n$ , sensus est  $-a$ , toties subtrahendum esse quoties unitas est in  $n$ ; sed subtractio quantitatis negativæ  $-a$ , æquivaleret additioni  $+a$ ; quare productum est  $+na$ . Nemo non videt productum ex quantitate positiva in positivam fieri positivum, sed alii casus hoc modo rursus illustrari possunt. Cum sit  $+a - a = 0$ , si multiplicetur  $+a - a$  per  $n$ , productum debet esse 0. Jam vero primus producti terminus est  $na$ , ergo terminus alter debet esse  $-na$ , qui destruat primum terminum  $+na$ , ita ut productum sit  $+na - na = 0$ . Quare  $-a \times +n = -na$ . Simili modo, si multiplicetur  $+a - a$  per  $-n$ , primus producti terminus est  $-na$ . Quare terminus alter est  $+na$ ; alioqui termini duo sese mutuo non destruerent; quod tamen fieri debet cum sit  $a - a = 0$ . Ergo  $-a \times -n = +na$ .

## PROBL. IV.

*Quantitates litterales dividere.*

IV. **S**ignum divisionis est lineola interposita, dividendum separans a divifore, ita  $\frac{a}{b}$ , designat a

dividi per b; divisio etiam designatur interpositis binis punctis hoc modo a : b. Verum his signis utendum est duntaxat, si divisio accurate fieri non possit; quod primum illustrabimus exemplo quantitatum, quæ unico constant termino. Si proponatur dividenda quantitas  $a^2bc$  per  $a^2c$ , erit  $\frac{a^2bc}{a^2c} = b$ , ac proinde

quotus erit b. Simili ratione  $\frac{6a^2bc}{2a^2c} = 3b$ . At  $\frac{10a^2b}{6a^2c} = \frac{10b}{6c}$ . In hoc fita est tota divisionis operatio ut ex

dividendo & divifore expungantur litteræ utrique communes, reliquæ autem pro quoto habeantur. Si autem quantitates litterales coefficientibus afficiantur, evidens est divisionem institui debere non secus ac in arithmetica vulgari. Porro licet in dividendo & divifore deleantur litteræ communes, non tamen putandum est quotum ex quantitate per seipsam divisa esse = 0, ita  $\frac{abc}{abc}$  non est = 0, delentur quidem lit-

teræ omnes, sed quantitati litterali præfixus semper intelligitur coefficientis 1; sic  $\frac{abc}{abc} = \frac{1abc}{1abc} = \frac{1}{1} = 1$ .

Et quidem dum dividitur abc per abc, quæritur quoties abc continetur in abc. Sed quantitas quælibet semel in seipsa continetur. Quare in hoc casu, quotus est semper unitas. Quod signorum leges spectat, eadem omnino sunt quæ pro multiplicatione, nempe si + dividatur per +, & — per —, quotus signo + afficitur; contra autem si dividatur + per —, vel — per

per  $+$ , quotus afficitur signo  $-$ . Tota explicatae operationis ratio evidens est ex ipsa divisionis natura; cum enim productum ex divisore in quotum dividendo æquale esse debeat, manifestum est quotum ex divisione quantitatis negativæ per negativam, oportere esse positivum. Ponamus enim esse negativum; jam productum ex quo negativo in divisorem negativum foret positivum, ac proinde non rediret quantitas dividenda quæ ponitur negativæ. Simili ratione demonstrantur aliæ signorum leges.

Eodem plane modo operandum est in aliis divisionibus utcumque compositis. Ita si dividi oporteat

$9ab^2 - 15a^2b + 6a^3$  per  $-3ab + 2a^2$   
Singuli termini ita disponi debent ut sumatur divisionis initium ab illo termino, qui ad maximam evectus est

<i>Exemplum.</i>		
$6a^3 - 15a^2b + 9ab^2$	$6a^3 + 9a^2b$	$2a^2 - 3ab$
$\star - 6a^2b + 9ab^2$	$+ 6a^2b - 9ab^2$	$3a - 3b$
$\star$	$\star$	

potestatem, & ita per gradus progrediendo, ut hic factum vides. Itaque divides  $6a^3$  per  $2a^2$ , prodit quotus  $3a$ , per quem divisor totus multiplicatur, productumque  $6a^3 + 9a^2b$  subtrahas ex dividendo, residuum fit  $-6a^2b$  cui addas  $9ab^2$ , & dividere pergas ut ante, quotus est  $-3b$ , productumque ex hoc quo- to & divisore iterum auferas ex dividendo, nihilque remanet; quare accurata est divisio. Si autem perfecta operatione aliquid supersit ita ut divisor & reliqua pars dividendi nullas communes habeant quantitates, jam divisio accurate fieri non potest, sed quo invento jungenda est fractio: de fractionibus autem tractabitur in proximo capite.

Sæpe contingit divisionem in infinitum continuari, & tunc quotus fit, ut vöcant, *series infinita*. Exemplo fit unitas dividenda per  $1 - a$ . Operatio est huiusmodi.

$  \begin{array}{r}  1 \\  \hline  1 - a \\  \hline  + a \\  \hline  + a - aa \\  \hline  + aa \\  \hline  + aa - aaa \\  \hline  + aaa \&c.  \end{array}  $	}	<p style="text-align: center;">quotus est</p> <p><math>1 \rightarrow a \rightarrow aa \rightarrow a^3 \rightarrow a^4 \&amp;c.</math></p> <p style="text-align: center;">in infinitum.</p>
--	---	--

Hæc pauca exempla satis sint. Cæterum patet multiplicationem & divisionem in quantitatibus litteralibus non secus ac in numeris sibi mutuam probationem conferre, ita ut multiplicatio per divisionem & viceversa divisio per multiplicationem confirmetur.

*Schol.* In hoc capite frequens fuit mentio de quantitatibus negativis, quarum genuinam notionem paucis iterum explicare non abs re erit. Si duæ quantitates magnitudine æquales, ad partes directe oppositas simul & in eodem subiecto conjunctæ intelligantur, sese mutuo destruunt illarumque effectus nihilo æqualis est. Ita si potentiaæ duæ æquales in partes directe oppositas agunt, virium illarum effectus nullus est. Pari modo si aliquis habeat 100 nummos, totidemque alteri debeat, jam illi 100 nummi, si ad hujus hominis possessionem referantur, pro nihilo considerari debent. Si autem quis 100 nummos habeat & 200 alteri debeat, jam possessio hujus hominis negativa est, &, ut ita dicam, nihilo minor. Si aliquis ad propositum locum iter factururus, ad partem directe oppositam progrediatur, jam hujus hominis iter tanquam negativum & minus nihilo haberi debet, si ad finem propositum referatur. Igitur probe tenendum est quid intelligatur per quantitatem negativam & nihilo, ut dicunt, minorem. Quantitas negativa non minus realis est, quam quantitas positiva; sed nihilo minor dicitur ratione effectus tantum &

*rela-*

*relative*, non autem *absolute*. Hunc loquendi modum a nonnullis usurpatum ita explicavimus ut nihil difficultatis tyronibus facessere possit.

## CAPUT IV.

*De iisdem operationibus in numeris fractis.*

I. **N**umeri fracti definitionem jam in primo capite tradidimus. Si divisor excedat dividendum, duo numeri a se invicem, interposita lineola, separantur ita ut dividendus supra lineolam & divisor infra scribantur in hunc modum  $\frac{1}{2}$ ,  $\frac{4}{7}$  &c. Similiter si quantitas aliqua litteralis per aliam dividenda proponatur, & divisio fieri non possit, eodem modo scribuntur duæ quantitates; ita  $\frac{a}{b}$  significat quatum ex a per b; tales autem quoti *fractiones* vocantur. Quantitas superior dicitur *numerator*, inferior autem *denominator* appellatur. Denominator exprimit numerum partium in quas totum aliquod divisum fingitur; numerator autem designat quot ejusdem partes accipiantur, vel, quod idem est, quoties una ex illis partibus sumatur, ac proinde pars illa considerari potest tanquam unitas aliqua. E. G. fractio  $\frac{1}{2}$  nihil est aliud quam pars quarta alicujus totius ter sumpta; hæc autem pars quarta tanquam unitas altera haberi etiam potest.

II. Ex fractionum natura intelligitur quæ ratione numerus integer ad fractum reducatur, atque etiam ad denominatorem datum. Ita si numerus 3 reducendus proponatur ad fractionem cujus denominator 4; multiplicetur 3 per 4, scribaturque  $\frac{12}{4}$ , erit hæc fractio æquivalens ternario, ut patet; cum numerus 3 multiplicetur simulque dividatur per 4. Sed tales fractiones in quibus numerator major est denominatore pro veris fractionibus non habentur,

at.

atque *improprie* duntaxat ita appellantur. Pari ratione si quantitas  $a$  reduci debeat in fractionem litteralem cuius denominator sit  $b$ ; habebitur  $\frac{ab}{b} = a$ .

Ex his etiam patet quomodo fractiones, quæ diversum habent denominatorem, ad eundem redigantur. Sint fractiones duæ  $\frac{a}{b}$ ,  $\frac{c}{d}$ , multiplicetur fractio  $\frac{a}{b}$  per  $d$  simulque dividatur per  $d$ , erit  $\frac{a \times d}{b \times d} = \frac{a}{b}$ . Simili modo multiplicetur fractio  $\frac{c}{d}$  per  $b$ , simulque dividatur, erit  $\frac{c \times b}{d \times b} = \frac{c}{d}$ . Itaque generatim fractiones ad eundem denominatorem reducuntur, multiplicando numeratorem unius per denominatorem alterius & viceversa, scribendoque pro denominatore communi productum ex utroque denominatore. Evidens est hanc operationem eandem esse pro quolibet fractionum numero; multiplicentur scilicet numeratores singuli seorsim sumpti per denominatores singulos, proprio excepto denominatore, producta singula dabunt numeratores singulos quæsitos. Deinde denominatores singuli in seipsos ducantur, habebitur denominator communis quæsitus; ita fractiones  $\frac{a}{b}$ ,  $\frac{b}{c}$ ,  $\frac{c}{d}$  reducuntur ad  $\frac{acd}{bcd}$ ,  $\frac{bbd}{bcd}$ ,  $\frac{ccd}{bcd}$ . Patet rem perinde se habere in numeris quibuslibet fractis; ita fractiones  $\frac{3}{7}$ ,  $\frac{1}{4}$ ,  $\frac{4}{5}$ , *respective* æquales sunt fractionibus  $\frac{40}{60}$ ,  $\frac{45}{60}$ ,  $\frac{48}{60}$ .

III. Hinc facile adduntur & subtrahuntur fractiones, reducuntur scilicet ad denominatorem communem, sumatur numeratorum summa vel differentia, & subscribatur denominator communis. In 1.º casu habe-

habebitur additio, in altero autem subtractio. Ita

$$\frac{a}{b} + \frac{c}{d} + \frac{d}{c} = \frac{ade + bce + ddb}{bde}, \text{ \& } \frac{a}{b} - \frac{c}{d} = \frac{ad - bc}{bd}.$$

Similiter in numeris  $\frac{2}{3} + \frac{3}{4} = \frac{8 + 9}{12} = \frac{17}{12} = 1 \frac{5}{12}$ .

Sed  $\frac{4}{5} - \frac{3}{4} = \frac{16 - 15}{20} = \frac{1}{20}$ . Fractiones ex integris & fractis compositæ qualis est  $1 \frac{5}{12}$ , appellantur mixtæ.

Ex his autem statim intelligitur quomodo numeri integri & fracti simul addi possint, vel a se invicem subtrahi; integri ad fractos reducantur & ad denominatorem communem, atque operatio fiat ut ante. Quamvis autem additionis & subtractionis operationes ex dictis sint manifestæ, demonstrari tamen pos-

sunt hoc modo. Sint fractiones duæ  $\frac{a}{b}, \frac{c}{b}$  ad eundem

denominatorem reductæ, erit  $\frac{a}{b} + \frac{c}{b} = \frac{a + c}{b}$ , &  $\frac{a}{b}$

$-\frac{c}{b} = \frac{a - c}{b}$ . Etenim ponatur  $\frac{a}{b} = m$ , &  $\frac{c}{b} = n$ ,

erit, facta multiplicatione per  $b$ ,  $a = mb$ ,  $c = nb$ , &

$mb + nb = a + c$ , ac proinde  $m + n = \frac{a + c}{b}$ ; hoc

est  $\frac{a}{b} + \frac{c}{b} = \frac{a + c}{b}$ . Simili modo patet esse  $\frac{a}{b} - \frac{c}{b} =$

$m - n = \frac{a - c}{b}$ .

IV. Nulla reductione opus est ubi fractiones multiplicare & dividere oportet; in multiplicatione satis est numeratores & denominatores invicem ducere, habebitur numerator & denominator fractionis quæsitæ, quæ erit productum ex datis fractionibus emergens. Contra vero si fractio per aliam fractionem dividenda sit, numerator dividendæ per alterius de-

nomi-

numinatore est multiplicandus, & illius denominator in hujus numeratorem ducendus est. Ita productum ex  $\frac{a}{b}$  per  $\frac{c}{d} = \frac{ac}{bd}$ . Quotus autem ex  $\frac{a}{b}$  per  $\frac{c}{d}$

$= \frac{ad}{bc}$ . Etenim ponatur  $\frac{a}{b} = m$ , erit, ut ante  $a = bm$ .

Similiter ponatur  $\frac{c}{d} = n$ , erit  $c = dn$ . Jam demonstrandum superest esse  $\frac{ac}{bd} = mn$ , &  $\frac{ad}{bc} = \frac{m}{n}$ ; quod quidem facile patet, substituendo loco  $a$  &  $c$ , illorum valores  $bm$  &  $dn$ , erit enim in primo casu  $\frac{bdm}{bd} = mn$ ; in casu autem altero fiet  $\frac{bdm}{bdn} = \frac{m}{n}$ . Demon-

stratio generalis est ac proinde in numeris quibuslibet fractis eadem est operatio. Sic productum ex  $\frac{2}{6}$  in  $\frac{4}{8} = \frac{8}{48}$ . Sic quotus est  $\frac{3}{6}$  per  $\frac{2}{16} = \frac{48}{12} = 4$ . Manifesta quoque est operandi ratio, si numerus fractus per integrum multiplicari aut dividi debeat, considerari enim debet numerus integer tanquam fractio impropria, in qua denominator est unitas & reliqua peragenda ut ante. Quare patet in multiplicatione numerum integrum per numeratorem esse multiplicandum; contra autem in divisione per denominatorem. Nec mirum esse debet, si fractio per fractionem divisa præbeat numerum integrum; cum revera una fractio bis, ter, quater &c. in alia contineri possit. Itaque fractionis valor per multiplicationem minuitur, augetur per divisionem; quod quidem paradoxum videtur iis qui multiplicationis & divisionis naturam non satis attendunt.

Ex dictis etiam facile patet *fractiones fractionum* ad multiplicationem referri; *fractionem fractionis* appellant fractionis alicujus partem. Ita si sumantur  $\frac{2}{3}$ ,  
fra-



fractionis  $\frac{1}{2}$ , operatio illa ad divisionem non pertinet, sed ad multiplicationem. Etenim si sumenda proponeretur duntaxat pars  $\frac{1}{2}$  fractionis  $\frac{1}{2}$ , multiplicandus esset denominator per 3, habereturque  $\frac{1}{12}$ . At sumi non debet duntaxat pars tertia, duæ tertiæ partes sumendæ proponuntur, quare productum præcedens duplo majus fieri debet, hoc est, numerator multiplicandus est per 2. Eodem modo reduci debent aliæ quotlibet fractiones fractionum, multiplicando numeratores singulos & singulos denominatores.

Ex fractionum doctrina colligi possunt operationum arithmeticarum compendia plurima, si de quantitibus variæ speciei agatur. E. G. Quæritur quanti constiterint 35 mensuræ mercis alicujus, si mensuræ unius pretium sit 24 nummorum, & assium 15. Multiplicentur primo 35 per 24, erit productum 840. Quoad alteram multiplicationis partem, considerari potest esse  $15 = 10 + 5$ . Jam si asses 10 nummo æquivalerent, productum foret 35. At sunt pars decima duntaxat nummi unius, quare 35 dividi debet per 10. Simili modo operandum est in ultima multiplicationis parte, atque emerget productum ex nummis nummorumque partibus compositum. Ille operandi modus dicitur operatio per partes *aliquotas*. Partes autem aliquotæ quantitatis alicujus appellantur, quæ ipsam quantitatem accurate dividunt; secus autem partes *aliquantæ* vocantur. Cæterum exercitatio atque attentio multa docebunt, quæ fufius explicare superfluum esset.

V. Explicatis arithmeticæ operationibus in numeris fractis, jam superest ut communes, si quos habeant, fractionum divisores inquiramus. Si numeri nullum habeant communem divisorem præter unitatem, numeri illi inter se *primi* dicuntur, cujusmodi sunt 1, 5, 7, 11, 19; quos solas unitas metitur. At numeri *compositi* appellantur, quos præter unitatem alii

alii quoque numeri metiuntur; sic 12 componitur ex 2 & 6, itemque ex 3 & 4. Quare 2, 3, 4, 6 metiuntur 12, seu aliquoties sumpti 12 adæquant; illi autem numeri dicuntur *factores* ipsius numeri 12. Si igitur fractionis alicujus denominator sit numerus, compositus, & resolvi possit in alterius fractionis denominatorem, instituta divisione per numerum, qui sit etiam numeratoris divisor communis, jam licebit fractionem hanc ad minimos terminos deprimere, quod ita præstari potest. Dividatur major numerus per minorem; si nihil ex divisione supersit, jam minor numerus est maximus divisor communis. Si autem residuum aliquod fuerit, divisor datus per hoc residuum dividatur; & si divisio accurate fiat, primum residuum erit maximus divisor communis. Si autem divisio non sit accurata, sed alterum maneat residuum, per hoc secundum residuum dividatur primum; si autem nullum supersit tertium residuum, jam residuum secundum pro maximo divisore communi haberi debet; atque ita progrediendum, donec nihil supersit, atque ultimus divisor erit maxima, ut vocant, communis duorum numerorum mensura, qua inventa, fractio ex his duobus numeris composita ad minimos terminos reducitur. Exemplo sit fra-

ctio  $\frac{91}{294}$ . Dividatur 294 per 91, neglectoque quoto 3, residuum est 21. Rursus dividatur 91 per 21, iterumque neglecto quoto 4, residuum est 7. Tandem residuum primum 21 per alterum 7 dividatur; habetur quotus 3, & divisio est accurata. Quare numerus 7 est maximus communis divisor, per quem divisis numeratore & denominatore, fractio præcedens in hanc simpliciore abit  $\frac{13}{42} = \frac{91}{294}$ . Æquales autem esse fractiones illas, ex natura divisionis omnino patet. At si divisione instituta, ad unitatem tandem ultimum resi-

residuum perducatur, jam nulla est mensura communis præter unitatem. Eadem plane est operatio in quantitatibus litteralibus; hoc solum observandum est, nempe quantitates residuas per earum simplices divisores esse dividendas, & quantitates secundum ejusdem litteræ dignitatem semper esse ordinandas; invenienda sit maxima communis mensura quantitarum  $a^2 - b^2$ , &  $a^2 - 2ab + b^2$ . Dividatur  $a^2 - 2ab + b^2$  per  $a^2 - b^2$ , residuum fit  $-2ab + 2b^2$ , quod dividatur per  $-2b$ , ut reducat ad  $a - b$ . Iterum dividatur  $a^2 - b^2$  per  $a - b$ ; divisio accurate succedit, ac proinde maximus divisor communis est  $a - b$ .

Tota hujus operationis ratio pendet ex hoc divisionis principio; si nempe quantitas aliqua metiatur & divisorem & residuum, metiri quoque debet ipsum dividendum; est enim dividendus æqualis producto ex divisore in quotum, & ipsi residuo simul. Ita in exemplo præcedenti  $a - b$  metitur divisorem  $a^2 - b^2$  atque etiam residuum  $-2ab + 2b^2$ , quare metiri etiam debet summam  $a^2 - 2ab + b^2$ .

Porro ubi residuum fit nullum, seu dum accurate succedit divisio, evidens est divisorem haberi maximum; cum enim dividendus æqualis sit producto ex divisore in quotum & ipsi residuo simul; ubi residuum fit divisor accuratus, jam patet divisorem esse maximum; nulla enim quantitas habere potest divi-

forem seipsa majorem: ita fit  $\frac{A}{B} = Q + R$ ; Q exprimit quotum, R residuum, erit  $A = BQ + R$ . Jam dividatur B, per R, & divisio succedat accurate, patet esse R, maximum divisorem communem; dividit enim B, ex hypothesi ac proinde & BQ; præterea dividit R; fieri autem non potest ut R, habeat divisorem seipso majorem. Quamvis in numeris & quantitatibus litteralibus eadem sit operatio, ut tamen divisor per residuum possit dividi, sæpe oportet primos ter-

*Arith.*

C

minos

minos ita præparare, ut alter per alterum accurate dividi possit sine fractione. Id autem fit observando in novi divisoris primo termino quantitates, quæ non habentur in primo termino dividendi; si autem per eas dividi potest totus divisor, is totus dividatur; si minus, multiplicetur totus dividendus per illas quantitates, quæ non occurrunt in dividendo; atque ita faciendum in tota operationis serie, si necesse sit. Ita in præcedenti exemplo, ubi perventum est ad residuum  $-2ab + 2b^2$ , residuum illud dividi præscripsimus per  $-2b$ . Hæc autem præscripta præparatio tota pendet ex hoc principio; nempe quantitates duæ A, B communem retinebunt maximum divisorem, si multiplicetur, vel dividatur quantitas alterutra, puta A, per quantitatem, quæ nullum cum quantitate B communem divisorem habeat. Illud autem principium ex ipsa divisoris communis notione est omnino evidens.

IV. De fractionum communi divisore unum addendum est, quod deinde utilitatis maximæ esse debet. Si numeri duo *primi* fuerint, aut eorum alteruter duntaxat *primus* fuerit; evidens est ex ipsa numerorum primorum definitione, & ex communium divisorum regula, numeros illos nullum, præter unitatem, divisorem communem habere. Quare, fractio ex duobus numeris primis composita, puta  $\frac{a}{b}$  ad simpliciores terminos reduci non potest. Ergo productum, ac, ex duobus numeris primis ab ipso b diversis non potest accurate dividi per b. Nam ponatur  $\frac{ac}{b} = m$ , erit  $\frac{a}{b} = \frac{m}{c}$ ; quod fieri non potest; oporteret enim b & c habere divisorem communem, quod est contra hypothesim. Similiter ostenderetur, fractionem  $\frac{ac}{bd}$ , in qua d est numerus primus, ad simpliciores terminos reduci non potest.

pliciore expressionem reduci non posse, atque ita deinceps; nempe generatim productum ex numeris primis quibuscumque divisum per productum ex aliis quibuscumque numeris itidem primis ad simpliciores terminos reduci non potest. Quare si  $\frac{a}{b}$  sit fractio ad minimos terminos reducta, erunt quoque  $\frac{a^2}{b^2}$ ,  $\frac{a^3}{b^3}$ , & generatim  $\frac{a^n}{b^n}$  fractiones ad simplicissimos terminos reductæ; ac proinde fractio quælibet sive pura, sive mixta ad potentiam quamlibet evecta semper manet fractio.

*Scholium.* Præter fractiones in hoc capite explicatas considerari etiam debent fractiones, quæ *decimales* appellantur. Illæ scilicet fractiones pro denominatore habent unitatem cum tot sequentibus cyphris, quot sunt numeri in numeratore; atque eam ob causam non scribitur denominator, sed numerator duntaxat, cujus numeris præfixa est virgula, alii punctum præfigunt; quod fit, ut numerator a numeris integris distinguatur. Ita ad exprimendam fractionem  $19\frac{4}{10}$  scribi solet 19, 4. Ad exprimendam fractionem  $19\frac{4}{100}$  scribitur 19, 04; cyphra numero 4 præfixa indicat denominatorem esse 100;  $19\frac{4}{1000}$  ita exprimitur 19, 004. Ex fractionum decimalium significatione patet, primum numerum post virgulam designare decadas, secundum centenarios, & ita deinceps per decadas semper progrediendo; sic  $4, 217 = 4 + \frac{2}{10} + \frac{1}{100} + \frac{7}{1000}$ . Fractionum decimalium utilitas maxima est ad obtinendum quotum proxime verum, si divisio accurate fieri non possit. E. G. Si dividendus proponatur numerus 147475 per 362, quotus invenitur 407 cum residuo 141, cui addatur 0,

tur 0, dividaturque 1410 per 362, quotus erit 3 cum novo residuo 324, cui iterum addatur 0, dividaturque 3240 per 362, quotus prodit 8 cum residuo 344, cui addatur 0; in nova tandem divisione quotus emergit 9; quod autem remanet 182, iterum dividi posset; sed operationis ordinem exhibuisse satis sit. Quare quotus est 407, 389, quem quidem accuratiorem esse evidens est.

Eadem methodo fractio vulgaris in fractionem decimalem reducitur. Si fractio  $\frac{3}{4}$  in fractionem decimalem reducenda proponatur, numeratori 3 addatur 0, dividaturque 30 per 4, quotus est 7 cum residuo 2, cui addatur 0, rursusque 20 per 4 dividatur quotus est 5 sine ullo residuo; quare  $\frac{3}{4} = 0,75$ . Et requidem ipsa, cum sit 25 quarta pars numeri 100, numerus 75 erit  $\frac{1}{4}$  ejusdem numeri 100. Hinc generatim patet, quo artificio fractio vulgaris ad decimalem reduci possit; multiplicetur nempe numerator fractionis datæ per 100, vel 1000 &c., productum illud divisum per denominatorem erit numerator fractionis decimalis, cujus denominator est 100, vel 1000 &c. Sæpe tamen contingit fractiones ad decimales accurate reduci non posse, etiamsi divisionum residuis plures utcumque cyphræ addantur. Sit

$\frac{p}{q}$  fractio vulgaris reducenda ad fractionem decimalem  $\frac{r}{10^n}$ , in qua  $n$ , exprimit cyphrarum numerum; erit  $r = \frac{p \times 10^n}{q}$ . Sed  $10^n = 2^n 5^n$ , ac proinde  $r = \frac{p \times 2^n 5^n}{q}$ . Ut autem  $r$  fiat numerus integer, oportet ut  $q$ , sit æqualis potestati alicui numeri 2, vel 5, vel producti  $2 \times 5$ , vel etiam alicui potestati numeri 2, per aliquam potestatem numeri 5, quas tamen potestates minores esse oportet, quam  $n$ , est enim  $\frac{p}{q}$ , fractio

ctio ad minimos terminos reducenda (ex hyp.) ideoque  $p$ ,  $q$ , nullum habent divisorem communem; in quolibet alio casu, fractio  $\frac{p \times 10^n}{q}$  nunquam fieri poterit numerus integer  $r$ . At quo major erit numerus  $n$ , hoc est, quo plures erunt cyphræ in denominatore fractionis, eo propius  $\frac{r}{10^n}$  accedet ad valorem fractionis  $\frac{p}{q}$ , ita ut error sit minor quam  $\frac{1}{10^n}$ . Etenim si dividatur  $p \times 10^n$  per  $q$ , quotus  $r$ , erit iusto minor; si vero augeatur unitate, fiet iusto major. Quare  $\frac{r}{10^n}$  minor est quam  $\frac{p}{q}$  &  $\frac{r+1}{10^n}$  major. Hinc patet utilissimum esse fractionum decimalium usum, cum earum ope fractionum valor accuratus quam proxime haberi possit.

Quatuor Arithmeticæ operationes in fractionibus decimalibus eadem omnino ratione qua in numeris integris tractantur; sed habenda est maxime ratio virgulæ qua fractiones ab integris dirimuntur. Hæc virgula in eadem linea verticali jacere debet, si plures quantitates vel in unam summam colligendæ sunt vel ab invicem subtrahendæ. Si vero multiplicatio instituitur, eum locum in producto occupare debet virgula ut totidem post se notas relinquat quot erant in utraque fractione; tandem si divisio peragitur, dividendi numeri decimales notæ probe observandæ sunt; nam in quoto & divisore simul totidem esse debent post virgulam notæ quot erant in dividendo. Quatuor illarum operationum exempla exhibebimus.

*Additio.*

$$\begin{array}{r} 23, 304 \\ 3, 9567 \\ \hline 149, 86 \\ \hline 177, 1207 \end{array}$$

*Subtractio.*

$$\begin{array}{r} 49, 638 \\ 17, 16 \\ \hline 32, 478 \end{array}$$

C 3

*Mul-*

<i>Multiplicatio.</i>	<i>Divisio.</i>
$  \begin{array}{r}  12, 35 \\  4, 2 \\  \hline  24, 70 \\  49, 40 \\  \hline  51, 470  \end{array}  $	$  \begin{array}{r}  8, 445 \\  \hline  3, 22 \\  6, 44 \\  \hline  2, 005 \\  1, 932 \\  \hline  73  \end{array}  = 2, 6  $

Unum autem in divisione notandum est; si nempe in divisore plures occurrant notæ decimales quam in dividendo, tunc decimalibus dividendi adjunges quot volueris cyphas, ita ut tamen notæ decimales in dividendo plures sint, quam in divisore, ut nempe in quoto aliquæ decimales notæ haberi possint. Tota operationum illarum ratio statim manifesta fiet, si fractiones decimales vulgari modo exprimantur. Ita

in exemplo divisionis præcedentis  $8, 44 = \frac{8044}{1000} & 3, 22 = \frac{322}{100}$ . Itaque dividi debet fractio prior per se-

cundam; evidens autem est cyphram unam duntaxat in quoto adesse & hinc facile intelligetur cyphrarum numerum in quoto esse semper æqualem differentiæ cyphrarum in divisore & dividendo. In aliis tribus regulis facilius patet operandi ratio.

## C A P U T V.

### *De radicum extractione.*

I. **E**Xplicavimus jam in capite 2.<sup>o</sup> quid sit *potestas* formatio. Quantitatis alicujus *potestas prima*, vel *primus gradus* est quantitas ipsa solitarie spectata. Ita prima potestas ipsius 2, est 2. Productum ex quantitate aliqua in seipsam dicitur *potestas secunda*, vel etiam *quadratum*, ita 2<sup>2</sup> est quadratum. Ipsa autem quantitas dicitur *radix* quæ vocatur *quadrata*,



*drata* ; si potestas sit secunda vel quadratum . Si quadratum in ipsam quantitatem ducatur , productum dicitur *potestas tertia* vel *cubus* , ita  $a^3$  est cubus ipsius  $a$  ; quantitas autem dicitur *radix cubica* . Et generatim si quantitas evehatur ad potestatem cujus index est  $n$  , habebitur potestas gradus  $n$  . In hoc autem capite præsertim considerabimus radicum quadratæ & cubicæ extractionem ; quod ut clare fiat , ipsam quadrati & cubi formationem primum investigabimus , atque deinde ad operationes arithmeticas recto ordine progrediemur . Sit quantitas litteralis ,  $a + b$  , ad quadratum evehenda , prodit  $a^2 + 2ab + bb$  . Jam vero quadrati hujus formationem , seu partes singulas expendamus . Quadratum binomii  $a + b$  continet 1.<sup>o</sup> Quadratum  $aa$  , primæ partis  $a$  . 2.<sup>o</sup> Productum  $2ab$  , ex duplo primæ partis in secundam . 3.<sup>o</sup> Quadratum partis secundæ nempe  $bb$  . Simili modo si multiplicetur  $a + b + c$  , per  $a + b + c$  , orietur quadratum  $a^2 + 2ab + b^2 + 2a + 2b + 2c + c^2$  . In hoc quadrato rursus considerandæ sunt partes singulæ ; continent 1.<sup>o</sup> Quadratum  $a^2 + 2ab + b^2$  ex duobus primis terminis  $a + b$  . 2.<sup>o</sup> Productum ex duplo duorum priorum terminorum in tertium terminum  $= 2a + 2b + 2c$  . Tandem continet quadratum  $c^2$  , tertii termini . Simili modo progredi licet pro alia qualibet quantitate ex pluribus quam tribus terminis composita ; tales vero quantitates magis compositæ appellari solent *polynomia* .

Eadem omnino ratione intelligitur cubi formatio . Binomium  $a + b$  ad 3.<sup>am</sup> potestatem evehatur , multiplicetur nempe quadratum  $a^2 + 2ab + b^2$  , per  $a + b$  , prodit cubus  $a^3 + 3a^2b + 3ab^2 + b^3$  . Cubi hujus partes singulæ sunt 1.<sup>o</sup> Cubus primi termini , nempe  $a^3$  . 2.<sup>o</sup> Productum ex quadrato  $a^2$  primi termini in triplum terminum secundum , scilicet  $3a^2b$  . 3.<sup>o</sup> Productum ex primo termino  $a$  , in triplum quadratum secundi termini , nempe  $3ab^2$  . 4.<sup>o</sup> Cubus secundi termini scilicet  $b^3$  .

C 4

Si.

Simili modo operandum est pro trinomio  $a + b + c$  invenieturque cubus  $a^3 + 3a^2b + 3ab^2 + b^3 + 3a^2c + 6abc + 3b^2c + 3ac^2 + 3bc^2 + c^3$ . In hoc autem cubo præter duorum primorum terminorum cubum nempe  $a^3 + 3ab + 3ab^2 + b^3$ , diligenter considerari debent aliæ partes. 1.<sup>o</sup> Productum ex triplo quadrato duorum primorum terminorum in tertium terminum  $c$ , nempe  $3a^2c + 6abc + 3b^2c = a^2 + 2ab + bb \times 3 \times c$ . 2.<sup>o</sup> Tripla summa duorum primorum terminorum per tertii termini quadratum multiplicata, scilicet  $+ 3ac^2 + 3bc^2 = a + b \times 3 \times c^2$ . 3.<sup>o</sup> Tandem tertii termini cubus, nempe  $c^3$ .

II. Ex potestatum compositione facile colligitur illarum resolutio, siue radicum extractio. Sit quantitas literalis  $x^2 - ax + \frac{1}{4}a^2$  ex qua extrahenda sit radix quadrata. Sumatur primi termini radix quadrata  $x$ , cujus quadrato subtracto remanent termini duo  $-ax + \frac{1}{4}a^2$ . Deinde sumatur duplum ipsius  $x$  per quod dividatur secundus terminus  $-ax$ , quotus fit  $-\frac{1}{2}a$ , qui multiplicetur per  $x$ . Tandem fiat quadratum quoti  $-\frac{1}{2}a$ , atque producta illa ex residuo  $-ax + \frac{1}{4}a^2$  subtrahantur, nihil remanet. Quare radix quadrata est  $x - \frac{1}{2}a$ . Tota operatio patet ex numero præcedenti. En typus calculi. Cæterum si radix plures habuerit quam duos terminos, jam duo primi termini post primam operationem velut unus terminus considerari debent & reliqua peragenda ut ante, quod quidem patet ex demonstratis.

$$\begin{array}{r}
 x^2 - ax + \frac{1}{4}a^2 \quad (x - \frac{1}{2}a \\
 x^2 \\
 \hline
 2x - \frac{1}{2}a \quad -ax + \frac{1}{4}a^2 \\
 \times - \frac{1}{2}a \quad -ax + \frac{1}{4}a^2 \\
 \hline
 0 \quad 0
 \end{array}$$

Proponatur extrahenda radix cubica ex quantitate literali  $c^3 - 3cy^2 + 3cy^2 - y^3$ . Ex primo termino extrahatur radix cubica quæ est  $c$ , cujus cubus  $c^3$  aufe-

auferatur, remanent terminus  $-3c^2y + 3cy^2 - y^3$ . Jam quia notum est secundum terminum multiplicari per triplum quadratum primi, sumatur terminus  $c$ , triplum quadratum per quod dividatur secundus terminus  $-3c^2y$ , prodit quotus  $-y$ , qui erit secunda pars radice. Quia vero cubus quilibet continet cubum ex duobus primis terminis radice, sumatur cubus terminorum  $c - y$ , deinde a reliquis terminis auferatur, quo facto nihil remanet, ac proinde radix accurata est  $c - y$ . Totus calculi typus ex præcedenti facile intelligitur.

III. Ex demonstrationibus præcedentibus facile patet radicum extractio in quantitatibus numericis. Extrahenda sit radix quadrata,

ut in præsentis exemplo. Numerum datum in classes divide quarum singulæ duas notas contineant, initio a postremis facto; nihil autem refert siue unica tantum nota constet prima classis siue notis duabus. Quære radicem veram aut proxime veram numeri 38, quæ in nostro casu est 6. Scribe 6 loco radice & ejus quadratum 36 aufer ex 38. Residuo 2 adijunge notas classis proxime sequentis, & hujus novi numeri postrema nota neglecta, quære quoties duplum radice hætenus inventæ siue 12 contineatur

*Exemplum.*

38,94,89 | 624,09  
36

294

122

244

5089

1244

4976

11300

12480

0

1130000

124809

1122281

.6719, &c.

in 29, inveniatur 2, scribe ergo 2 in radice, & ex 294 aufer productum ex 2 in 122 nempe 244, remanet 50; huic autem residuo adnecte notas classis proxime sequentis. Rursus contempta novi numeri postrema nota, quære quoties duplum radice hætenus inven-

inven-

inventæ scilicet 124 contineatur in 508, quotus erit 4, iterumque ex numero superiori aufer productum, ex 1244 in 4, nempe 4976, residuum est 113. Quare radix proxime vera numeri propositi est 624; numerus autem ille foret perfecte quadratus si numero 113 minueretur. Quamvis autem radix quadrata non sit accurate vera, ad eam tamen fractionum decimalium ope pro arbitrio licet accedere. Residuo 113 addantur cyphræ duæ, ut hic factum vides; & habeatur numerus 624 tanquam prima pars radiceus cuius duplum sumatur nempe 1248, dividaturque 11300 per 1248, quotus est 9; quare scribe 9, in radice, & multiplica 12480 per 9, productumque 0, aufer ex 11300, remanet 11300. Huic residuo iterum addantur cyphræ duæ; sumaturque duplum radiceus nempe 12480 per quod dividatur 113000, scribaturque quotus 9, in radice per quem multiplicetur numerus 124809, productumque 1123281 auferatur ex 1130000, residuum sit 6719. Operatio rursus continuari posset, sed satis patet methodus cuius ope radicem proxime veram obtinere licet & ad eam magis ac magis accedere. Tota operationis ratio manifesta est ex fractionum decimalium natura.

In hujus operationis serie idem notare oportet quod in divisione observatum est; nempe si post adjectas alicui residuo notas duas classis proxime sequentis, duplum radiceus inventæ non contineatur in numero, qui per illud duplum dividendus est; postrema hujus dividendi nota neglecta, cyphra scribenda est in radice, & classis proximæ notis duabus demissis, operatio continuanda. Evidens autem est hanc operationem esse divisioni simillimam in qua radix sit quotus, divisor vero sit duplum radiceus postremo inventæ auctum nota quæ deinceps investigatur. Hoc unum interest quod in divisione divisor semper est idem, hic autem semper augetur; in divisione totus divisor cognoscitur, hic autem ignota est novi divisoris nota, quæ

quæ inquiretur ; atque id in causa est cur in hac divisione instituenda postrema dividendæ quantitatis nota prætereatur . Si contingeret divisorem esse majorem . V. G. in præsentī exemplo si productum ex 2 , in 122 subtrahi non posset ex 294 , jam in radice scribendus esset numerus proxime minor & tota operatio esset reformanda . Sed in casu nostro id minime contingit ; quare nulla correctione opus est . Unum tandem superest notandum cur nempe post duplum radicis inventæ scribatur radix nova & deinde numerus totus per radicem novam multiplicetur . Ita in præsentī exemplo post duplum primæ radicis 12 , scribitur 2 , totusque numerus 122 , multiplicatur per novam radicem 2 ; operationis ratio manifesta est ; cum enim numerus 2 , in radice duas exprimat decadas , hujus numeri quadratum versus sinistram promoveri debet , ut patet ex notarum arithmeticarum significatione .

Ad radicis cubicæ extractionem jam veniendum est . Pro radice cubica methodus est admodum similis & iisdem innititur principiis . Extrahenda sit radix cubica , ut in præsentī exemplo . Diviso numero in classes per ternas notas incipiendo a postremis notis , prima classis , quæ poterat continere vel tres notas , vel duas , in hoc casu unicam continet . Quæritur radix cubica numeri 5 , proxime minor quæ est 1 . Hujus cubus 1 , subtrahatur a prima classe 5 , residuum est 4 , cui adnectatur classis sequens , ut hic factum vi-

*Exemplum .*

5 , 305 , 472 | 174 , 4  
1

4305

300

2100

1470

343

3913

392472

86700

346800

8160

64

550324

37448000

des .

des. Deinde ita dicendum, prima pars radicis 1, pro decade haberi debet si conferatur cum secunda parte. Sumatur itaque numeri 10, quadratum 100 & per illius triplum 300, dividatur 4305, inveniatur quotus 7; quilibet enim alius foret iusto major, si 7 excederet, ut patet operationem experiendo. Jam multiplicetur 300 per 7, habetur productum 2100. Dic præterea  $7 \times 7 = 49$ , &  $49 \times 10 = 490$ , postea  $490 \times 3 = 1470$ , quod scribe infra 2100. Tandem  $7 \times 7 \times 7 = 343$ , quod scribi debet infra 1470. Addantur numeri 2100, 1470 & 343 & summa 3913 auferatur ex numero 4305, residuum est 392. Demittatur classis tertia 472 & duæ primæ partes radicis velut pars unica considerentur. Hæc autem pars quæ est 17, æquivalet 170 si conferatur cum tertia parte quæsitæ. Sumatur hujus numeri 170 triplum quadratum 86700, per quod dividatur pars cubi reliqua 392472, prodit quotus 4, quem scribe in radice; multiplicetur divisor 86700 per 4, productum sit 346800 quod infra scribitur. Dicas deinde  $4 \times 4 = 16$ ;  $16 \times 170 \times 3 = 8160$ , quod productum scribe infra 346800, atque infra scribi debet cubus ipsius 4 nempe 64. Addantur tres illæ quantitates quarum summa 355024 ex reliqua cubi parte subtrahatur, residuum sit 37448. Quare numerus propositus non est cubus perfectus; sed ad radicem proxime veram licebit accedere si residuo addantur tres cyphræ, ut in præsentī exemplo factum est; & eadem operatio deinde pro alio quolibet fractionum decimalium numero iteretur, magis ac magis accurata fiet radix inventa. Illud autem observandum est diligenter inventas radicis partes velut partem unicam tractandas esse, si pars alia investigari debeat.

In extractione radicis quadratæ & cubicæ, diximus tot esse radicis partes quot sunt diversæ numeri propositi partes. Id vero demonstratione indiget. Quantitas quælibet ex duobus constans numeris unicam

cam duntaxat in radice partem habere potest; consideretur numerus 99, omnium qui duobus consent notis maximus. Deinde radicem ex duabus notis compositam omnium minimam 10, consideremus; quadratum erit 100 quod numero 99 majus est, ac proinde radix duas notas continere non potest. Similiter quantitas omnium minima quæ tres habeat notas est 100, cujus radix quadrata est 10 quæ proinde duas continet notas; at quantitas omnium maxima quæ tres habeat notas est 999, cujus radix tres notas habere non potest; nam numerus omnium minimus tribus constans notis est 100, cujus quadratum fit 10000 quod quidem numerum 999 longe excedit. Eadem ratione ad aliam quamlibet numerorum seriem progrediendo facile intelligitur præscripta numerorum divisio in extrahenda radice quadrata & huic numerorum divisioni partium numerum in radice respondere evidens est. Idem simili ratiocinatione constat pro radice cubica. Manifestum est extractionem radicum simili ratione perfici in numeris fractis, extrahendo scilicet radicem propositam ex numeratore & ex denominatore. In qualibet autem radicum extractione, operationis rite peractæ facile habetur argumentum. Si radix sit quadrata, hæc in se ipsam ducatur productoque addatur residuum, si ali-quod fuerit, facta operatione restitui debet ipse numerus propositus. Similiter radix cubica ad cubum evehatur; id vero statim patet ex ipsa earumdem operationum natura.

IV. Sæpe ab extrahenda radice superfedemus ubi veram invenire non licet, & quantitati propositæ præfigitur signum  $\sqrt{\quad}$  quod *radicale* appellant. Sic  $\sqrt{3}$  significat radicem quadratam numeri 3;  $\sqrt[3]{10}$ , denotat radicem cubicam denarii; & hi sunt numeri quos arithmetici vocant numeros *furdos*, sive *irrationales*, aut etiam *incommensurabiles*. Quantitatibus litteralibus

bus idem signum præfigitur: ita  $\sqrt[3]{ab}$ ,  $\sqrt[3]{abc}$ , significant radicem quadratam ipsius  $ab$ , & radicem cubicam quantitatis  $abc$ . Sed commoditatis ergo radix secunda vel quadrata exprimi solet per  $\frac{1}{2}$  radix cubica per  $\frac{1}{3}$ , ita  $a^{\frac{1}{2}}$ ,  $a^{\frac{1}{3}}$ ,  $a^{\frac{1}{m}}$ , significat radicem quadratam, cubicam, & radicem quamlibet indeterminatam  $m$ . Ut autem clara talium expressio-  
num notio habeatur, meminisse oportet quæ antea de exponentibus breviter dicta sunt. Ponamus  $a = b^2$ , erit  $a^{\frac{1}{2}} = (bb)^{\frac{1}{2}}$ . Præterea in quantitate  $(bb)^3$  exponens 3, indicat quantitatem  $bb$ , ter scribendam esse, ac proinde  $(bb)^3 = b^6$ . Igitur eadem ratione in quantitate  $(bb)^{\frac{1}{2}}$ , exponens  $\frac{1}{2}$  designat litteram  $b$ , dimidio minus sumendam esse quam in  $bb$ , ac proinde semel tantum, quare  $(bb)^{\frac{1}{2}} = b = a^{\frac{1}{2}} = \sqrt{a}$ . Idem patet de aliis quibuscumque exponentibus. Res autem tota magis ac magis illustrabitur, explicatis quatuor arithmeticæ operationibus in quantitatibus surdis.

Quantitates surdæ adduntur vel subtrahuntur facillime, si ejusdem sint exponentis & eandem habeant sub signo radicali quantitatem. Si autem res non ita se habeat, sæpiissime contingit quantitates surdas ejusdem ordinis ad eandem quantitatem sub signo radicali posse revocari. Ita si addi vel subtrahi debeant quantitates radicales  $\sqrt{48abb}$ , &  $b\sqrt{75a}$ , prima per reductionem mutatur in  $4b\sqrt{3a}$ , altera autem in  $5b\sqrt{3a}$ . Quare in 1.º casu habebitur  $9b\sqrt{3a}$ , in altero autem  $b\sqrt{3a}$ . Totum reductionis artificium in eo consistit ut numeri sub signo radicali positi quarantur divisores, inter quos ille eligatur, si quis fuerit, ex quo liceat radicem extrahere ejusdem ordinis, cujus est surda quantitas. Si aliquem ejusmodi divisorem invenias, ejus radicem præfige signo radicali quo inclu-



cludatur tantummodo alter dati numeri coefficientens. Si autem nullus talis divisor inveniri possit, jam quantitates radicales in additione signo + connectendæ, in subtractione autem signo — separandæ.

Demum multiplicantur & dividuntur quantitates irrationales non secus ac rationales, & producto vel quoto idem quod prius erat signum radicale præfigitur, quod quidem in utraque quantitate sit ejusdem ordinis. Ita si multiplicari debeant  $\sqrt{ab} \times \sqrt{ac}$ , productum erit  $\sqrt{aabc} = a\sqrt{bc}$ . Ita si dividi debeat  $ac\sqrt{bc}$

per  $a\sqrt{b}$  erit  $\frac{a\sqrt{bc}}{a\sqrt{b}} = \sqrt{c}$ . Patet autem in multiplicatione delendum esse signum radicale, si æquales fuerint

quantitates signo inclusæ; sic  $\sqrt{a^3c} \times \sqrt{a^3c} = a^3c$ . Quoniam sæpe contingit quantitates radicales ad eundem exponentem reducendas esse, observandum est id facile præstari posse ex hæcenus demonstratis; ita

quantitates duæ radicales  $\sqrt[n]{\frac{a}{b}}$ , &  $\sqrt[m]{\frac{c}{d}}$  mutantur in  $\sqrt[nm]{\frac{a^m}{b^m}}$ , &  $\sqrt[nm]{\frac{c^n}{d^n}}$ , quod patet; nam quantitates illæ ad

potestates  $n, m$ , respective evehuntur & simul depressuntur. Probe autem notandum est discrimen inter quantitarum multiplicationem illarumque potestatem. Ita si multiplicari debeat  $a^3$  per  $a^2$  productum fit  $a^3 + 2 = a^5$ . Si autem quantitas  $a^3$  ad secundam potestatem evehi debeat, habetur  $a^3 \times 2 = a^6$ , & generatim quantitas  $a^m$  ad potestatem  $n$  evecta fit  $a^{mn}$ . Quare multiplicatio fit per *indicis* additionem, potestas autem per multiplicationem. Contraria ratione divisio fit per *exponentis* subtractionem, & radi-

cis extractio per exponentis divisionem. Ita  $\frac{a^6}{a^2} = a^{6-2} = a^4$ . At si ex  $a^6$  extrahenda sit radix quadrata, erit  $a^{\frac{6}{2}} = a^3$ , & generatim pro divisione  $\frac{a^m}{a^n} = a^{m-n}$ ; at

at pro radicis  $n$  extractione habetur  $a^{\frac{m}{n}}$ . Si quantitates sint simplices, brevius per exponentes, quam per signum radicale exprimuntur.

V. Quantitates irrationales sive incommensurabiles sæpe in hoc capite nominavimus; revera autem tales dari quantitates evidens est ex capite præcedenti in quo demonstravimus fractionem sive puram sive mixtam in fractionem semper abire, etiamsi ad potestatem quamlibet evehatur. Ergo numerus integer cujus radix quadrata, cubica &c. non est numerus integer, nullam fractionem nequidem mixtam pro radice habere potest, ac proinde hujus numeri radix est incommensurabilis. Itaque numeri incommensurabiles non sunt numeri proprie dicti. Et requidem ipsa, cum per numerum nihil aliud intelligamus quam rationem quantitatis cujusvis ad aliam ejusdem generis quantitatem, in omni ratione vel numero existere necessum est partem aliquotam quæ sit utrique quantitati communis; at quantitates inter se incommensurabiles tali carent mensura: ita  $\sqrt{2}$  non est numerus proprie dictus; talis quantitas proprie non existit eaque inveniri non potest. Imo fractiones proprie non dicuntur numeri nisi quatenus ad numeros integros revocantur. Et quidem fractio  $\frac{1}{4}$  quæ exprimit quartam partem totius alicujus ter sumptam, ipsa ad numeros integros refertur; hæc enim quarta pars velut alia unitas consideratur, ut antea observavimus. Totam incommensurabilium doctrinam utilissimam quidem, alio arithmetico exemplo illustrabimus. Si ex numero 7 extrahenda proponatur radix quadrata, hæc invenitur minor quam 3; cum  $3 \times 3 = 9$  & major quam 2, cum sit  $2 \times 2 = 4$ . Igitur radix quadrata numeri 7 continetur intra limites 2 & 3, ac proinde si posset determinari, ea foret æqualis numero 2, & alicui numero fracto; sed fieri non potest ut fractio mixta per seipsam multiplicata producat

eat numerum integrum, ut antea demonstravimus. Ergo numerus 7 pro radice habere non potest neque numerum integrum neque fractum. Idem patet de alio quolibet numero integro cujus radix non est numerus integer.

*Schol.* Secundæ duntaxat & tertiæ potestatis compositionem ac resolutionem in præsentî capite explicavimus; at rem generatim & breviter, quantum licet, pro alia qualibet dignitate considerabimus. Ex hæcenus explicatis manifestum est eodem modo formari altiores cujuslibet gradus potestates. Ita ad formandam quarti gradus potestatem multiplicari debet cubus per suam radicem & sic deinceps. Jam in singulis terminis exponentes & coefficientes diligenter observemus. In potestatis cujuslibet compositione, primus terminus  $a$ , binomii cujuslibet,  $a + b$ , evenitur ad potestatem quæsitam V. G.  $a^2$ , si potestas secunda fuerit: in aliis sequentibus terminis exponentis quantitatis  $a$ , per unitatem decrescit & in ultimo termino evanescit. Ita in secunda potestate habetur  $2ab + b^2$ . Contra autem potestas termini  $b$ , in primo termino non reperitur, sed in 2.<sup>o</sup> termino illius exponentis est unitas, in 3.<sup>o</sup> termino est 2, & ita crescit per gradus, donec in ultimo termino exponenti potestatis quæsitæ æqualis fiat. Quare iisdem gradibus, quibus decrescunt exponentes ipsius  $a$ , crescunt exponentes quantitatis  $b$ , atque in utraque quantitate exponentium summa semper eadem est, & potestatis quæsitæ exponenti æqualis; quod quidem in potestate qualibet experiri licet. Ita potestas 6.<sup>a</sup> binomii  $a + b$ , invenitur  $a^6 + 6a^5b + 15a^4b^2 + 20a^3b^3 + 15a^2b^4 + 6ab^5 + b^6$ , in qua observare est exponentes quantitatis  $a$ , decrescere secundum seriem numerorum 6, 5, 4, 3, 2, 1, 0; contrario autem ordine crescere exponentes quantitatis  $b$ , nempe hoc modo 0, 1, 2, 3, 4, 5, 6; summaque exponentium in utroque termino est semper 6. Jam superest ut fin-

*Arith.*

D

gulo-

gulorum terminorum coefficientes observemus. Dividatur coefficientis præcedentis termini per exponentem ipsius  $b$  in termino dato, & quotum multiplicetur per exponentem ipsius  $a$ , in eodem termino, auctum unitate. Ita in præcedenti exemplo ubi termini sunt,  $a^6$ ,  $a^5b$ ,  $a^4b^2$ ,  $a^3b^3$ ,  $a^2b^4$ ,  $ab^5$ ,  $b^6$ , coefficientis primi termini est unitas, coefficientis secundi est  $\frac{1}{1} \times 5 + 1 = 6$ , tertii termini coefficientis  $\frac{6}{1} \times 4 + 1 = 3 \times 5 = 15$ . Coefficientis termini quarti est  $\frac{15}{3} \times 3 + 1 = 5 \times 4 = 20$ . Et simili modo inveniuntur coefficientes alii 15, 6, 1.

Ex hac constanti exponentium & coefficientium serie, generatim exhiberi potest binomium  $a + b$  ad potestatem quamlibet  $m$ , evehctum. Ita terminorum series se habebit, non consideratis coefficientibus,  $a^m$ ,  $a^{m-1}b$ ,  $a^{m-2}b^2$ ,  $a^{m-3}b^3$ ,  $a^{m-4}b^4$ , quæ series continuari debet, donec exponents quantitatis  $b$ , evadat  $m$ . Coefficientes autem ex præcedenti regula,

hoc ordine progredientur 1,  $m$ ,  $m \times \frac{m-1}{2}$ ,  $m \times \frac{m-1}{2} \times \frac{m-2}{3}$ ,  $\frac{m \times m-1}{2} \times \frac{m-2}{3} \times \frac{m-3}{4}$ , & ita deinceps.

Quare hæc habetur generalis formula  $x + a^m = x^m + \frac{m}{1} x^{m-1} a + \frac{m}{1} \times \frac{m-1}{2} x^{m-2} a^2 + \frac{m}{1} \times \frac{m-1}{2} \times \frac{m-2}{3} x^{m-3} a^3$  &c. Simili modo invenitur formula pro bino-

mio  $a - b$ , hoc solum discrimine quod terminus debeat esse negativus, si exponents quantitatis  $b$ , sit numerus impar. Ita in cubo  $a^3 - 3a^2b + 3ab^2 - b^3$ , secundus & quartus termini sunt negativi; ratio autem est evidens, cum negativa existente quantitate, multiplicationum numerus impar productum efficere debeat negativum. Formula eadem omnino ratione componi posset pro trinomio  $a + b + c$ , ponendo  $a + b = a$ , & ita deinceps pro polynomio quolibet.

Præ-

Præcedens formula quæ potestatum compositionem exhibet, earum quoque resolutionem repræsentare potest. Ita radix quadrata binomii  $a + b$ , nihil est aliud quam potestas binomii  $a + b$ , cujus exponens  $\frac{1}{2}$ .

Quare ponatur in formula præcedenti  $m = \frac{1}{2}$ , habebiturque  $\overline{a + b}^{\frac{1}{2}} = a^{\frac{1}{2}} \left( 1 + \frac{b}{2a} - \frac{b^2}{8a^2} + \frac{1b^3}{16a^3} \&c \right)$

Simili modo si extrahenda sit radix quinta ex  $a + b$

habebitur  $\overline{a + b}^{\frac{1}{5}} = a^{\frac{1}{5}} + \frac{1}{5} a^{\frac{4}{5}} b - \frac{1 \times 4}{2 \times 25} a^{\frac{3}{5}} b^2$

$b^2 \&c. = a^{\frac{1}{5}} \times 1 + \frac{b}{5a} - \frac{2bb}{25a^2} + \&c.$  Itaque ad ra-

dicem proxime veram accedere possumus per series infinitas, dummodo series illæ sint *convergentes*, hoc est, si termini perpetuo decreſcant.

## CAPUT VI.

*De proportionibus.*

I. IN memoriam revocanda est explicata cap. 1.<sup>o</sup> rationis & proportionis definitio. *Ratio* dicitur ea duarum quantitatum *habitus*, quæ ad se invicem referuntur; *geometrica* dicitur si in ea relatione consideremus quomodo quantitas una alteram contineat; *arithmetica* vocatur, si excessum tantummodo unius supra aliam spectemus. In omni ratione quantitas quæ ad aliam refertur, *antecedens* dicitur, ea vero ad quam refertur, *consequens* appellatur. Ratio geometrica dicitur *dupla*, *trippla*, *decupla* &c., si antecedens bis, ter, decies &c. consequentem continet; contra vero *subdupla*, *subtrippla*, *subdecupla* &c., si bis, ter, decies &c. antecedens in consequenti continetur. *Exponens* rationis geometricæ dicitur quotus ex antecedenti per consequentem diviso; exponens vero rationis arithmeticæ est differentia consequentis ab antecedenti. Hinc ratio geometrica ad instar fractionis scribitur,

tur, arithmetica ad instar subtractionis. Duarum rationum æqualitas *proportio* dicitur, *geometrica* vel *arithmetica* pro rationum ipsarum qualitate; igitur in omni proportionem quatuor quantitates esse debent, & *prima ad secundam esse* dicitur *ut tertia ad quartam*. Si vero eadem quantitas bis assumatur, ita ut primæ rationis consequens idem sit cum antecedente secundæ, proportio dicitur *continua*. Ita exprimi solet proportio geometrica  $a, b :: c, d$ , vel  $a : b = c : d$ , vel  $\frac{a}{b} = \frac{c}{d}$ , arithmetica vero  $a - b \div c - d$ .

II. Si inter duas primas quantitates eadem sit differentia quæ inter duas ultimas, jam quantitates illæ sunt *arithmetice proportionales*, ut patet ex præcedenti definitione, quare arithmetice proportionales sunt numeri 3, 7, 12, 16; atque etiam quantitates  $a, a + b, c, c + b$ . Si autem talis proportio continuetur ita ut quantitates per eandem constantem differentiam perpetuo crescant vel decrescant, jam habetur series vel *progressio arithmetica*, qualis est ista  $a, a + b, a + 2b, a + 3b$  &c., vel hæc alia  $x, x - b, x - 2b$  &c. aut etiam in numeris 1, 2, 3, 4, 5 &c., & 10, 4, 1, - 2 - 5 - 8 &c. Ex ipsa proportionis arithmeticæ natura evidens est summam extremorum terminorum æqualem esse summæ mediorum. Ita in proportionem arithmetica  $c, a + b, c, c + b$ , manifestum est summam extremorum  $a + c + b$ , æqualem esse summæ mediorum  $a + b + c$ . Hinc datis tribus quantitatibus facile invenitur quarta arithmetice proportionalis; addantur scilicet secunda & tertia atque ex summa auferatur prima, differentia erit quartus terminus arithmetice proportionalis, ut patet.

Inde etiam colligitur in progressionem qualibet arithmetica summam duorum extremorum æqualem esse summæ duorum quorumlibet terminorum ab extremis æque distantium. Sint priores termini  $a, a + b, a + 2b$  &c., sitque ultimus terminus  $x$ , erit penultimus

mus  $x - b$ , antepenultimus  $x - 2b$  &c. Jam comparentur inter se termini qui ab extremis æque distant in hunc modum :

$$a, a + b, a + 2b, a + 3b, a + 4b \text{ \&c.}$$

$$x, x - b, x - 2b, x - 3b, x - 4b \text{ \&c.}$$

---


$$a + x, a + x, a + x, a + x, a + x \text{ \&c.}$$

Si nempe singuli termini correspondentes, & qui ab extremis æqualiter distant sibi invicem addantur, habebitur semper  $a + x$ , hoc est, summa primi termini  $a$ , & ultimi  $x$ ; atque hinc etiam evidens est summam omnium terminorum in progressionem arithmetica æqualem esse producto ex summa primi & ultimi in dimidium terminorum numerum. Ita si numerus terminorum dicatur  $n$ , erit omnium summa  $a + x \times \frac{n}{2}$ .

III. Cum differentia communis terminorum in progressionem arithmetica primum terminum non afficiat, patet hujus differentiæ coefficientem in quolibet dato termino æqualem esse numero terminorum qui terminum datum præcedunt. Quare in ultimo termino  $x$ , habebitur  $n - 1 \times b$ , nempe  $x = a + n - 1 \times b$ . Igitur cum omnium terminorum

summa sit  $a + x \times \frac{n}{2}$ , ea quoque invenitur =  $\frac{2an + n^2b - nb}{2} = \left( a + \frac{nb - b}{2} \right) \times n$ . E. G. Se-

ries arithmetica  $1 + 2 + 3 + 4 + 5$  &c. ad 100 terminos producta =  $\frac{2 \times 100 + 10000 - 100}{2} = 5050$ .

At si progressionis primus terminus fuerit 0, erit progressionis summa æqualis dimidio producto ex ultimo termino in numerum terminorum. Nam in hoc casu cum sit  $a = 0$ , summa terminorum quæ generatim exprimitur per  $a + x \times \frac{n}{2}$  in hanc abit  $\frac{xn}{2}$ .

Unde evidens est summam numeri cujuslibet terminorum in progressionē arithmetica cujus primus terminus est, 0, æqualem esse dimidio producto ex terminorum numero in terminum maximum. E. G. Progressio arithmetica :

$$\begin{array}{r} 0 + 1 + 2 + 3 + 4 + 5 + 6 + 7 + 8 + 9 = \\ 9 + 9 + 9 + 9 + 9 + 9 + 9 + 9 + 9 = \\ \hline 10 \times 9 = 45. \\ 2 \end{array}$$

IV. Si quotus ex duabus primis quantitatibus æqualis sit quotus ex duabus ultimis, quatuor illæ quantitates sunt *geometrice proportionales*, ut patet ex præcedenti definitione. Tales sunt numeri 2, 6, 4, 12, & quantitates a, ar, b, br. Ex ipsa proportionis geometricæ natura evidens est productum ex terminis extremis æquale esse producto ex mediis, sic  $a \times br = ar \times b$ , ut patet. Quare datis tribus terminis facile invenitur quartus geometrice proportionalis, multiplicando scilicet duos medios terminos productumque dividendo per primum, quotus erit quartus terminus quæsitus; ita datis tribus quantitatibus a, ar, b, invenitur quarta  $\frac{ar \times b}{2} = br$ . At si proportio sit con-

tinua, ita ut secunda quantitas sit primæ rationis consequens & simul secundæ rationis antecedens, simili ratiocinatione patet sumendum esse hujus quantitatis quadratum, illudque per primam quantitatem esse dividendum. Hæc autem quantitas quæ antecedentis & consequentis vices gerit, vocatur *media proportionalis*, talisque proportio ita exprimi solet  $\therefore a, b, c$ , nempe hoc scribendi modo significatur b, esse mediam proportionalem. At media proportionalis arithmetica ita designatur  $\div a, b, c$ , patet autem in hac proportionē summam extremorum æqualem esse termino medio bis sumpto.

Ex



Ex demonstratis de proportionē geometricā pendet vulgatissima arithmeticæ operatio quæ *regula trium*, vel etiam *regula aurea* propter eximiam utilitatem appellari solet; per hanc regulam datis tribus terminis invenitur quartus proportionalis. In hac autem operatione probe observari debet terminorum ordo. Et primo quidem consideranda est quantitas quæ est ejusdem generis cum quantitate quæ sita. Ex quæstionis natura intelligitur an quantitas data sit major vel minor quantitate quæ sita; si major sit, jam maxima ex aliis duabus quantitatibus in terminorum ordine ad sinistram scribi debet; at si minor sit, tunc duarum aliarum quantitatū minima ad sinistram, alia autem ad dextram collocanda. Constituto autem convenienti terminorum ordine, jam ex præscripto regulæ, productum ex secundo termino in tertium per primum terminum dividi debet. Tota res exemplo perspicua fiet. Hæc proponatur quæstio: Si triginta operarii dierum 12 spatio opus aliquod absolvant, quæritur necessarius operariorum numerus ut idem opus 18 diebus absolvatur. Quoniam quæritur operariorum numerus, primum considerandus est numerus 30; statim autem vides numerum illum datum majorem esse numero quæ sito; quare numerus 18 ad sinistram collocari debet, numerus autem 12 ad dextram, atque ita operatio peragitur, hoc ordine

$$18 : 30 = 12 : \frac{30 \times 12}{18} = 20.$$

V. Pro varia terminorum ordinatione in proportionē geometricā, diversa ab arithmeticis inventa fuerunt nomina. At ex primā terminorum ordinatione, aliæ omnes facile inferuntur. Si primus terminus dicatur esse ad tertium ut secundus ad quartum, argumentari dicimur *alternando*. Si dicatur secundus ad primum ut quartus ad tertium, tunc dicitur *invertendo*. Si summa terminorum primi & secundi refertur ad secundum ut summa terminorum tertii & quarti

ad quartum, inferre dicimur *componendo*; contra autem *dividendo*, si terminorum primi & secundi differentia ad secundum referatur ut differentia tertii & quarti refertur ad quartum. In his autem omnibus argumentandi modis proportionem manere patet, cum productum extremorum æquale semper inveniat productum mediorum. Ex eadem productorum æqualitate facile colligitur, rationum compositione proportionem non mutari. Ratio *composita* ex pluribus geometricis rationibus illa dicitur quam habet productum ex earum antecedentibus ad productum ex consequentibus. Sint duæ proportionēs

$$a : b = c : d, \text{ erit } af : bg = cm : ds.$$

$$f : g = m : s$$

Etenim productum extremorum  $afds$  æquale est productum mediorum  $bgcm$ . Et quidem  $a : b = c : d$ , ac proinde  $ad = bc$ . Præterea  $f : g = m : s$ , ideoque  $fs = gm$ , ergo  $ad \times fs = bc \times gm$ . Simili ratione

patet  $\frac{ad}{fs} = \frac{bc}{gm}$ . Atque eadem valet demonstratio pro

alio quolibet proportionum numero; ratio ex duabus æqualibus composita dicitur *duplicata*, ex tribus *triplicata* &c. Hinc ratio geometrica quam habet quadratum unius quantitatis ad quadratum alterius est duplicata ejus quam habent ipsæ quantitates ad invicem, ratio cuborum triplicata &c. Et contra ratio quam habent inter se radices quadratæ, cubicæ &c. dicitur *subduplicata*, *subtriplicata* &c. rationis potentiarum *respectivarum*. At ratio quæ intercedit inter radices

quadratas cuborum, hoc est, ratio  $a^{\frac{3}{2}}$  &  $b^{\frac{3}{2}}$  dicitur *sesquuplicata*.

Si duæ quantitates ita inter se connexæ sint ut si una dupla, tripla &c., altera etiam dupla, tripla &c. evadat, prima dicitur esse in *ratione directa simplici* alterius. At si prima in eadem ratione decrescit in qua altera augetur, tunc illa esse dicitur in *ratione inversa*,

*versa*, sive *reciproca* istius. Verum si duæ quantitates ita sint, invicem connexæ ut altera crescat in eadem ratione qua primæ quadratum aut cubus &c. tunc illa ad hanc esse dicitur in ratione duplicata, triplicata &c. At si in eadem ratione una decrescit qua crescunt alterius quadrata vel cubi, dicitur esse in ratione hujus *reciproca* duplicata aut triplicata &c.

VI. Ex mediorum & extremorum producto pendet etiam universa progressionum geometricarum doctrina. In progressionē qualibet geometrica productum ex primo in ultimum terminum semper æquale est producto ex secundo & penultimo, aut etiam alteri cuilibet producto ex duobus terminis a primo & ultimo æqualiter distantibus. Sit progressio  $a, ar, ar^2, ar^3$ , in qua communis multiplicator aut divisor *ratio communis* dici solet, sitque  $y$ , ultimus terminus,

erunt quatuor ultimi termini  $y, \frac{y}{r}, \frac{y}{r^2}, \frac{y}{r^3}$ , ut patet

ex natura progressionis geometricæ. Est autem  $a \times y = ar \times \frac{y}{r} = ar^2 \times \frac{y}{r^2} = \frac{ar^3 \times y}{r^3}$  &c. Præterea sum-

ma progressionis geometricæ, dempto primo termino, æqualis est summæ omnium terminorum, dempto ultimo, per communem rationem multiplicatæ.

Nam  $ar + ar^2 + ar^3 + \&c. \frac{+y}{r^3} + \frac{y}{r^2} + \frac{y}{r} + y = r \times$

$(a + ar + ar^2 + \&c. + \frac{y}{r^4} + \frac{y}{r^3} + \frac{y}{r^2} + \frac{y}{r})$ . Quare si

progressionis summa dicatur  $s$ , erit  $s - a = s - y \times r$ . hoc est,  $s - a = sr - yr$ , vel  $sr - s = yr - a$ , &

$s = \frac{yr - a}{r - 1}$ . Quamvis autem ex arithmeticarum ope-

rationum natura facile pateat qua ratione ad hunc ultimum valorem perveniatur, res tamen magis fiet manifesta ex appendice, quam de æquationibus mox adjungemus. Porro cum exponens ipsius  $r$ , post se-

cur-

cundum terminum perpetuo crescat, si numerus terminorum dicatur  $n$ , erit  $n - 1$  exponens ipsius  $r$ , in ultimo termino, ac proinde  $y = ar^{n-1}$ , &  $yr = ar^{n-1+1} = ar^n$ , &  $s = \frac{yr - a}{r - 1} = \frac{ar^n - a}{r - 1}$ . Quare datis in progressionem geometricam primo termino; terminorum numero & communi ratione, facile invenietur omnium terminorum summa. Si invenienda sit summa seriei decrescentis  $y + \frac{y}{r} + \frac{y}{r^2} + \frac{y}{r^3}$  &c.  $+ ar^1 + ar^2 + ar^3 + a$ , posito terminorum numero infinito, ultimus terminus  $a$ , sit  $= 0$ . Cum enim  $n$ , sit infinitus ac proinde &  $r^{n-1}$  erit  $a = \frac{y}{r^{n-1}} = 0$ . Quare summa talis seriei  $s = \frac{yr}{r-1}$ , quæ est summa finita, quamvis numerus terminorum sit infinitus; ita series infinita  $1 + \frac{1}{2} + \frac{1}{4} + \frac{1}{8} + \frac{1}{16}$  &c.  $= 2$ .

*Schol.* Ad progressionem arithmeticas & geometricas refertur logarithmorum doctrina, maximæ quidem utilitatis in universa mathesi, sed rem breviter attingere nobis satis erit. Progressio quælibet geometrica hac formula potest repræsentari  $\div aq^0, aq^1, aq^2, aq^3, aq^4, aq^5$  &c. in qua  $a$ , &  $q$ , exprimunt numeros quoslibet. Quare si fiat  $a = 1$ , præcedens series abit in hanc  $\div q^0, q^1, q^2, q^3, q^4, q^5$  &c. Inde autem duo colliguntur. 1.º Productum ex duobus quibuscumque hujus progressionis terminis, pro exponente habet ipsorum exponentium summam: Ita productum ex  $q^3 \times q^4 = q^7$ . Quare si inveniendus proponatur in hac progressionem terminus qui sit duorum aliorum producto æqualis, quæratur terminus cujus exponentis est ipsa duorum exponentium summa..... 2.º Quotus ex duobus terminis emergens, ipse est terminus cujus exponentis est ipsa exponentium differentia. Ita si dividatur  $q^5$  per  $q^3$ , quotus est  $q^{5-3}$ . Quare si in-

ve.

veniendus proponatur terminus duorum aliorum, quoto æqualis, quæraturs terminus cujus exponens æqualis est exponentium differentię.

Si ponatur progressionis geometricę terminus aliquis  $q$ , atque exponens rationis sit  $\frac{1}{n}$ , progressio quælibet geometrica hac serie in infinitum repræsentari potest . . . .  $qn^{-1}$ ,  $qn^{-2}$ ,  $qn^{-3}$ ,  $qn^{-4}$ ,  $qn^{-5}$ ,  $q^{-1}$ ,  $q$ ,  $qn$ ,  $qn^2$ ,  $qn^3$ ,  $qn^4$ ,  $qn^5$  &c. ut patet. Si infra progressionem geometricam scribatur progressio arithmetica, ita ut singuli termini unius respondeant singulis terminis alterius, terminus quilibet progressionis arithmeticę appellatur *logarithmus* termini respondentis in progressionem geometrica. Inde autem patet multipliciter variari posse logarithmorum formam. Etenim si duę sint progressionem quarum altera geometrica sit, altera arithmetica, & sub singulis primę terminis singuli secundę scribantur, undecumque initium fiat, hi dicuntur illorum *logarithmi*: at in vulgari logarithmorum systemate, numeri alicujus logarithmus vocatur exponens potestatis numeri denarii qui sit numero dato æqualis; ita si habeantur progressio geometrica  $\div 10^0$ ,  $10^1$ ,  $10^2$ ,  $10^3$ ,  $10^4$ , & infra scribantur eorundem terminorum valores  $\div 1$ ,  $10$ ,  $100$ ,  $1000$ ,  $10000$  &c. exponens 0 est logarithmus unitatis, exponens 1 est logarithmus numeri 10, & ita deinceps. At quia exponentes illi exhibent duntaxat logarithmos numerorum integrorum in progressionem decupla 1, 10, 100, 1000 &c., necessum est præterea haberi logarithmos numerorum intermediorum 2, 3, 4, 5, 6, 7, 8, 9, 11, 12 &c. Qua ratione autem formari possint logarithmorum tabulę breviter exponam; neque enim doctrinam hanc fusius explicare licet pro adjuncta his elementis facilitate.

Ut habeatur numeri alicujus dati E. G. 3 logarithmus, oportet numerum hunc inveniri in progressionem geometrica 1, 10, 100 &c. quod ex dictis patet.

Por-

Porro quamvis non pateat numerum 3, locum habere posse in prædicta progressionē, evidens tamen est, inferendo inter 1 & 10, terminos medios geometricè proportionales, obtineri numeros inter 1 & 10 eo proximus quo major est terminorum numerus, unde fiet ut horum terminorum mediorum aliquis vel sit numerus 3 accuratè, vel inveniantur termini duo contigui, inter quos numerus 3 contineatur proxime. His positis, inter 0 & 1, inferuntur tot medii arithmetice proportionales quot medii geometrici inferuntur inter 1 & 10. Quo facto, sumetur pro logarithmo numeri 3, terminus progressionis arithmeticæ respondens termino jam invento in progressionē geometrica. Hoc artificio & patientissimo multorum annorum labore supputatæ sunt logarithmorum tabulæ.

Commodissimæ sane sunt tabulæ illæ; etenim cum demonstratum sit productum ex duobus numeris logarithmorum summæ respondere, eorum vero differentiæ respondere numerorum quotum; per solam additionem & subtractionem compendiosè absolvi possunt multiplicatio & divisio. Sumantur datorum numerorum logarithmi simulque addantur, numerus summæ respondens in logarithmorum tabulis erit logarithmus producti; contra autem logarithmorum differentia erit logarithmus quoti, ac proinde inveniuntur numeri quæsi. Simili ratione patet numerum quemlibet ad datam potestatem evehi, si toties sumatur numeri dati logarithmus, quoties per se ipsum numerus multiplicandus proponitur, hoc est, logarithmus per exponentem potestatis multiplicari debet, & productum erit quæsi numeri logarithmus; contra autem si numeri dati logarithmus per exponentem radicis dividatur, quotus erit quæsi radicis logarithmus.

# A P P E N D I X

## De *Æquationibus*.

- I. **Æ** *Quatio* dicitur propositio duarum quantitarum æqualitatem affirmans, interposito æqualitatis signo = . *Æquatio* valorem quantitatis aliquis repræsentat, si ex una æquationis parte habeatur quantitas sola quæsitæ; in parte autem altera occurrant quantitates quæ omnes sint cognitæ. Ita si habeatur  $x = \frac{4 \times 6}{3} = 8$ , notus est valor ipsius  $x$ . Ita que in omni æquatione resolvenda id curandum est, ut nempe quantitas, cujus valor quæritur, in una æquationis parte sola contineatur, pars autem altera solas quantitates cognitæ contineat. In hac autem appendice duplex duntaxat æquationum genus considerabimus, eas scilicet in quibus quantitas incognita vel unius est dimensionis seu primi gradus, vel ad secundam dimensionem seu secundum gradum evehitur. Quod primi gradus æquationes spectat, totum artificium regulis quibusdam explicabimus variisque numeris distinguemus.... 1.º Ex una æquationis parte in alteram transfertur quantitas aliqua, facta signorum permutatione, ut in hoc exemplo.  $5x + 50 = 4x + 56$ ,  $5x - 4x = 56 - 50$  &  $x = 6$ .... 2.º Si quantitas incognita quantitatibus aliis per multiplicationem aut divisionem permixta sit, ab iis liberari debet in primo casu per divisionem, in casu altero per multiplicationem. Sit  $3x + 12 = 27$ , erit  $3x = 27 - 12$  &  $x = \frac{15}{3} = 5$ . Sit autem  $\frac{x}{5} + 4 = 10$ , erit  $x + 20 = 50$ , &  $x = 50 - 20 = 30$ .... 3.º Proportio quælibet geometrica converti potest in æquationem, facta extremorum & mediorum multiplicatio-

tione. Sit  $12x : \frac{1}{2} = 4 : 1$ , erit  $12x = 2$ , &  $x = \frac{1}{6}$ . Simili ratione proportio arithmetica in æquationem per additionem mutari potest. .... 4.º Loco quantitatis cuiuslibet in æquatione, alia ejusdem valoris substitui potest. Sit  $3x + y = 24$ , &  $y = 9$ , erit  $3x = 24 - 9 = 15$ , &  $x = \frac{15}{3} = 5$ . .... 5.º Si pars æquationis quantitatem quæsitam continens, signo aliquo radicali afficiatur, delendum est signum radicale, & altera pars æquationis ad eam evehi debet potestatem, quam indicat ipsum signum radicale. Sit  $\sqrt{ax + b^2} - c = d$ , erit  $\sqrt{ax + b^2} = c + d$ , &  $ax + b^2 = d^2 + 2cd + c^2$ , quare  $x = \frac{d^2 + 2cd + c^2 - b^2}{a}$ .

II. His præmissis permutationum regulis quæ ex antea demonstratis facile intelliguntur, jam problema aliquod unius dimensionis solvendum proponemus. Et primo quidem quæstionis propositæ distincta habeatur notio & singulæ conditiones attente considerentur. Si alicujus problematis conditiones ita exprimantur ut tot habeantur incognitæ quot æquationes, poterit semper deveniri ad unicam æquationem quæ unicam incognitam habeat. Nam sint. E. G. 10 æquationes & totidem incognitæ, poterit, conferendo primam cum secunda, eliminari per regulas præscriptas una ex iis incognitis, inveniendò novam æquationem quæ illa careat; tum idem præstari poterit conferendo primam cum tertia & ita porro, ac habebuntur jam novem æquationes cum novem incognitis, quæ eodem artificio ad octo reduci poterunt cum octo incognitis & ita porro, donec perveniatur ad unicam æquationem cum unica incognita. Hinc si habeantur tot æquationes quot incognitæ, problema dicitur *determinatum*, & unicam vel finitas numero solutiones admittit. Si fuerint plures incognitæ quam æquationes, problema dicitur *indeterminatum* & solutiones habet infinitas. Æquatio  $3x + \frac{1}{4}x = 20$ , est



est æquatio determinata, sed  $x + y = 12$ , est indeterminata; etenim si ponatur  $x = 1$  &  $y = 11$ , vel  $x = 2$ , &  $y = 10$ ; & ita porro, semper inveniatur  $x + y = 12$ , ita ut infiniti sint valores qui pro  $x$  &  $y$  positi numerum datum restituant. Regulas hæcenus explicatas ad facile exemplum transferamus. Mercator quidam nummos quotannis triente adauget, demptis 100 nummis quos annuatim impendit in sumptus, & post tres annos fit duplo ditior, quærentur nummi. In hoc problemate plures latent conditiones sic evolvendæ & enuntiandæ. Quantitates incognitæ ultimis alphabeti litteris designari solent. Itaque mercator habet certam nummorum summam, quæ dicatur  $x$ . Anno primo expendit nummos 100. Quare residuum,  $x - 100$ . Quod adauget triente, ideoque habetur  $x - 100 + \frac{x - 100}{3} = \frac{4x - 400}{3}$ .

Anno secundo expendit nummos 100, quare residuum  $\frac{4x - 400}{3} - 100 = \frac{4x - 700}{3}$ , quod adauget

triente, ideoque fit  $\frac{4x - 700}{3} + \frac{4x - 700}{9} = \frac{16x - 2800}{9}$ . Anno tertio expendit nummos 100, ideoque residuum  $\frac{16x - 2800}{9} - 100 = \frac{16x - 3700}{9}$ ,

quod adauget triente; quare fit  $\frac{16x - 3700}{9} + \frac{16x - 3700}{27} = \frac{64x - 14800}{27}$ . Tandem post tres annos fit duplo ditior; ergo  $\frac{64x - 14800}{27} = 2x$ ; ex hac æquatione

fit  $64x - 14800 = 54x$ , atque  $x = 1480$ . Quare habentur nummi in ipso initio atque etiam lucrum.

III. Si in aliquo solvendo problemate perveniatur ad æquationem quæ ipsum quantitatis incognitæ quadratum, & præterea productum ex ipsa quantitate inco-

incognita in aliquam datam quantitatem involvat, hæc æquatio dicitur *secundi gradus*, vel *quadratica*. In talibus autem æquationibus hac regula utendum est. Singulos æquationis terminos quæ incognitam quantitatem continent ad unam partem transferas, ita ut singuli termini cogniti ex parte altera mæeant. Si quantitatis incognitæ quadratum coefficiente aliquo afficiatur, per hunc coefficientem singuli æquationis termini dividantur. Tandem dimidii coefficientis quantitati incognitæ præfixi sumatur quadratum, quod ex utraque parte addatur. Jam pars æquationis quæ incognitam quantitatem continet ad perfectum quadratum reducta habebitur, ex qua proinde radix quadrata extrahi poterit & deinde per regulas præscriptas, quantitatis incognitæ valor eruetur. Ponamus  $y^2 + ay = b^2$ , addatur hinc & inde quadratum dimidii coefficientis  $a$ , erit  $y^2 + ay + \frac{1}{4}a^2 = b^2 + \frac{1}{4}a^2$ , extractaque radice fiet  $y + \frac{a}{2} = \pm \sqrt{b^2 + \frac{1}{4}a^2}$ , & tandem  $y = \pm \sqrt{b^2 + \frac{1}{4}a^2} - \frac{a}{2}$ .

Diligenter observandum est radici quadratæ præfixum fuisse signum  $\pm$  hoc est,  $+$  vel  $-$ . Etenim radix quadrata cujuslibet quantitatis ut  $a^2$ , potest esse  $+a$ , vel  $-a$ , ideoque  $y + \frac{a}{2} = \pm \sqrt{b^2 + \frac{1}{4}a^2}$ , vel  $-\sqrt{b^2 + \frac{1}{4}a^2}$ ; cum  $-\sqrt{b^2 + \frac{1}{4}a^2} \times -\sqrt{b^2 + \frac{1}{4}a^2}$  restituat quadratum  $b^2 + \frac{1}{4}a^2$  non secus ac facit  $+\sqrt{b^2 + \frac{1}{4}a^2} \times +\sqrt{b^2 + \frac{1}{4}a^2}$ . Quare æquationes quadraticæ duas admittunt solutiones: Sic in præsentî exemplo duo sunt valores radiceis  $y$ , unus nempe  $y = +\sqrt{b^2 + \frac{1}{4}a^2} - \frac{a}{2}$ ; alter autem  $y = -\sqrt{b^2 + \frac{1}{4}a^2} - \frac{a}{2}$ . At quoniam positiva sunt omnium quantitatum quadrata, hinc patet quantitatis negativæ radicem esse impos-

impossibilem seu assignari non posse, quæ ideo dicitur *imaginaria*. Aliquando contingit æquationes nullam solutionem admittere. Exemplo sit  $y^2 - ay + 3a^2 = 0$ ; erit  $y^2 - ay = -3a^2$ , &  $y^2 - ay + \frac{a^2}{4} = -3a^2 + \frac{a^2}{4} = -\frac{11a^2}{4}$ , extractaque radice, habebitur  $y - \frac{a}{2} = \pm \sqrt{-\frac{11a^2}{4}}$ , &  $y = \frac{a}{2} \pm \sqrt{-\frac{11a^2}{4}}$ . Ex quibus manifestum est duos valores radices  $y$  esse imaginarios, cum assignari non possit radix quantitatis  $-\frac{11a^2}{4}$ .

Si ergo in solutione problematum deveniatur ad quantitates imaginarias, signum est admodum manifestum vel problema esse impossibile, vel adhibitam esse methodum, quæ aliquid impossibile involvit, prorsus ut sit in argumentatione dum res ad absurdum reducitur.

IV. Radices imaginariæ quæ eandem sub signo radicali quantitatem habent ut  $\sqrt{-a}$ ,  $-\sqrt{-a}$  per multiplicationem efficere possunt productum reale in quo nullum supersit signum radicale, dummodo radices illæ numero pari semper multiplicentur. Etenim evanescere non potest signum radicale, nisi terminus hoc signo affectus multiplicetur per alium terminum, qui idem signum radicale habeat & eandem quantitatem signo inclusam. Jam vero ita sublato signo radicali, si productum ex prima multiplicatione per idem signum radicale multiplicetur, novum productum afficietur quoque signo radicali; at si rursus multiplicetur per idem signum radicale, iterum evanescet signum radicale & ita deinceps. Si polynomii terminus aliquis contineat radicem imaginariam, quale est polynomium  $x - a - \sqrt{-b}$ , evanescere non potest signum radicale, nisi polynomium datum multiplicetur per aliud, quod a primo differat tantum quoad signum vinculo radicali præfixum. Ita in polynomio proposito solum productum

Aritb.

E

ex

ex  $x - a - \sqrt{-b}$  in  $x - a + \sqrt{-b}$  delere potest signum radicale, factaque multiplicatione habetur  $xx - 2ax + aa + b$ ; in hoc enim solo casu producta singula ex unoquoque termino reali in  $\sqrt{-b}$ , sese mutuo signis contrariis elidunt, atque hinc patet terminum  $b$ , qui continet productum ex duobus radicalibus  $+ \sqrt{-b} \times - \sqrt{-b}$ , esse necessario positivum. Itaque quantitatum imaginariarum frequens usus occurrere potest; ipsa enim impossibilitas non solum per multiplicationem aliquando tollitur, sed etiam summa binarum quantitatum, quæ ex realibus & imaginariis sunt mixtæ, realis esse potest; ita quantitatum  $3 + \sqrt{-1}$  &  $8 - \sqrt{-1}$ , summa est realis nimirum  $11$ , atque etiam realis est differentia nempe  $5$ . Patet autem æquationes omnes secundi gradus posse repræsentari per hanc formulam  $x^2 - px = q$ , in qua  $p, q$ , designant quantitates quaslibet vel positivas, vel negativas.

Æquationum quadraticarum doctrinam facili exemplo illustrabimus. Itaque hoc sit problema, invenire scilicet in linea duo quæcumque luminaria conjungente punctum tale, ut luminaria illa ex hoc puncto æquali luce fulgeant. Distantia inter duo luminaria dicatur  $a$ , sitque illuminationis ratio ut  $m$  ad  $n$ ; præterea dicatur  $x$  distantia minoris luminaris a puncto quæsito, erit distantia luminaris alterius ab eodem puncto  $a - x$ . Jam ponatur luminarium effectus seu lucis intensitatem esse in ratione reciproca duplicata distantiarum a puncto lucido, ut vulgo statuitur a Physicis; sumptis distantiarum quadratis, erunt intensitates lucis ut  $\frac{1}{xx}$  &  $\frac{1}{xx - 2ax + aa}$ . Res ita se haberet si æqualia forent luminaria; at quia (ex hypoth.) lucis quantitates absolutæ sunt ut  $m$  ad  $n$ , erunt luminarium effectus ut  $\frac{m}{xx}$  ad  $\frac{n}{xx - 2ax + aa}$ .  
Ita-

Itaque ut habeatur punctum quæsitum, instituenda

est æquatio inter  $\frac{m}{xx}$  &  $\frac{n}{xx - 2ax + aa}$ , ex qua, per

reductionum regulas, eruitur  $xx + \frac{2amx}{n-m} = \frac{aam}{n-m}$ ,

& addito, ut moris est, dimidii coefficientis qua-

drato, habetur  $x^2 + \frac{2amx}{n-m} + \frac{aamm}{(n-m)^2} = \frac{aam}{n-m} + \frac{aamm}{(n-m)^2}$

Hujus æquationis radices duæ sequenti formula ex-

primantur, ut patet, nempe  $x = -\frac{am}{n-m} \pm \frac{a}{n-m}$

$\sqrt{mn}$ , vel  $x = \frac{a}{n-m} \times -m \pm \sqrt{mn}$ . Ex his evi-

dens est unius radiceis valorem esse negativum, alte-  
rius autem positivum. Etenim si quantitas radicalis  
signo — afficiatur, jam quantitas tota fit negativa;  
si autem afficiatur signo positivo +, jam quantitas  
— m +  $\sqrt{mn}$  erit positiva, cum sit (ex hypoth.)  
n major quam m, ideoque  $\sqrt{mn}$ , major quam m.

Supereſt ut radiceis negativæ uſum explicemus. In  
memoriam revocanda ſunt, quæ de quantitatibus ne-  
gativis jam dicta ſunt, ſcilicet quantitates negativæ  
ſecundum directionem positivis oppoſitam ſumendas  
eſſe. In præſenti problemate quantitatis x valor ne-  
gativus facile intelligetur, ſi obſervemus punctum  
quæſitum a nobis conſiderari tanquam inter duo lu-  
minaria conſtitutum. At ſi attendatur ad alterius ca-  
ſus poſſibilitatem, ponendo nempe punctum quæſi-  
tum in linea producta ultra luminaria, jam valor ra-  
dicis prodit positivus. Et quidem ſi diſtantiæ puncti  
a minori luminari dicatur x; ut ante, erit luminariſ  
majoris diſtantiæ, a + x, quadrata autem diſtantiæ  
erunt xx & aa + 2ax + xx, quæ per conditiones  
problematis in æquationem reducta præbent maa

$+ 2amx + mxx = nxx$ ; resoluta æquatione habetur  $x = a \times \frac{m \pm \sqrt{ma}}{n - m}$ ; valor  $a \times \frac{m + \sqrt{mn}}{n - m}$  erit

positivus, hicque solus problemati satisfaciet in casu proposito. Alter autem valor negativus  $a \times \frac{m - \sqrt{mn}}{n - m}$

significat sumendam esse directionem oppositam, punctumque non in linea producta ultra luminaria, sed in ipsa linea jungente constituendum esse. Problema ad casum particularem transferamus. Ponatur

$n = 4m$ , præcedens formula  $x = \frac{a}{n-m} \times \frac{m \pm \sqrt{mn}}{1}$  in hanc abit  $x = \frac{a}{3} \times \frac{\pm 2 - 1}{1}$ . Quare duplex valor

radicis  $x$  erit  $+\frac{1}{3}a$  &  $-a$ , qui quidem duo valores determinant puncta duo, quæ problemati æque satisfaciunt. Punctum unum locatur inter duo luminaria, illiusque distantia a lumine vividiori duplo major erit quam a debiliori. Punctum alterum constituetur in linea producta, illiusque a lumine debiliori distantia æqualis erit ipsi luminarium distantia. Facile autem sine ullo Algebræ auxilio intelligitur utrumque punctum problemati satisfacere; cum duo illa puncta lumini debiliori duplo proximiora sint, quam vividiori quæ vim habet quadruplo majorem. Hoc exemplo illustrantur quæ de quantitibus negativis breviter antea attigimus. Hæc sunt Arithmeticæ & Algebræ elementa, brevissima quidem, sed tamen rerum varietate copiosa, quantum ad nostras institutiones physicas satis esse judicavimus.

F I N I S.

ELE-

# E L E M E N T A G E O M E T R I Æ

## P R O E M I U M

*De definitione & divisione Geometriæ.*

### I



*Geometria* est scientia magnitudinum, *solidorum* nempe, *superficierum* & *linearum*. Solidum est magnitudo in longum latum & profundum extensa. Quamvis autem nihil sit in rerum natura continuum quod tres illas dimensiones simul non habeat, illæ tamen seorsim considerari possunt, vel etiam duas tantum concipere possumus de tertia minime cogitantes; atque hinc intelligitur notio superficiei & lineæ. Superficies est magnitudo tantum in longum & latum extensa. Linea autem est magnitudo extensa tantum in longum. Et requidem ipsa, itineris longitudinem nobis repræsentamus, non attenta ejus latitudine, & planitie latitudinem intelligimus, terrarum profunditatem nequaquam considerantes. Denique si concipiamus lineæ terminum, cujus nulla pars sit, nulla extensio, jam terminus ille *punctum* dicitur. Itaque ad explicandam Tyronibus Geometriæ definitionem, id primum ostendi debet quomodo per varios abstractionum gradus ex corporis *physici*, & prout est in se, consideratione ad corporis *geometrici* & simpliciter extensi contemplationem perveniamus, ac deinde ad superficiei & lineæ notionem progrediamur, atque tandem notionem puncti formemus. Neque methodo satis philosophica utuntur qui

statim superficiem definiunt terminum solidi, lineam terminum superficiæ, & punctum terminum lineæ. Ex præcedenti definitione nascitur divisio geometriæ in geometriam linearum, superficialium & solidorum. Quare tres erunt geometriæ sectiones. 1.<sup>a</sup> De lineis. 2.<sup>a</sup> De superficiebus. 3.<sup>a</sup> De solidis. In prima sectione linearum positionem illarumque mutuam relationem expendemus. Porro linearum nomine non solum intelligimus lineam rectam, sed etiam lineam circularem, cujus utilitas est maxima in consideranda linearum rectarum mutua positione. Quare ad geometriæ elementa pertinent quoque circuli proprietates. In secunda autem sectione superficialium proprietates & mensuram considerabimus. In tertia tandem sectione proprietates solidorum, illorumque mensuram demonstrabimus. At recta methodus postulat ut rerum demonstrandarum varietatem in unaquaque sectione variis capitibus distinguamus.

II. Lineam repræsentare solent Geometriæ tanquam genitam motu puncti. Si punctum directionem non mutat, linea hoc motu descripta *recta* dicitur; *curva* autem appellatur, si punctum perpetuo mutet directionem. At fatendum est ita simplicem esse rectæ & curvæ notionem ut ad clariorem ideam magisque *elementarem* reduci vix possit. Rectam definiunt alii lineam omnium inter duos terminos ductarum brevissimam. Cæterum inde evidens est datis in linea recta punctis duobus, datam esse hujus lineæ positionem, ita ut unica duntaxat recta per hæc duo puncta transire possit. Ex his etiam intelligitur quid sit superficies plana, omnium superficialium eisdem terminos habentium brevissima, vel cui linea recta undequaque adaptari potest. Circulus definitur figura plana, unica curva linea comprehensa, quæ *peripheria* dicitur, sive *circumferentia*, ad quam omnes rectæ lineæ a puncto medio, quod *centrum* dicitur, ductæ, æquales sunt inter se; circumferentiæ pars quælibet



libet *arcus* vocatur . Linea recta per centrum ducta & utrinque terminata , *diameter* dicitur ; rectæ autem a centro ad circumferentiam ductæ *semidiametri* vel *radii* appellantur .

III. *Anguli* notio ope circuli facillime concipitur . Duæ lineæ rectæ in aliquo puncto concurrentes angulum efficere dicuntur . Angulorum mensura est arcus, quem ipsorum latera comprehendunt in peripheria circuli ex anguli vertice tanquam centro descripti . Porro dum dicitur anguli mensuram esse arcum circuli ; nihil aliud significatur nisi æquales esse angulos , si æquales sint arcus ex angulorum vertice & eodem radio descripti . Ita dum dicitur angulum esse alterius duplum , nihil aliud intelligitur nisi arcum unum altero esse duplo majorem . Itaque anguli natura in majori aut minori inclinatione unius lineæ ad aliam consistit . Igitur angulus cum sit mera linearum inclinatio & *apertura* , extensio vel quantitas proprie loquendo dici non potest ; ac proinde , abstractione facta ab omni extensionis consideratione , angulum alterius duplum dicere non possumus , cum id dici possit duntaxat de quantitate comparata cum alia quantitate homogenea . Quia vero mera linearum apertura partes non habet , angulus non est quantitas proprie dicta , atque hinc factum est ut anguli mensuram cum circuli arcu comparaverint Geometræ . Circulus dividi solet in partes æquales 360, quæ *gradus* dicuntur ; singuli gradus dividuntur in 60. minuta prima , quodlibet minutum primum dividimus in 60. secunda & sic in infinitum . Gradus per 0 , designari solent , minuta autem per lineolas numeris superimpositas . Ita si forte occurrant 35°, 25' 36" 42", lege 35 gradus , 25 minuta prima , 36 secunda , 42 tertia .

IV. Ex angulorum notione pendet linearum mutua positio . Linea dicitur alteri lineæ *perpendicularis*, quando in ipsam incidens facit angulos hinc & inde æquales , angulus huiusmodi dicitur *rectus* . At si re-

Et una super alteram cadens duos angulos efficiat ita ut unus sit recto major, alter autem minor, primus dicitur *obtusus*, alius autem *acutus*. Si talis sit rectarum positio ut eandem semper a se invicem servant distantiam, evidens est nullam esse linearum illarum mutuam inclinationem, ac proinde in infinitum etiam protractæ non concurrent seu angulum non efficient, tales lineæ dicuntur *parallelae*.

V. Ex lineæ rectæ definitione evidens est duas lineas rectas in unico duntaxat puncto concurrere posse; cum enim omni careant latitudine, communis intersectio in unico tantum puncto fieri potest. Neque ad aliam deinde intersectionem transire possunt; alterutra enim linea directionem mutaret, ac proinde non forent ambæ rectæ, quod est contra hyp. Id pro axioma habent Geometræ & ita exprimi solet: *Due lineæ rectæ segmentum commune habere, nec spatium claudere possunt*. Itaque tres saltem lineæ requiruntur ut spatium undique claudatur; spatium undique clausum *figura* dicitur. *Triangulum* est figura terminata tribus lineis, quæ ejusdem latera vocantur. Hæc autem latera si fuerint æqualia, triangulum dicitur *æquilaterum*; si duo tantum latera sint æqualia, triangulum vocatur *isosceles*. Demum si latera omnia fuerint inæqualia, triangulum *scalenum* dicitur. Rursus autem triangulum ratione angulorum considerari potest; si unum habeat angulum rectum, triangulum *rectangulum* dicitur, *acutangulum*, si omnes habeat angulos acutos, & tandem *obtusangulum*, si angulum obtusum habuerit.

VI. Figura quatuor lateribus terminata, *quadrilaterum* generatim appellatur. Si autem æqualia sint figuræ latera & ad angulos rectos juncta, *quadratum* dicitur; at simpliciter rectangulum vocatur, si latera duo opposita reliquis duobus majora sint; manentibus tamen angulis rectis. *Parallelogrammum* appellatur figura quadrilatera, cujus bina opposita latera sunt mutuo paral-

parallela, etiam si anguli lateribus comprehensi non sint recti. Si figura quadrilatera sit æquilatera, non tamen rectangula, *Rhombus* dicitur, & *Rhomboides* vocatur si latera opposita duntaxat æqualia habuerit. Tandem quodlibet quadrilaterum ab iis quæ jam enumeravimus diversum, *Trapezium* appellatur; sed figura *polygona* dicitur quæ pluribus quam quatuor lateribus terminatur. Si latera fuerint quinque, sex, septem &c., figura *pentagonum*, *hexagonum*, *heptagonum* &c. dici solet. Figura autem *polygona regularis* est quæ æquilatera & æquiangula est.

VII. Axiomata & postulata plurima præmittere solent Geometræ, quæ quidem nos omittimus. Quæ enim est axiomatum de toto & parte utilitas ut intelligamus dimidiam lineam tota minorem esse? Ecquis statim non videt rectam lineam produci posse, circum datum intervallo posse describi & reliqua huiusmodi? Verum inter axiomata unum de figurarum *superpositione* legitur simplicissimum quidem & in universa geometria utilissimum, quod sine aliqua explanatione præternittere nolumus. Dicunt nempe *ea esse æqualia, quæ sibi mutuo superimposita perfecte congruunt*. Principium illud *superpositionis* non ita intelligendum est quasi in mutua figurarum applicatione consisteret, non secus ac artifex mensuram aliquam datæ longitudini applicat ut inde veram longitudinem concludat; talis demonstrandi ratio minime foret geometrica. Id eo positum est prædictum principium ut figuram alteri impositam imaginemur & deinde concludamus

- 1.º Ex partium datarum æqualitate, ipsam earundem partium convenientiam sive *coincidentiam* . . . . .
- 2.º Ex hac coincidentia ipsam reliquarum partium coincidentiam ac proinde & perfectam duarum figurarum æqualitatem & similitudinem. Itaque *superpositionis* principio intelligenda non est duntaxat mutua figurarum applicatio, sed partis unius alteri parti impositio, ut deinde figuras illas inter se comparemus.

Unde

Unde evidens est idem valere principium ad demonstrandam figurarum inæqualitatem. Cæterum hoc unico principio cum angulorum mensura per arcus circulares conjuncto, demonstrari possunt propositiones omnes quæ ad elementarem linearum geometriam pertinent.

## SECTION I.

### *De Geometria linearum.*

## CAPUT I.

*De lineis rectis quoad mutuam positionem consideratis, nullo tamen spatio seu nulla figura terminatis.*

**PROP. I.** RECTA QUÆLIBET IN RECTUM CADENS VEL DUOS ANGULOS EFFICIT RECTOS, VEL DUOBUS RECTIS ÆQUALES. Etenim recta insistat perpendiculariter ut GE, vel oblique ut RE (Fig. 1.) In 1.<sup>o</sup> casu patet (ex def.) angulos GEF, GEC esse rectos. In casu altero, anguli duo CER, REF, simul sumpti, æquales sunt duobus angulis CEG, GEF, hoc est, duobus rectis.

**COR. I.** Producta linea RE in O, simili ratione patet angulos FEO, OEC, duobus rectis æquales esse, ac proinde duæ rectæ sese invicem secantes efficiunt angulos quatuor rectis æquales. Jam centro E describatur circulus, mensura angulorum quatuor erit integra circuli circumferentia, hoc est gradus 360. Igitur angulus rectus erit quarta pars circumferentiæ, nempe 90°.

**COR. II.** Rectæ GH, RO in unam lineam coalescere non possunt, sed efficiunt angulos GER, HEO; qui dicuntur *ad verticem oppositi*. Illos autem angulos æquales esse manifestum est; cum sit dimidium peripheriæ RFO æquale dimidio peripheriæ GFH, sublata autem communi parte GO, erunt arcus reliqui GR, HO æquales inter se.

**COR. III.**

COR. III. Recta GE ad alteram CF perpendicularis est, si puncta duo quælibet G, E, a punctis duobus quibûslibet, ut C, F, æqualiter distent, hoc est, si  $GC = GF$ , &  $CE = EF$ . Etenim puncta duo E, G, non magis inclinant versus C, quam versus F, ac proinde cum duo puncta lineæ rectæ positionem determinent (ex def.), æqualis est rectæ totius GE, hinc & inde ad rectam CF, inclinatio, ideoque ob angulos utrinque æquales, recta GE, perpendicularis ad CF. Patet autem puncta C, F, sumi posse pro arbitrio inter CE, & EF.

COR. IV. Ex puncto quolibet E in recta CF dato, duci potest ad eandem rectam perpendicularis GE. Etenim ~~centro~~ E, & dato quolibet æquali intervallo Ec, Ef, describantur arcus circuli, sese invicem secantes in g; recta per g; & E ducta erit perpendicularis quæsitæ, ob distantias gc, gf & Ec, Ef æquales.

Si punctum h extra rectam datum sit, simili ratione ducitur perpendicularis hE. Etenim ex puncto h sumantur æqualia intervalla hc, hf; deinde ex punctis c & f, tanquam centris & eodem intervallo describantur arcus circuli se mutuo secantes in g, ducaturque hg, hæc erit perpendicularis, ob æquales hc, hf, & gc, gf distantias. Evidens autem est in utroque casu unicam perpendicularem duci posse; unica enim est recta transiens per punctum E, vel h, quæ cum recta CF, æquales hinc & inde efficiat angulos. Patet autem lineam perpendicularem esse omnium quæ ex puncto dato ad lineam datam duci possunt brevissimam; cum recta perpendicularis non magis pendeat ex una parte quam ex alia, ac proinde neque ad dexteram declinet neque ad sinistram, ideoque brevissima est via a puncto dato ad lineam datam. Item evidens est ex puncto dato ad lineam datam, unicam perpendicularem duci posse.

Eadem omnino est operatio, si recta cf in duas par-

partes æquales dividenda proponatur. Ex punctis  $c$ ,  $f$  tanquam centris & eodem radio describantur arcus circuli sese secantes in  $g$ ; deinde ex iisdem punctis & sumpro quolibet eodem intervallo describantur arcus se invicem secantes in  $h$ , recta  $hig$ , dividet  $cf$  æqualiter in  $E$ , ut patet; cum singula puncta rectæ  $gh$ , æqualiter distent a punctis  $c$ ,  $f$ , ac proinde  $Ec = Ef$ .

PROP. II. Si lineæ  $AB$ ,  $DC$ , sint parallelæ (Fig. 2.), erit 1.<sup>o</sup> ANGULUS  $OFD$  QUI EXTERNUS DICITUR ÆQUALIS ANGULO  $OGB$ , QUI INTERNUS ET OPPOSITUS VOCATUR. 2.<sup>o</sup> ÆQUALES ERUNT ANGULI  $BGF$ ,  $GFC$ , QUI DICUNTUR ALTERNI. 3.<sup>o</sup> ANGULI INTERNI ET AD EANDEM PARTEM POSITI  $DFG$ ,  $FGB$  ÆQUALES ERUNT DUOBUS RECTIS. Cum lineæ parallelæ eodem inter se ubique distent intervallo (ex def.) statim patet eandem fore parallelæ utriusque  $BA$ ,  $DC$  inclinationem ad rectam  $EO$ ; ac proinde angulus  $OFD$  æqualis est angulo  $OGB$ , quod erat 1.<sup>um</sup> Præterea cum angulus  $GFC$  æquetur angulo  $DFO$ , ad verticem opposito (cor. 2. prop. 1.) erunt etiam æquales anguli  $BGF$ ,  $GFC$ ; quod erat 2.<sup>um</sup> Tandem cum anguli  $OFD$ ,  $GFD$ , æquantur duobus rectis (prop. 1.) æquales itidem erunt duobus rectis  $DFG$ ,  $FGB$ ; quod erat 3.<sup>um</sup>

Vic versa si angulus  $OFD$  æqualis sit interno & opposito  $FGB$ , erit eadem inclinatio rectarum  $CD$ ,  $AB$  ad rectam  $EO$ , ac proinde rectæ illæ parallelæ sunt inter se. Rursus si æquales sint anguli alterni  $BGF$ ,  $GFC$ ; vel si duobus rectis simul æquales sint interni ad eandem partem positi  $BGF$ ,  $GFD$ , angulus externus  $DFO$  semper æqualis erit angulo interno & opposito  $BGF$ , ac proinde rectæ  $AB$ ,  $CD$  erunt parallelæ. Itaque ex ipsa parallelismi notione facile colliguntur tres primariæ parallelarum affectiones necessario nexu inter se conjunctæ, ita ut ex una qualibet inferre liceat rectas illas esse parallelas. Porro in demon-

stran-

strandis proprietatibus illis nimis laborare videntur quidam Geometræ.

COR. I. Si duæ rectæ  $AB$ ,  $HK$  parallelæ sint eadem rectæ  $CD$ , erunt etiam inter se parallelæ. Etenim inclinatio rectarum  $KH$ ,  $BA$  ad rectam  $EO$  eadem erit ac inclinatio rectæ  $CD$  ad eandem.

COR. II. Si per datum punctum  $O$  ducere oporteat rectam  $OK$  parallelam rectæ  $CD$ . Ducatur ut cumque ex puncto  $O$ , recta  $OF$ ; deinde ex puncto  $F$  tanquam centro describatur arcus  $GD$ ; atque ex puncto  $O$ , & æquali radio describatur arcus æqualis  $FM$ . Tandem per duo puncta  $O$ ,  $M$ , agatur recta  $OM$ , hæc erit parallela quæsitæ, ut patet; æquales enim sunt anguli  $FOM$ ,  $GFD$ , æqualibus arcibus subtensi, ut oportet.

## (CAPUT II.

*De linearum rectarum respectu circuli positione*

**P**ROP. I. DUCTA RECTA  $FM$ , AD CIRCUMFERENTIAM UTRINQUE TERMINATA; QUÆ CHORDA DIGITUR (Fig. 3.), RECTA EX CENTRO CIRCULI AD CHORDAM PERPENDICULARITER DUCTA, EANDEM SECAT IN DUAS PARTES ÆQUALES. Cum enim recta  $EP$  e centro ducatur, punctum  $E$  æqualiter distat a punctis extremis chordæ  $F$ ,  $M$ , (ex defin.). Præterea cum recta  $EP$  sit perpendicularis ad chordam, singula alia puncta æqualem habent ab iisdem extremis distantiam (cor. 3. prop. 1.). Quare punctum  $P$ , æqualiter etiam distat a punctis  $F$ ,  $M$ .

Et viceversa recta quælibet  $EP$ , per centrum transiens & chordam æqualiter dividens, eam quoque perpendiculariter secat. Etenim cum recta  $EP$  chordam dividat æqualiter, punctum  $P$  æqualiter distat ab extremis  $F$ ,  $M$ . Quia vero recta  $EP$ , transit etiam per centrum, punctum  $E$  æqualiter distat ab extremis  $F$ ,  $M$ . Quare puncta  $P$ ,  $E$  æqualiter distant a puncto

punctis  $F$ ,  $M$ , ac proinde  $EP$  perpendicularis est ad  $FM$ .

Rursus si recta  $EP$  perpendicularis sit ad chordam, eamque æqualiter dividat, recta illa transit per centrum. Cum enim chordam dividat æqualiter, punctum  $P$  æqualiter distat ab extremis  $F$ ,  $M$ . Præterea cum sit perpendicularis, singula illius puncta æqualiter etiam distant a punctis  $F$ ,  $M$ . Erit ergo centrum  $E$ , hujus perpendicularis punctum aliquod.

PROP. II. SI RECTA  $EH$  TRANSIENS PER CENTRUM DIVIDAT ÆQUALITER CHORDAM  $FM$ , ÆQUALITER QUOQUE DIVIDET ARCUM  $FHM$ . Etenim cum singula puncta rectæ  $EH$ , æqualiter distent a punctis  $F$ ,  $M$ , æqualis erit puncti  $H$ , ab extremis  $F$ ,  $M$  distantia. Quare si semicirculus  $GMH$ , semicirculo  $GFH$ , imponatur, congruet punctum  $M$  cum puncto  $F$ , & ob punctum  $H$  commune, congruent & chordæ  $HM$ ,  $FH$ , & arcus iisdem chordis subtensi.

COR. I. In eodem circulo vel in circulis æqualibus, chordæ æquales æqualibus arcubus respondent, inæquales autem arcubus inæqualibus. Præterea chordæ æquales æqualiter distant a centro, chordæ autem inæquales distant inæqualiter; quod evidens est ex *superimpositionis* principio. Nam chorda æqualis cum æquali chorda semper congruet, nec cum chorda inæquali congruere unquam poterit.

COR. II. In eodem semicirculo vel in semicirculis æqualibus, quo majores sunt vel minores arcus, eo majores vel minores sunt chordæ & centro magis vel minus proximæ. Viceversa quo majores sunt vel minores chordæ, centro magis vel minus proximæ; eo etiam majores sunt vel minores arcus subtensi.

COR. III. Ducta chorda  $FM$  diametro  $AB$  parallela intercipit æquales arcus  $AF$ ,  $BM$ . Etenim, cæteris manentibus ut ante, arcus  $AH$  = arcui  $BH$ , & arcus  $FH$  = arcui  $HM$ , quare demptis arcubus æqualibus remanet  $AF$  =  $BM$ . Evidens est eandem esse



esse demonstrationem si parallela  $NQ$  ad oppositas diametri partes jaceat, erit nempe arcus  $FN =$  arcui  $MQ$ .

COR. IV. Si ponatur rectam  $NQ$  motu sibi semper parallelo a centro recedere, donec puncta duo  $N, Q$  coeant in  $G$ , chorda  $NQ$  abit in *tangentem* quæ nempe circulum in unico puncto tangit; evidens autem est in hoc etiam casu esse  $GN = GQ$ .

COR. V. Ex corollariis præcedentibus patet quæ ratione per tria data puncta circulus describi possit, dummodo tamen puncta illa in eadem recta non jaceant. Agantur rectæ duæ quæ jungant tria puncta data, hæc erunt chordæ circuli quæsitæ. Quare ductis perpendicularibus, quæ chordas dividant æqualiter, utraque perpendicularis transit per centrum, quod proinde erit in communi utriusque perpendicularis intersectione. Simili ratione dato circuli arcu centrum invenitur, totaque circumferentia describitur.

COR. VI. Hinc arcus circuli datus in duos æquales arcus dividi potest. Ducatur chorda arcum datum subtendens, hæcque æqualiter per rectam perpendicularem dividatur, eadem perpendicularis etiam angulum quem arcus metitur æqualiter in duas partes dividet.

SCHOL. Ex hoc corollario patet facile dividi posse angulum quemlibet in partes 2, 4, 8, 16, 32 & ita deinceps secundum terminos progressionis geometricæ duplæ; sed, per geometriam elementarem, angulus in tres partes æquales dividi non potest; atque hæc est anguli *trisectio* a geometris per *circinum & regulam*, ut dicunt, hoc est per lineæ rectæ & circuli constructionem, frustra quæsitæ. Demonstrant enim Geometræ problemâ illud ad tertii gradus æquationem necessario pertinere, quæ quidem æquationes per solum circulum construi non possunt. Neque ob eandem rationem per sola geometriæ elementa angulus divi-

dividi potest in partes 5, 6, 7, 9 &c. Talis enim divisio, pro diverso partium æqualium numero, ad altiores æquationum gradus affurgit. Id autem, quamvis ad elementa non pertineat, breviter monuisse, volumus.

PROP. III. RADIUS EG IN PUNCTO CONTACTUS G AD TANGENTEM PERPENDICULARIS EST. Etenim quoniam tangens circulum in unico puncto tangit (ex cor. præc.), radius EG, minima est tangentis a centro distantia, ac proinde ad tangentem perpendicularis (ex def.).

Viceversa recta RT perpendicularis ad extremitatem radii G, circulum tangit in unico puncto G. Etenim cum sit EG, minima rectæ RT a centro E distantia, alia quælibet puncta rectæ RT magis distant a centro quam punctum G, ergo singula puncta præter G, extra circumferentiam jacent.

COR. I. Recta circumferentiam tangit in unico puncto; cum ex centro E, ad rectam datam unica perpendicularis duci possit. (cor. 4. prop. 1. cap. 1.).

COR. II. Hinc facile ducitur tangens ad punctum datum G. Ducto scilicet radio EG, erectaque in G perpendiculari RT.

COR. III. Quoniam ad punctum datum in circumferentia, unica tangens duci potest, si per punctum contactus agatur recta quælibet, hæc coincidit cum tangente vel circumferentiam secat.

COR. IV. Si duo circuli GNA, OGQ eandem habent tangentem, recta HG eidem perpendicularis per utriusque centrum puta E, P transibit. Jamvero si ducatur ES, jungaturque PS, quæ producta secabit in O circulum OGQ, & in R tangentem RT; erit semper in triangulo ESP latus PS, minus duobus reliquis ES, EP (ex def. lineæ rectæ). Quare cum radii ES, EG æquales sint, erit recta PS, minor quam PG sive PO. Ergo quodlibet punctum S  
cir-

circuli GSF, erit intra circulum OGQ; ac propterea illi circuli se mutuo contingent in unico puncto G, in quo scilicet rectam RT tangunt.

SCHOL. Cum inter tangentem & circulum nulla duci possit linea recta, angulus, quem arcus circuli efficit cum tangente, minor est quolibet rectilineo, licet hic in infinitum minuatur. Hujus propositionis utilitas est in Physica ubi agitur de divisibilitate in infinitum. Id vero maximam admirationem concertationesque maximas excitavit; nempe angulus contactus quem facit arcus cum tangente per infinitam circulorum seriem in minimas partes dividitur, licet ipse quovis angulo rectilineo minor sit. Hujus autem paradoxii Geometrici causam inde repetunt nonnulli, quod nempe anguli rectilinei natura, diversa omnino sit a natura anguli curvilinei in puncto contractus. Etenim quemadmodum infinitæ lineæ nunquam superficiem efficiunt, nec ulla inter has quantitates ratio potest assignari, licet in partes infinitas dividi possint; ita etiam infiniti anguli contactus quovis rectilineo minores sunt, licet sint divisibiles in infinitum. Verum in hac lite geometrica *logomachia* aliqua latere videtur. Si anguli nomine intelligatur portio finita spatii curva & tangente comprehenti, nullum dubium est quin spatium illud comparari possit cum portione finita spatii rectarum duarum concursu intercepti. At si anguli rectilinei notio vulgaris adhibeatur, evidens est notionem illam absolute consideratam angulo contactus convenire non posse; cum in hoc angulo latus unum sit curvilineum. Itaque hujus anguli asferri debet propria definitio, atque hac definitione quæ arbitraria omnino est semel constituta & explicata, jam nihil difficultatis superesse potest. Et requidem ipsa de solo nomine hic litigari demonstrat summa geometrarum consensio circa anguli hujus proprietates. Sed quidquid sit, quicumque geometricarum demonstrationum vim percipiet, pro-

*Aritb.*

F

evid-

evidenti habebit angulum contactus & minorem esse quovis rectilineo, & in infinitos curvilineos dividi posse.

PROP. IV. ANGULUS BAD, TANGENTE BA ET CHORDA AD COMPREHENSUS HABET PRO MENSURA DIMIDIUM ARCUM AFD. Etenim ducta diametro GE, chordæ AD parallela (Fig. 4.) ductaque alia diametro FF eidem chordæ perpendiculari, rectus erit angulus BAC tangente & radio comprehensus (prop. præced.), itemque rectus est angulus FCG, ac proinde utriusque anguli mensura est arcus FG. Sed angulus  $BAD = BAC - DAC$ , vel  $- ACG$ , ob parallelas DA, EG. Quare cum ACG pro mensura habeat arcum AG, erit angulus  $BAD = FAG - AG = FA = \frac{1}{2} AD$ .

PROP. V. ANGULUS CAD (Fig. 5.) AD CIRCUMFERENTIAM HABET PRO MENSURA DIMIDIUM ARCUM CD, LATERIBUS AC, AD INTERCEPTUM. Etenim ex anguli vertice A, ducatur tangens EB, summa trium angulorum  $BAC + CAD + DAE = 180^\circ = \frac{1}{2} AC + \frac{1}{2} CD + \frac{1}{2} DA$ . Sed angulum BAC metitur  $\frac{1}{2} AC$ , & angulus EAD  $= \frac{1}{2} AD$  (ex prop. præced.). Ergo angulus  $CAD = \frac{1}{2} CD$ .

COR. I. Angulus DFC ad centrum duplus est anguli DAC ad circumferentiam, eodem arcu CD, subtensi.

COR. II. Angulus rectus in circumferentia circuli, semicircumferentiam lateribus suis comprehendit totaque diametro subtenditur. Angulus acutus arcum semicircumferentia minorem, obtusus autem majorem intercipit, uterque chorda subtenditur.

COR. III. Angulus BAD (Fig. 6. 7.) vel intra vel extra circumulum pro mensura habet  $\frac{1}{2} BD + \frac{1}{2} CE$ . Signum  $+$  valet pro angulo intra circumulum, signum  $-$  pro angulo extra. Per E agatur chorda EF rectæ AD parallela, erit angulus  $BEF = BAD$  (ob paral-

parallelas). Sed mensura anguli BEF est  $\frac{1}{2}$  BF, &  $\frac{1}{2}$  BF =  $\frac{1}{2}$  BD +  $\frac{1}{2}$  DF, & DF = CE (cor. 3. prop. 2.). Ergo  $\frac{1}{2}$  BF =  $\frac{1}{2}$  BD +  $\frac{1}{2}$  CE.

COR. IV. Angulus bAD (Fig. 7.) tangente Ab & secante AD interceptus =  $\frac{1}{2}$  Db —  $\frac{1}{2}$  bC. Si enim circa punctum A revolvi intelligatur recta AB, donec tangens evadat in b, puncta E, B convenient in b. Simili ratione angulus dAb, inter duas tangentes Ad, Ab comprehensus, pro mensura habet  $\frac{1}{2}$  dfb —  $\frac{1}{2}$  dCb.

## CAPUT III.

*De lineis rectis quæ spatium claudunt,  
seu de figurarum rectilinearum  
proprietatibus.*

**P**ROP. I. IN TRIANGULO QUOLIBET SUMMA TRIUM ANGULORUM ÆQUALIS EST DUOBUS RECTIS. Etenim per tres angulorum vertices describatur circulus (cor. 2. prop. 2. cap. 2.) triangulum erit inscriptum circulo, cujus chordæ erunt tria latera; anguli autem habent pro mensura dimidium arcum lateribus oppositis subtensum (prop. 5. cap. 2.). Quare trium angulorum summa æqualis est dimidiæ trium arcuum summæ. Hoc est, dimidiæ circumferentiæ seu gradibus 180.

COR. I. In triangulo unicus esse potest angulus rectus vel obtusus, reliqui duo sunt acuti. Quare in triangulo rectangulo, angulus acutus est complementum alterius ad rectum.

COR. II. Datis duobus angulis in triangulo datur & tertius qui est differentia inter datam duorum angulorum summam & gradus 180. Si autem unicus datus sit angulus, data est reliquorum duorum summa, quæ est complementum ad duos rectos, & supplementum simpliciter appellari solet.

COR. III. In triangulo quolibet ABC (Fig. 8.)

F 2

pro-

producto latere  $BC$ , angulus externus  $ABI$  æqualis est duobus angulis internis oppositis  $ACB$ ,  $CAB$ . Etenim summa anguli externi  $ABI$ , & interni contigui  $ABC$  æqualis est duobus rectis (prop. 1. cap. 1.). Sed summa trium angulorum  $ACB$ ,  $CAB$ ,  $ABC$  æqualis etiam est duobus rectis. Ergo angulus externus  $ABI$  æqualis est duobus internis oppositis  $ACB$ ,  $CAB$ ; dempto scilicet communi angulo  $ABC$ .

PROP. II. IN OMNI TRIANGULO MAJUS LATUS OPPONITUR MAJORI ANGULO, MINUS AUTEM MINORI, ET VICEVERSA ANGULUS MAJOR MAJORI LATERI ET MINOR MINORI OPPONITUR. Triangulum circulo inscribatur, majorem angulum metitur arcus major, & majorem arcum subtendit major chorda & contra (cor. 2. prop. 2. cap. 2.)

COR. I. In triangulo æquilatelo singuli anguli æquales sunt inter se, & viceversa si tres anguli sunt æquales inter se, triangulum est æquilaterum. Inscripto enim, ut ante, triangulo in circulo, tria latera æqualia, fient tres æquales chordæ circuli quæ proinde tres arcus æquales subtendent; ideoque & tres anguli æquales sunt. Evidens autem est unumquemque angulum esse tertiam partem grad. 180, hoc est æqualem grad. 60.

COR. II. In triangulo isoscele æquales sunt anguli lateribus æqualibus oppositi; & contra si duo anguli in triangulo æquales sunt, triangulum est isoscele. Patet ut in coroll. præc.

PROP. III. SI IN DUOBUS TRIANGULIS TRIA LATERA ÆQUALIA SINT, TOTA TRIANGULA ERUNT ÆQUALIA. Sit  $AB = ab$ ,  $AC = ac$ ,  $BC = bc$  (Fig. 9.) Ex punctis  $A$ ,  $B$ , tanquam centris describantur arcus  $FCG$ ,  $DCE$ , se invicem secantes in  $C$ . Triangulum  $abc$ , ita imponatur triangulo  $ABC$ , ut punctum  $A$  conveniat cum  $a$ ; punctum  $b$  cadet etiam in  $B$ , ob  $AB = ab$ ; & ob  $ac = AC$ , recta  $ac$  terminabitur in aliquo puncto arcus  $FCG$ . Similiter ob

ob  $bc = BC$ , recta  $bc$  terminabitur in aliquo puncto arcus  $DCE$ ; quia vero rectæ  $ac$ ,  $bc$ , se mutuo jungunt in  $c$ , utraque terminabitur in puncto intersectionis  $C$ . Ergo  $ac$  congruet cum  $AC$ ,  $bc$  cum  $BC$ ; totumque triangulum  $abc$  cum triangulo  $ABC$ .

COR. I. Si sit angulus  $A = a$ ,  $B = b$ ,  $C = c$  & latus  $AB = ab$ , erit triangulum  $ABC =$  triangulo  $abc$ . Latus  $ab$  imponatur lateri  $AB$ ; ob angulum  $a = A$  &  $b = B$ , cadet  $ac$  in  $AC$ , &  $bc$  in  $BC$ ; quare latera duo  $ac$ ,  $bc$ , &  $AC$ ,  $BC$  in eodem puncto jungentur, hoc est,  $c$  cadet in  $C$ , totumque triangulum  $abc$  congruet cum triangulo  $ABC$ . Eodem modo comparari inter se possunt latera duo  $ac$ ,  $AC$ , quæ respondent angulis æqualibus; & hæc dicuntur *homologa*. Quare æqualia sunt triangula duo, si anguli unius æquales sint angulis alterius, & præterea si triangula latus unum homologum æquale habeant.

COR. II. Si duo triangula latera duo habuerint æqualia & angulos his lateribus interceptos æquales, tota triangula erunt æqualia. Sit  $AC = ac$ ,  $AB = ab$  & angulus  $A = a$ . Imponatur latus  $AB$  lateri  $ab$ , & latus  $AC$  lateri  $ac$ ; ob angulos  $A$ ,  $a$  æquales, latera illa congruent. Præterea cum sit  $AC = ac$ , &  $AB = ab$ , punctum  $c$  cadet in  $C$ , &  $b$  in  $B$ ,  $ac$  proinde  $bc$  congruet cum  $BC$ .

PROP. IV. SI DUO TRIANGULA INÆQUALIA ÆQUALES HABEANT ANGULOS, PONATURQUE ANGULUS UNUS SUPRA ALTERUM ÆQUALEM ANGULUM, ITEMQUE SIBI MUTUO IMPONANTUR LATERA HOMOLOGA QUÆ ÆQUALEM IN UTROQUE TRIANGULO ANGULUM COMPREHENDUNT, ERIT TERTIUM LATUS TERTIO LATERI PARALLELUM. Ponatur angulus  $D$  (Fig. 10.) supra angulum æqualem  $B$ , latus  $DF$  supra latus homologum  $BC$ , & latus  $DE$  supra latus  $BA$  itidem homologum; erit latus  $FE$  vel se parallelum lateri  $AC$ . Cum enim angulus  $feB$  æqualis sit angulo

lo CAB, erit recta fe rectæ AC parallela (prop. 2. cap. 1.). Si angulus F poneretur supra angulum æqualem C, simili modo demonstratur rectam DE esse rectæ AB parallelam. Idem dicendum de rectis FD, BC.

Viceversa si per punctum f, pro arbitrio sumptum in latere trianguli agatur recta fe parallela rectæ AC; æquales sunt anguli Bfe, ECA; & Bef, BAC. (loc. cit.). Triangula illa quæ angulos habent respective æquales dicuntur *similia*.

PROP. V. QUODLIBET POLYGONUM RESOLVI POTEST IN TOT TRIANGULA QUOT SUNT POLYGONI LATERA. Etenim ex puncto C intra polygonum, (Fig. 11.) ad singulos angulos duci possunt rectæ; evidens autem est tot esse triangula quot polygoni latera.

Alia ratione in triangula dividi possunt polygona (Fig. 12.). Si nempe ex polygoni angulis ducantur tot rectæ, quot duci possunt, quæ tamen se mutuo non secant. Illæ autem rectæ quæ ab angulo polygoni ad alium ducuntur, *diagonales* vocantur; patet in hoc casu tot esse triangula quot latera polygoni, demptis duobus.

COR. I. Summa angulorum polygoni æqualis est producto ex  $180^\circ$  in numerum laterum, demptis duobus, hoc est demptis  $360^\circ$ . Etenim anguli polygoni simul sumpti æquales sunt angulis omnibus triangulorum in quæ reductum est polygonum, demptis angulis quorum vertex est in C. Horum autem angulorum summa est  $360^\circ$  (prop. 1. cap. 5.). Sed tot sunt triangula quot latera; quare summa omnium angulorum polygoni æqualis est producto ex  $180^\circ$  in numerum laterum, binario multatum. Ita si polygonum habuerit septem latera, summa angulorum est  $= 180^\circ \times 7 - 2 = 900$ .

Idem quoque evidens est, si polygonum per diagonales in triangula dividatur; erit enim in his triangulis



gulis angulorum summa angulis polygoni æqualis, ac proinde summa illa æqualis est producto ex  $180^\circ$  in numerum triangulorum, hoc est, in numerum laterum polygoni, demptis duobus.

COR. II. Polygonum quodlibet regulare circulo inscribi potest. Dividantur in duas partes æquales anguli polygoni per rectas AC, BC, DC, EC &c.; rectæ illæ se mutuo secabunt in C, & erunt inter se æquales. Etenim rectæ AC, BC sibi occurrentes in puncto aliquo C, efficiunt triangulum ABC, itemque rectæ BC, DC aliud efformiant triangulum BCD. Sed triangula illa sunt æqualia; nam cum anguli polygoni regularis æquales sint & bitariam æqualiter dividantur, æquales sunt anguli CAB, CBA inter se, & angulis CBD, CDB; præterea æqualia sunt latera AB, BD. Ergo isoscelia sunt & æqualia triangula ACB, BCD, (cor. 2. prop. 3.). Quare  $AC = DC = BC$ ; & propter latus commune BC, punctum intersectionis rectarum AC, BC, cadet in punctum C. Idem valet de aliis rectis EC, FC &c.

COR. III. Radii e centro polygoni regularis ad angulos ducti polygonum dividunt in tot triangula isoscelia & æqualia, quot sunt polygoni latera; & quodlibet polygoni latus fit chorda arcus qui æqualis est quo- to ex gradibus 360 per numerum laterum divisus. Itz latus decagoni est chorda arcus grad. 36.

COR. IV. Latus hexagoni regularis circulo inscripti æqualis est circuli radio. Nam si ex centro C, in sex triangula dividatur hexagonum, æquilatera sunt triangula illa ob radios CA, CB æquales & angulum  $ACB = 60^\circ$ . Quare singuli anguli CAB, ABC sunt etiam  $60^\circ$ , ac proinde  $CA = AB$ .

COR. V. Quodlibet polygonum regulare circulo circumscribi potest, hoc est, intra polygonum regulare describi potest circulus qui singula tangat polygoni latera. Etenim cum latera polygoni regularis circulo inscripti, totidem sint chordæ æquales, chor-

p. 2. C. 2.

dæ illæ a centro æqualiter distant ( cor. 1. prop. 2. cap. 2. ). Quare si ex centro C, agantur perpendiculares CI, CK, hæ chordas æqualiter dividunt, atque æquales erunt. Ergo per singulas perpendicularem extremitates describi poterit circulus qui singula polygoni latera in puncto medio tanget ( cor. 1. prop. 3. cap. 2. ).

COR. VI. Hinc polygono regulari dato circulus circumscribi potest. Quærat<sup>r</sup> polygoni centrum, quo invento, circulus facile circumscribitur. Item polygono regulari circulus facile inscribitur; invento polygoni centro, ad latus aliquod demittatur perpendicularis, hæc erit circuli radius.

Viceversa polygonum regulare circulo dato circumscribi potest. Dividantur  $360^\circ$  per duplum numerum laterum polygoni, sumptoque arcu iK, qui sit quoto æqualis, per extremitates K, i, ducatur radius CK agaturque recta indeterminata CB; ad punctum K erigatur perpendicularis DKB, occurrens CB in puncto B, transferatur KB in KD, erit DB, latus polygoni quæsitum. Simili modo inveniuntur alia latera. Vel etiam radio CB describatur circulus & per totam circumferentiam transferatur corda DB atque inscribatur polygonum DBAGFED, quod erit circulo dato circumscriptum, ut patet; cum per constructionem tot habeantur tangentes æquales & æqualiter divisæ in puncto contactus, quot sunt latera in polygono quæsito.

Simili constructione circulo dato polygonum regulare inscribitur. Dividatur numerus  $360^\circ$  per numerum laterum polygoni quæsitum, sumatur in circulo dato arcus huic quoto æqualis, chorda hujus arcus erit latus polygoni; transferatur chorda illa per totam circumferentiam, habebitur polygonum quæsitum.

Hic autem diligenter observandum est per Geometriam elementarem circulo inscribi posse duntaxat triangulum æquilaterum, quadratum, pentagonum, pen-

pentecagonum, hoc est, figuram quindecim laterum, & polygona regularia in quibus numerus laterum se habet in progressionem geometricam duplam. Itz triangulum æquilaterum præbet polygona regularia laterum 6, 12, 24, 48 &c. quadratum præbet polygonum laterum 8, 16, 32, 64 &c. Ex pentagono oriuntur polygonum laterum 10, 20, 40, 80 &c. Tandem ex pentecagono oriuntur polygonum laterum 30, 60, 120, 240 &c. Alia polygonum ut eptagonum, Enneagonum, endecagonum &c. describi non possunt geometricè, nisi per constructionem æquationum quæ ad sublimiorem gradum assurgunt.

SCHOL. Cum polygonum regulare circulo inscribi & circumscribi possit, quo major est in polygono inscripto vel circumscripto laterum numerus, eo magis polygonum ad circulum accedit. Itaque augeatur numerus laterum polygoni in infinitum, ita ut differentia inter polygonum & circulum sit data quavis differentia minor, jam circulus considerari poterit tanquam polygonum regulare ex lateribus numero infinitis & infinite parvis compositum. Hæc circuli consideratio pendet ex principio omnino evidenti. Si nempe duarum quantitatum A, B, differentia sit qualibet assignabili minor, quantitates illæ velut æquales haberi debent. Etenim ponatur inter illas quantitates differentia aliqua data, jam quantitarum illarum differentia non est qualibet assignabili minor, quod est contra hyp. Quantitas autem, quæ ad aliam accedit pro differentia qualibet data minori, hujus alterius quantitatis *limes* appellatur. Methodus autem illa vocatur methodus *Exhaustionum*, seu *primarum* & *ultimarum* rationum. Hanc methodum, quam fufius explicabimus in prima parte physices, ubi sermo erit de extensionis divisibilitate, in proximo capite, quantum hæcenus nobis satis est, breviter exponemus.

## CAPUT IV.

*De linearum ratione seu de proportionibus.*

**P**ROP. I. IN TRIANGULIS SIMILIBUS  $acb$ ,  $ACB$ , (Fig. 13.) LATERA HOMOLOGA SUNT PROPORTIONALIA. Ponatur ab pars dimidia rectæ  $AB$ , agaturque  $cg$  parallela rectæ  $AB$ , erit  $cg = bA$ . Quod evidens est ex linearum parallelismo; ducta enim linea  $bg$ , erit ob angulos inter parallelas æquales & ob latus commune  $bg$ , triangulum  $bcg$  æquale triangulo  $bgB$ , & latus  $cg = bB$  (cor. 1. prop. 3. cap. præc.). Ergo  $cg = bB = Ab$ . Præterea triangulum  $Ccg$ , æquale est triangulo  $cAb$  (loco cit.). Ergo  $Cc = Ac$ , &  $Cg = cb = gB$ . Quare  $Ac$  vel  $Cc$ , erit pars dimidia rectæ  $AC$ , sicut  $cb$  est pars dimidia rectæ  $CB$ .

*lin. bc parall.  
(B)*

Si  $Ab$  sit tertia vel quarta aut quælibet alia pars rectæ  $AB$  (Fig. 14.) simili modo evidens est rectas  $Ac$ ,  $cb$ , esse tertiam, quartam &c. partem rectarum,  $AC$ ,  $CB$ . Etenim ex divisionum punctis  $b$ ,  $f$  in recta  $AB$ , ducantur  $bc$ ,  $fh$  &c. rectæ  $BC$  parallelæ, & eadem ratiocinatione patet triangula  $Acb$ ,  $chg$ ,  $hCi$  &c. æqualia esse triangulo  $acb$ .

Si recta  $Ab$ , accurate non contineatur in  $AB$ , sed cum fractione aliqua, E. G. bis cum dimidio, simili ratione  $Ac$  bis cum dimidio continebitur in  $AC$ , &  $bc$  in  $BC$ . Etenim factis duobus triangulis  $Acb$ ,  $chg$  æqualibus triangulo  $acb$ ; inter parallelas  $hf$  &  $CB$  construi poterit triangulum  $Chi$ , cujus latera erunt dimidia pars laterum trianguli  $cAb$ ; quod est evidens, cum sit  $fB$  pars dimidia rectæ  $Ab$  (per hypoth.) & recta  $hi$  æqualis rectæ  $fB$ , ob parallelas  $hf$ ,  $CB$ .

Tandem ponamus in triangulis  $ACB$ ,  $hCi$ , rectas  $AB$ ,  $hi$ , esse inter se *incommensurabiles*; divisa intelligatur recta  $hi$ , in partes 100, jam recta  $AB$  cer-

certum continebit partium numerum cum aliquo residuo, cum lineæ illæ sint incommensurabiles. Rursus recta hi divisa fingatur in partes 1000, certum earumdem partium numerum continebit recta AB, sed cum residuo quod priori residuo minus est; atque ita deinceps minus perpetuo fiet residuum, quo plures erunt partes. Quare ponatur partium numerus infinitus, jam residuum fit nullum. Ergo generatim tri ngula quælibet similia, latera homologa habent proportionalia.

COR. Numerus quilibet partium in CB erit ad numerum partium in CA inter easdem parallelas, ut numerus quilibet alius partium in CB ad numerum partium in CA inter easdem parallelas. Etenim  $Ch : hc = Ci : im$ , &  $Ch : Ci = hc : im$ . Item  $hc : cA = im : mB$ , &  $hc : im = cA : mB$ . Ergo  $Ch : Ci = hc : im = cA : mB$ . Quare CB est ad CA ut numerus quilibet partium in CB ad eundem numerum partium in CA.

PROP. II. DUO TRIANGULA IN QUIBUS LATERA HOMOLOGA SUNT PROPORTIONALIA, ÆQUIANGULA SUNT. Si (Fig. 10.) ponatur  $AC : BC = FE : FD$ , &  $AC : AB = FE : ED$ , æquiangula erunt triangula ABC, DEF. Nam si super EF construatur triangulum FEG triangulo ABC æquiangulum, facto scilicet angulo GEF = BAC, & angulo GFE = BCA,  $AC : BC = FE : FG$ : sed (per Hyp.)  $AC : BC = FE : FD$ , ergo  $FE : FG = FE : FD$ , ac proinde  $FD = FG$ . Similiter ob triangula ABC, FEG similia, erit  $AC : AB = FE : EG$ ; sed (ex hypoth.)  $AC : AB = FE : ED$ . Ergo  $FE : EG = FE : ED$ , ac proinde  $EG = ED$ . Quare triangula duo FED, FEG æquiangula sunt & æqualia, ob latus commune FE, & latera FD, FG, & EG, ED æqualia (prop. 3. cap. præced.). Sed (per constr.) triangulum FEG triangulo ABC est æquiangulum, ergo triangulum FED ipsi quoque est æquiangulum.

COR. I.

COR. I. Si in triangulis  $ABC$ ,  $DEF$ , sit angulus  $D = B$  & præterea  $DE : DF \neq BA : BC$ , erit triangulum  $DEF$  triangulo  $AEC$  æquiangulum. Nam super  $AB$  capiatur  $Be = DE$ , ducaturque  $ef$  parallela rectæ  $AC$ , triangula  $AEC$ ,  $eBf$  sunt æquiangula; cum ob parallelam  $ef$ , angulus  $feB = A$ ,  $efB = C$ , & ob angulum  $B$ , communem. Ergo  $Be : Bf = BA : EC$ . Sed (ex hypoth.)  $DE : DF = BA : BC$ , ergo  $Be : Bf = DE : DF$ ; at  $Be = DE$ , ergo  $Bf = DF$ ; ac proinde duo triangula  $Bef$ ,  $DEF$ , sunt æqualia & similia; sed  $Bef$  est triangulo  $AEC$  æquiangulum: ergo triangulum  $DEF$  est æquiangulum triangulo  $ABC$ , ac proinde generatim triangula duo, quæ duo latera homologa circa æqualem angulum habent proportionalia, sunt æquiangula.

COR. II. Si recta  $AD$  (Fig. 15.) angulum  $BAC$ , bifariam & æqualiter dividat in triangulo  $BAC$ , eadem recta latus oppositum  $BC$  dividit quoque in duas partes  $BD$ ,  $DC$  lateribus  $AB$ ,  $AC$  proportionales. Etenim producta recta  $CA$ , per punctum  $B$  agatur  $BE$  rectæ  $AD$  parallela, triangula  $BCE$ ,  $DAC$  erunt similia (prop. 1.); ac proinde  $BD : DC = AE : AC$ ; sed ob parallelas, angulus  $BEA = DAC = DAB = ABE$ ; ergo triangulum  $BAE$  est isoscele (cor. 2. prop. 2. cap. præc.); quare  $AE = AB$ , ideoque  $BD : DC = AB : AC$ .

COR. III. Si ponatur triangulum  $BAC$  rectangulum, & ex angulo recto  $A$  demittatur perpendicularis  $AD$  in basim  $BC$ , quæ angulo recto imminet & *hypotenusa* dicitur, hæc dividet triangulum in duo alia triangula  $BAD$ ,  $DAC$  inter se, & triangulo  $BAC$  similia. Et quidem triangula  $BAD$ ,  $DAC$ , præter angulum rectum, habent quoque cum triangulo  $BAC$  angulum communem, ac proinde similia sunt inter se & toti triangulo. Hinc  $BD : DA = DA : DC$ , &  $BD : BA = BA : BC$  ac tandem  $DC : CA = CA : CB$ .

COR. IV.

COR. IV. Cum sit  $BD : BA = BA : BC$ , erit  $BA^2 = BD \times BC$  (ob productum mediorum æquale producto extremorum). Similiter cum sit  $DC : AC = AC : CB$ , erit  $AC^2 = DC \times CB$ . Ergo  $BA^2 + AC^2 = BD \times EC + DC \times BC = BC \times BC = BC^2$ . Quare quadratum hypotenusæ in triangulo rectangulo æquale est quadratis laterum.

COR. V. Diagonalis quadrati est lateri *incommensurabilis*. Cum enim diagonalis sit hypotenusâ trianguli rectanguli, cujus latera sunt æqualia, quadratum diagonalis æquale est duplo quadrato lateris. Sed numeris exprimi non potest radix quadrati dupli (ex demonstratis in Arithmetica): Ergo si latus quadrati numeris exprimitur, exprimi non poterit diagonalis, & contra.

COR. VI. Perpendicularis EO (Fig. 16.) ex circumferentiæ circuli puncto quolibet in diametrum demissa, est media proportionalis inter duo segmenta CO, OL; nam si ex puncto E ad diametri extremitates agantur rectæ EC, EL, triangulum CEL est rectangulum in E, ac proinde  $CO : EO = EO : OL$ ; &  $EO^2 = CO \times OL$ ; recta perpendicularis EO dici solet *ordinata*; *abscissa* autem vocatur pars CO diametri inter perpendicularem & circumferentiam comprehensa.

PROP. III. SI DUCANTUR IN CIRCULO CHORDÆ DUÆ BA, BC (Fig. 17.) SE MUTUO SECANTES IN E, CHORDARUM SEGMENTA ERUNT RECIPROCE PROPORTIONALIA. Si enim ducantur DA, CB, triangula BEC, DAE sunt similia ob angulos in E æquales, atque ob angulos C, A, & B, D usdem arcubus subtensos. Quare  $AE : DE = EC : BE$ .

COR. I. Si duæ lineæ EB, EC (Fig. 18.) ex eodem puncto extra circulum ductæ, ad superficiem concavam terminentur, partes externæ EA, ED rectis integris EB, EC sunt reciproce proportionales.

les. Ductis enim chordis AC, DB, triangula EBD, EAC similia sunt, ob angulum E communem & angulos B, C eodem arcu AD subtensos. Ergo  $EA : ED = EC : EB$ .

COR. II. Si recta EB sit secans, altera autem Ed tangens, erit  $EB : Ed = Ed : EA$ . Nam ductis dB, dA, similia erunt triangula EdB, EdA, ob angulum E communem, & angulos EBD, AdE æquales quorum communis mensura est dimidijs arcus Ad (cor. 3. prop. 4. cap. 2.). Ergo angulus dAE = EdB, ac proinde  $EB : Ed = Ed : EA$ , hoc est, tangens est media proportionalis inter rectam totam EB & partem externam EA.

COR. III. Hinc facile dividitur recta data bifariam, ea conditione ut major pars sit media proportionalis inter totam rectam & ejusdem rectæ partem alteram. Nam (Fig. 19.) super datæ rectæ AB extremitatem erigatur perpendicularis AE, dimidiæ AB æqualis, & centro E, radio AE describatur circulus DAF. Deinde per B & E agatur recta BE, & centro B, radio BD describatur arcus DC, hic occurret rectæ AB in puncto quæsito. Etenim ob tangentem BA, erit  $BF : BA = BA : BD$ , ac proinde  $BF - BA : BA = BA - BD . BD$ . Sed  $BF - BA = BD = BC$ ; cum sit  $FD = BA$  utpote dupla ipsius EA quæ est dimidia rectæ AB. Simili modo  $BA - BD = AC$ ; ergo substitutione facta  $BC : BA = AC : BC$ , vel  $BA : BC = BC : AC$ . In hoc corollario continetur problema quod his verbis proponere solent Geometræ: *Rectam dividere in media & extrema ratione.*

Alia etiam problemata proponi solent qualia sunt: *Tribus datis rectis quartam proportionalem invenire: Inter duas rectas invenire mediam proportionalem.* Sed hæc manifesta sunt ex præcedentibus.

PROP. IV. Si duæ figuræ similes in triangula utcumque dividantur per diagonales ex angulis

GULIS



GULIS HOMOLOGIS DUCTAS, TRIANGULA HOMOLOGA ERUNT SIMILIA. Etenim sint duo polygona ABCDE, FGHIK (fig. 20.), in quibus angulus  $A = F$ ,  $B = G$ ,  $C = H$ ,  $D = I$ ,  $E = K$ , sitque præterea  $AB : FG = BC : GH = CD : HI = DE : IK = EA : KF$ ; ductis diagonalibus AC, AD, FH, FI, similia erunt triangula ABC, FGH, & ACD, FHI, atque ADE, FIK. Nam cum anguli B, G æquales sint & lateribus proportionalibus comprehensi, similia erunt triangula ABC, FGH, & ADE, IFK. Itaque angulus BAC = GFH, DAE = FIK. Ergo  $BAE = BAC = DAE = CAD = GFK = GFH = IFK = HFI$ . Igitur angulus CAD = angulo HFI. Simili modo ostenditur angulos ACD, FHI, & ADC, FIH æquales esse. Quare triangula ACD, FHI sunt æquiangula.

Viceversa duæ figuræ quælibet similes sunt, si in triangula æquiangula resolvi possint. Nam ob angulos æquales in triangulis æquiangulis, æquales sunt anguli homologi in unaquaque figura. Quare cum latera figurarum sint triangulorum æquiangulorum latera proportionalia, figuræ similes sunt.

COR. Si dividatur BC in L, latusque homologum GH in M in eadem ratione, ita ut sit  $BC : GH = LC : MH$ . Deinde si ducantur rectæ duæ ad arbitrium LN, MO, quæ angulos CLN, HMO æquales efficiant, vel quæ dividant latera homologa ED, KI in eadem ratione, ita ut sit  $ED : KI = DN : IO$ , erit  $LN : MO = CD : HI = BC : GH$  &c. Nam ductis NC, OH, triangula NCD, OHI similia sunt ob angulos D, I æquales lateribus proportionalibus ND, DC, & OI, IH comprehensos. Quare  $CD : HI = CN : HO$ , & angulus DCN = IHO. Si ergo anguli illi auferantur ex angulis æqualibus DCL, IHM, remanebunt æquales anguli NCL, OHM, ac proinde triangula NCL, OHM similia sunt, ideoque  $LN : MO = LC : MH = BC : GH = CD, HI$  &c. Quare generatim si in duobus polygonis simili-

libus

libus ducantur lineæ, quæ dividant latera homologa vel angulos homologos in eadem ratione, lineæ illæ erunt proportionales inter se, atque etiam eorundem polygonorum lateribus quibuscumque homologis.

SCHOL. Linearum rationem jam consideravimus in quantitativis finitis, superest ut pauca, quantum nobis necesse est, explicemus de ratione quantitativum quas *infinite magnas* & *infinite parvas* appellant. Et in primis quidem observandum est nullam quantitativam in se spectatam, & sine nostro cogitandi modo, aut infinite parvam esse aut infinite magnam; sed magnitudo quælibet in se determinata est. Et quidem data quavis magnitudine, utcumque parva, vel utcumque magna, alia semper minor in primo casu & alia semper major in casu altero haberi potest; nobis enim licet quantitativam exiguam vel ingentem considerare, primamque minuere, alteram augere, abstrahendo animum a quovis limite determinato; priorem quantitativam dicimus *infinitesimam* vel *infinite parvam*; quantitativam alteram appellamus *infinitam*, vel *infinite magnam*; rationem quam duæ quantitativæ finitæ habent ad se invicem, *rationem finitam* vocamus. Patet autem diversos esse infinitorum & infinitesimorum ordines; licet enim magnitudo aliqua concipiatur infinita vel infinitesima, semper tamen quantitas manet, ac proinde ultra quoscumque limites augeri potest & minui. Si quantitativam aliquam finitam ultra quoscumque limites minui concipiamus, hanc dicimus infinitesimam *ordinis primi*. Si autem quantitas alia ad hanc infinitesimam habeat rationem quam ipsa infinitesima habet ad quantitativam finitam, quantitativam hanc dicimus infinitesimam *secundi ordinis*, & ita deinceps. Viceversa si quædam quantitas sit ad finitam quantitativam, ut quantitas finita ad infinitesimam ordinis primi, eam dicimus infinitam *ordinis primi*, & ita deinceps superiores infinitorum ordines intelligere licet. Exemplum sit in circulo cujus diameter

meter est ad chordam, ut est chorda ipsa ad abscissam, ac proinde si fingatur chorda infinite parva primi ordinis, erit abscissa infinitesima ordinis secundi.

Ex his patet calculo subjici posse quantitates infinitas & infinitesimas. Infinitum hac nota exprimi solet  $\infty$ . Quare numerorum series infinita hoc modo repræsentari potest, 0, 1, 2, 3, 4, 5 . . . .  $\infty$ . Pari modo quantitas quælibet finita concipi potest divisâ in partes perpetuo decrecentes, donec perveniatur ad quantitatem infinitesimam. Talis est series,  $\frac{1}{2}, \frac{1}{4}, \frac{1}{8}, \frac{1}{16}, \frac{1}{32}, \dots, \frac{1}{\infty}$ . Evidens autem est quantitatem infinitam finitæ quantitatis additione, vel subtractione majorem, vel minorem non fieri; cum finita quantitas ad quantitatem infinitam, rationem habeat qualibet data minorem; simili ratione, quantitas infinite parva quantitatem finitam augere, vel minuere non potest. Itaque  $\infty = \infty + 1$ , &  $1 = 1 + \frac{1}{\infty}$ . Eodem modo si diversi infinitorum ordines per diversos exponentes designantur, erit  $\infty^2 + 2\infty = \infty^2$  &  $\frac{1}{\infty} + \frac{1}{\infty^2} = \frac{1}{\infty}$ . Verum si quantitates ejusdem generis considerentur, sive infinitæ, sive infinitesimæ, ex notione quantitatum illarum manifestum est eas non secus ac quantitates finitas tractari debere; probe enim recordandum est quantitates illas non absolute sed relative duntaxat, & secundum nostrum concipiendi modum, esse infinitas, vel infinitesimas. Quare  $\infty + \infty = 2\infty$ ,  $\frac{1}{\infty} \times 3\infty = 3$ ;  $\frac{2\infty^2}{\infty} : \frac{2}{\infty} = \infty \times \infty = \infty^2$ ;  $\frac{\infty^3}{\infty^2} = \infty$ ,  $\frac{\infty^2}{\infty} = \infty$ ;  $\frac{1}{\infty} \times \frac{1}{\infty} = \frac{1}{\infty^2}$ ;  $\frac{1}{\infty} : \frac{1}{\infty^2} = \frac{\infty^2}{\infty} = \infty$ . Ex his multa colligere est.

Quantitates infinitæ vel infinitesimæ ejusdem ordinis adduntur vel subtrahuntur non secus ac vulgares quantitates. Quantitas infinita primi ordinis multiplicata per quantitatem infinitam itidem ordinis pri-

*Arith.*

G

mi

mi producit quantitatem infinitam ordinis secundi. At quantitas infinita ordinis cujuscumque per quantitatem finitam multiplicata producit quantitatem infinitam ejusdem ordinis. Et generatim quantitas infinita cujusvis ordinis per aliam quantitatem ordinis cujuscumque multiplicata evehitur ad illum infiniti gradum, cujus exponens est ipsa exponentium summa. Contraria autem ratione, si quantitas infinita ordinis cujuscumque per quantitatem infinitam ordinis cujuslibet dividatur, habetur quantitas cujus gradus designatur per ipsam exponentium differentiam. At si quantitas infinitesima cujuslibet gradus per quantitatem infinitesimam ordinis cujuscumque multiplicetur aut dividatur, in primo casu quantitas infinitesima ad eum deprimeretur gradum qui per exponentium summam exhibetur; in casu autem altero quantitas infinitesima ad eum gradum evehitur, qui per ipsam exponentium differentiam representatur, ita ut quantitas infinitesima per divisionem fieri possit finita, atque etiam infinita. Hæc pauca dicta sint de *primarum & ultimarum rationum* methodo, quam quidem ad methodum *exhaustionum* revocari posse intelligitur.



# A P P E N D I X

*De proportionum usu in Triangulorum resolutione,  
sive de Trigonometria.*

I. **E**X linearum proportionione tota pendet *Trigonometria*, quæ est ars resolvendi triangula; in triangulo autem sex partes considerari possunt, nempe tres anguli & tria latera. Huc autem refertur trigonometriæ praxis, ut datis tribus ex sex partibus trianguli, quæ tamen tres anguli esse non debent, partes reliquæ inveniantur; ac proinde tres partes datæ constituere debent tres primos proportionis terminos, & terminus quartus erit pars quæsitæ. Verum quia latera trianguli simplicem rationem non habent cum angulis, quorum mensura sunt arcus circuli, angulis vel arcubus circuli substituuntur lineæ rectæ, quæ arcubus illis respondeant & trianguli lateribus proportionales sint. Harum linearum definitiones afferemus, & proprietates demonstrabimus.

Sit angulus quilibet  $ACB$ : (Fig. 21.) ex cuius vertice  $C$ , tanquam centro, & radio ad arbitrium sumpto describatur circulus  $AHaG$ . Producat  $AC$  in  $a$ , erigaturque in  $C$  perpendicularis  $CH$ ; evidens est angulum  $BCH$  vel arcum  $HB$  esse *complementum* anguli  $ACB$ , vel arcus  $AB$ , angulus  $BCa$  vel arcus  $Ba$  dicitur *supplementum* anguli  $ACB$ , vel arcus  $AB$ , & viceversa  $BA$  est *complementum* ipsius  $HB$ , & *supplementum* ipsius  $aB$ . Recta  $BD$  ex radii extremitate  $B$  ad radium  $CA$  perpendiculariter ducta, dicitur *sinus* arcus  $AB$ , vel anguli  $ACB$ . Recta  $AE$  ex radii extremitate  $A$  perpendiculariter ducta & radio alteri occurrens in  $E$ , vocatur *tangens* arcus  $AE$ ; recta autem  $CE$ , ejusdem arcus *secans* appellatur: Pars  $AD$  inter arcum & sinum

comprehensa dicitur sinus *versus* arcus AB. Perpendicularis BI dicitur *sinus complementi* arcus AB; perpendicularis HK *tangens complementi*, CK *secans complementi*, & HI *sinus versus complementi* arcus AB. Compendii ergo sinus complementi, tangens complementi &c. dicuntur *Cofinus*, *Cotangens*, *Cofecans*, *Cofinus versus*. Brevitatis causa scribuntur R pro radio; sin. pro sinu; tang. pro tangente; sin. v. pro sinu verso.

II. Ex his definitionibus multa colliguntur . . . .

- 1.<sup>o</sup> Sinus, cofinus, tangens, cotangens &c. anguli obtusi BCa, sunt etiam sinus, cofinus &c. anguli acuti ACB, qui est anguli obtusi supplementum. Nam ex radii alterutrius extremitatibus B, vel a, demitti non potest perpendicularis, quæ non cadat in radium alterum productum; tales sunt perpendiculares BD, ad; similiter tangens alia esse non potest quam ae; sed ob triangula <sup>aCd</sup> aCD, ECD, & Cae, CAE æqualia, habetur ad = BD, ae = AE. Cum autem sit arcus BH complementum arcus aB, atque etiam arcus AB, evidens est BI esse cofinum arcus aB & HK illius cotangentem . . . .
- 2.<sup>o</sup> Sinus BD arcus AB est dimidium chordæ BG, arcum duplum BQG subtendentis. ( Prop. 2. cap. 2. ) . . .
- 3.<sup>o</sup> Sinus crescunt crescentibus angulis a 0° usque ad 90°, & eodem modo decrescunt a 90° usque ad 180° . . . .
- 4.<sup>o</sup> Sinus arcus 30° dimidio radio æqualis est; est enim radius æqualis chordæ arcus 60° ( cor. 4. prop. 5. cap. 3. ) & ejusdem arcus sinus est dimidia chorda arcus dupli. Itaque in triangulo rectangulo latus oppositum angulo 30° est dimidia hypotenusa hujus trianguli. Nam si ACB = 30°, erit BG = BC, & BD =  $\frac{1}{2}$  BG.
- 5.<sup>o</sup> Tangentes crescunt, crescentibus angulis a 0° usque ad 90°, ita ut tangens arcus grad. 90, sit infinita; nam radius CH, in angulo recto HCA, non potest concurrere cum tangente . . .
- 6.<sup>o</sup> Tangens arcus 45° æqualis est radio; nam si angulus ACB sit 45°, triangulum

gulum rectangulum CAE erit isosceles, & AE = AC .... 7.º Sinus versus AD arcus qui minor est 90º, æqualis est differentiæ inter radium CA & cosinum CD = BI. Præterea cosinus versus HI est differentia inter radium CH & sinum CI = BD; at sinus versus supplementi nempe Da, æqualis est summæ radii & cosinus .... 8.º Ob triangula rectangula similia CDB, CAE, CIB, CHK, erit CA : CD vel BI = AE : BD, nempe radius est ad cosinum ut tangens ad sinum. Deinde hæc alia habetur analogia CH : CI vel BD = HK : IB, hoc est, radius ad sinum ut cotangens ad cosinum. Tandem AE : CA = CH vel CA : HK; hoc est, tangens ad radium ut radius ad cotangentem ... 9.º Ex præcedentibus analogiis derivantur formulæ quarum ope sinus substituuntur tangentibus & viceversa. Sit R = 1, erit Sin. = Cos.

$$\times \text{Tang.} = \frac{\text{Cos.}}{\text{Cot.}}, \text{Cos.} = \text{Sin.} \times \text{Cot.} = \frac{\text{Sin.}}{\text{Tang.}}, \text{Tang.}$$

$$= \frac{\text{Sin.}}{\text{Cos.}} = \frac{1}{\text{Cot.}}; \text{Cot.} = \frac{\text{Cos.}}{\text{Sin.}} = \frac{1}{\text{Tang.}}, \text{Cot. A} \times$$

Tang. A = 1 = Cot. B  $\times$  Tang. B .... 10.º In omni triangulo sinus angulorum sunt ut latera angulis opposita. Etenim triangulum circulo inscribatur, singula latera sunt chordæ arcus dupli, qui est mensura anguli oppositi. Quare dimidium latus est sinus anguli oppositi; sed semisses sunt inter se ut tota, ergo latera sunt ut sinus angulorum oppositorum. Hinc cum sinus anguli recti sit radius & latus oppositum sit hypotenusæ, erit in triangulo rectangulo radius ad hypotenusam ut sinus anguli unius acuti ad latus eidem angulo oppositum .... 11.º In triangulo rectangulo cosinus anguli unius acuti est sinus anguli alterius; ergo sinus anguli unius acuti est ad sinum cosinum ut latus huic angulo oppositum est ad latus alterum; sed sinus est ad cosinum ut tangens ad radium; ergo in triangulo rectangulo, tangens anguli unius acuti est

ad radium ut latus huic angulo acuto oppositum, est ad latus alterum. 12.<sup>o</sup> In triangulo quolibet ABC (Fig. 22.) hæc semper habetur analogia: majus latus AC est ad summam duorum aliorum laterum AB + BC ut eorundem laterum differentia AB - BC ad differentiam segmentorum AE, CE, quæ fiunt ducta ex angulo majore B in majus latus AC perpendiculari BE; nam si ex anguli vertice B, tanquam centro & radio qui sit minori lateri æqualis BC, describatur circulus GCD, producto latere AB in G, erit AG = AB + BC, & AP = AB - BC, atque ob CE = ED erit EA - CE = AD.... 13.<sup>o</sup> Dato sinu & cosinu arcus, invenitur sinus & cosinus arcus dimidii, atque etiam arcus dupli. Sit AM (Fig. 23.) arcus datus cujus sinus MP & cosinus CP, dati sint; ducta chorda AM, & ad eam demissa perpendiculari CQN, erit AQ vel MQ sinus, & CQ cosinus dimidii arcus; præterea agatur chorda MB, quæ erit CQ dupla ob triangula ACQ, ABM similia atque ob AB duplam ipsius AC. Sed AP : AM = AM : AB; quare  $AM^2 = AB \times AP$ , &  $AM = \sqrt{AB \times AP}$ , ideoque MQ sinus dimidii arcus =  $\frac{1}{2} \sqrt{AB \times AP} = \sqrt{\frac{1}{4} AC \times AP}$ . Simili modo cum sit AB : BM = BM : BP, erit  $BM^2 = AB \times BP$ , &  $BM = \sqrt{AB \times BP}$ , ergo CQ vel cosinus dimidii arcus =  $\frac{1}{2} \sqrt{AB \times BP} = \sqrt{\frac{1}{4} AC \times BP}$ .

Jam vero si invenire oporteat sinum & cosinum arcus dupli, sit AN arcus simplex, cujus sinus AQ vel MQ, & cosinus CQ, erit MP sinus & CP cosinus arcus dupli. Sed ob triangula rectangula AQC, AMP similia, erit CA : CQ = AM : MP. Quare si radius dicatur R, & arcus AN dicatur A, erit R : cos. A = 2. Sin. A : Sin. 2A. Tandem ob eorundem triangulorum similitudinem, erit CA : AQ = AM : AP, vel R : Sin. A = 2. Sin. A : R - cos. 2A, ideoque

RR



$$RR - R \times \cos. 2A = 2. \sin. A \times \sin. A, \text{ ac pro-} \\ \text{inde } \cos. 2A = \frac{RR - 2. \sin. A \times \sin. A}{R} \dots 14.^o \text{ Da-}$$

tis finu & cosinu duorum arcuum, inveniuntur si-  
nus & cosinus eorumdem summæ, vel eorum diffe-  
rentiæ. Sint arcus AM, DN, quorum sinus & co-  
sinus dati. Agatur chorda FD ad radium CM per-  
pendicularis, & ex punctis D, F demittantur per-  
pendiculares DQ, FP ad radium CA, quarum li-  
nearum una erit sinus summæ, altera autem sinus  
differentiæ arcuum AM, DM, ideoque recta CQ  
erit cosinus summæ, & CP cosinus differentiæ. Jam  
vero ducantur rectæ GK, FL, perpendiculares ad  
DQ, itemque rectæ MN, GI, perpendiculares ad  
radium CA, fiatque arcus AM = A, & arcus DM  
vel FM = B. His positis patet finem DQ sum-  
mæ arcuum esse = QK + DK = GI + DK, &  
finem FP differentiæ eorumdem arcuum esse =  
GI - KL = GI - DK, cum sit DK = KL; qua-  
re inveniendæ sunt duæ illæ rectæ. Sed ob trian-  
gula CMN, CGI similia, erit CM : CG = MN :

$$GI, \text{ vel } R : \cos. B = \sin. A : GI = \frac{\sin. A \times \cos. B}{R}.$$

Item ob triangula CMN, DGK similia, erit CM :  
CN = DG : DK vel R : cos. A = Sin. B : DK =  
 $\frac{\sin. B \times \cos. A}{R}$ , factaque summa, erit DQ, vel Sin.

$$(A + B) = \frac{\sin. A \times \cos. B + \sin. B \times \cos. A}{R}.$$

factaque subtractione, erit GI - DK vel FP = Sin.

$$(A - B) = \frac{\sin. A \times \cos. B - \sin. B \times \cos. A}{R}.$$

Simili modo (Fig. 24.) inveniatur cosinus CQ sum-  
mæ & cosinus CP differentiæ arcuum; inveniuntur

nempe rectæ CI & GK = PI, subtrahanturque ex CI, vel huic addantur. Jam vero ob triangula CMN, CGI similia, erit CM : CG = CN : CI, vel R : cos.

$$B = \cos. A : CI = \frac{\cos. A \times \cos. B}{R}. \text{ Itemque ob}$$

triangula DGK, CMN similia, erit CM : MN = DG :

$$GK, \text{ vel } R : \sin. A = \sin. B : GK = \frac{\sin. A \times \sin. B}{R};$$

ideoque CQ, vel Cofinus (A + B) =

$$\frac{\cos. A \times \cos. B - \sin. A \times \sin. B}{R}, \text{ \& CP vel cos. (A - B)}$$

$$= \frac{\cos. A \times \cos. B + \sin. A \times \sin. B}{R} \dots 15.^{\circ} \text{ Cum}$$

$$\text{fit } DQ + FP = 2GI, \text{ \& } GI = \frac{\sin. A \times \cos. B}{R}, \text{ evi-}$$

$$\text{dens fit esse } DQ = \frac{2. \cos. B \times \sin. A}{R} - FP, \text{ ideo-}$$

$$\text{que } FP = \frac{2. \cos. B \times \sin. A}{R} - DQ. \text{ Simili modo}$$

cum fit DQ - FP = 2DK = 2KL, & præterea DK

$$\text{vel KL} = \frac{\sin. B \times \cos. A}{R}, \text{ erit } DQ = \frac{2. \sin. B \times \cos. A}{R}$$

$$+ FP, \text{ ac proinde } FP = DQ - \frac{2. \sin. B \times \cos. A}{R}.$$

Tandem cum rectæ CQ, CI, CP se mutuo excedant eadem quantitate IQ vel GK, erit CQ + CP

$$= 2CI; \text{ fed CI (ex dem.)} = \frac{\cos. A \times \cos. B}{R}.$$

$$\text{Ergo } CQ + CP = \frac{2. \cos. A \times \cos. B}{R} \text{ ac proinde}$$

$$CQ = \frac{2. \cos. A \times \cos. B}{R} - CP, \text{ ideoque } CP = \frac{2. \cos. A \times \cos. B}{R} - CQ.$$

$$\frac{2. \text{Cos. } A \times \text{Cos. } B}{R} - \text{CQ. Quare } CP - \text{CQ} = 2\text{IQ}$$

$$= 2\text{GK. Sed } \text{GK} = \frac{\text{Sin. } A \times \text{Sin. } B}{R} \text{ ergo } CP =$$

$$\frac{2. \text{Sin. } A \times \text{Sin. } B}{R} + \text{CQ. Simili modo } \text{CQ} = CP -$$

$$\frac{2. \text{Sin. } A \times \text{Sin. } B}{R} \dots 16.^{\circ} \text{ Sint tres arcus circuli in}$$

progreſſione arithmetica, & dati ſint ſinus & coſinus unius arcus extremi atque etiam arcus medii; præterea dati ſint ſinus & coſinus differentię communis, habebitur ſinus arcus alterius extremi, multiplicando duplum coſinum differentię communis per ſinum arcus medii, & ex producto per radium diviſo dematur ſinus alterutrius arcus extremi, reſiduum erit ſinus extremi alterius. Eſt enim  $\text{DQ} =$

$$\frac{2. \text{Cos. } B \times \text{Sin. } A}{R} - \text{FP vel } \text{FP} = \frac{2. \text{Cos. } B \times \text{Sin. } A}{R}$$

$- \text{DQ} \dots 17.^{\circ}$  Iſdem poſitis conditionibus, ſi multiplicetur coſinus arcus medii per duplum ſinum differentię communis, habebitur ſinus arcus majoris, ſi huic producto per radium diviſo addatur ſinus arcus minoris; ſi autem ex eodem producto dematur ſinus arcus majoris, reſiduum erit ſinus

$$\text{arcus minoris; cum ſit } \text{DQ} = \frac{2. \text{Sin. } B \times \text{Cos. } A}{R} +$$

$$\text{FP, \& FP} = \text{DQ} - \frac{2. \text{Sin. } B \times \text{Cos. } A}{R} \dots 18.^{\circ} \text{ Poſi-}$$

tis ut ante arcubus AF, AM, AD, in progreſſione arithmetica, ſi multiplicetur duplus coſinus arcus medii per coſinum differentię communis, habebitur coſinus arcus unius extremi, demendo ex hoc producto per radium diviſo coſinum extremi alterius

rius . . . . . 19.<sup>o</sup> Cæteris manentibus ut ante, multiplicetur duplus sinus arcus mediæ per sinum differentię communis, huic producto addatur cosinus arcus majoris, habebitur cosinus arcus minoris; si vero idem productum semper divisum per radium, dematur ex cosinu arcus minoris, habebitur cosinus arcus majoris. Est enim  $CP = \frac{2. \text{Sin. } A \times \text{Sin. } B}{R}$

$$+ CQ \& CQ = CP - \frac{2. \text{Sin. } A \times \text{Sin. } B}{R}.$$

SCHOL. Ex hætenus demonstratis facile construuntur sinuum tabulæ. Dato enim sinu & cosinu anguli, inveniuntur sinus & cosinus angulorum omnium qui decreſcunt vel creſcunt in ratione dupla. Dato sinu graduum 30, inveniri poſſunt ſinus graduum 15, deinde  $7\frac{1}{2}$ , poſtea  $3\frac{1}{4}$  & ita deinceps ſinuum ſemiſſes, progrediendo uſque ad 12<sup>am</sup> operationem, nempe uſque ad  $52'' 44''' 3'''\frac{1}{4}$ , qui quidem ſinus ſine errore ſenſibili cum arcu confunditur. Quia vero ſinus illi miniſimi ſunt arcubus proportionales, dici poterit: Ut arcus ille eſt ad ſuum ſinum, ita arcus 1' eſt itidem ad ſuum ſinum. Dato autem ſinu arcus 1', invenientur ſinus arcuum 2', 3', 4' & ita deinceps uſque ad 30°; tandem a 30°, uſque ad 60° & a 60° uſque ad 90° progredi licebit. In exemplum adhibetur arcus 30° cujus ſinus dimidio radio æqualis eſt, atque hinc itatim colligitur & ex quadrato hypotenulæ laterum quadratis æquali, coſinum eſſe  $\frac{1}{2}\sqrt{3}$ , hoc eſt dimidio radio per  $\sqrt{3}$  multiplicato, poſito radio = 1.

Neque difficilius erit angulorum calculum ad tangentes revocare; cum (ex dem.) ſinus & coſinus per tangentes & cotangentes exprimi poſſint. Hæc pauca iatis ſunt ad intelligendam vulgariū tabularum conſtructionem; in iis nempe tabulis angulorum ſinus & tangentes repræſentantur, quarum quidem com-

commoditas est maxima, præsertim si logarithmos adjunctos habeant quorum facilis usus patet ex logarithmorum doctrina antea explicata.

## S E C T I O II.

*De Geometria superficierum.*

## C A P U T I.

*De præcipuis planarum superficierum proprietatibus.*

**P**ROP. I. TRIA PUNCTA QUÆ IN EADEM RECTA NON JACENT, PLANI POSITIONEM DETERMINANT. Id patet ex definitione ipsius plani. Et quidem per tria puncta duci potest planum, quod evidens est; illud vero planum unicum esse manifestum est; ponamus enim planum aliud quod cum primo in tribus punctis congruat, in aliis autem ab ipso deflectat, jam eadem linea recta quæ primum planum tangeret, alteri plano aptari perpetuo non posset, neque secunda superficies illa foret omnium intra eodem terminos ductarum brevissima; quod est contra definitionem plani. Ergo per tria puncta unicum planum duci potest, ac proinde constans est ac determinata positio plani per data tria puncta transeuntis.

**COR. I.** Duæ rectæ se invicem secantes, sunt in eodem plano. Nam punctum intersectionis & punctum quodlibet aliud in binis lineis pro arbitrio sumptum, tria sunt puncta in directum non posita, quæ proinde determinant positionem plani in quo jacent duo utriusque lineæ puncta, ac proinde & totæ binæ lineæ (ex def.)

**COR. II.** Si duæ rectæ jacentes in eodem plano tertia recta secantur, recta secans in eodem quoque jacebit plano. Nam duo ejusdem lineæ puncta, duæ scilicet intersectiones, sunt in eodem plano. Si autem ponamus duas rectas se mutuo secare, patet in hoc casu

casu demonstrationem non valere, nisi tertia linea secans extra punctum intersectionis transeat; alioquin unicui haberetur punctum, quod rectæ positionem non determinat.

COR. III. Duorum planorum intersectio est linea recta. Nam duorum planorum intersectio est linea cujus singula puncta jacent in utroque plano. Pater autem tria puncta duobus planis communia esse non posse, nisi jaceant in directum. Cum enim tria puncta, quæ non sunt in eadem recta, positionem plani determinent, si tria puncta in directum non posita duobus planis communia esse possent, jam tria puncta positionem plani non determinarent. Quare planorum duorum intersectio est linea recta.

COR. IV. Recta ad planum perpendicularis, insistit quoque perpendiculariter ad rectas singulas in eodem plano jacentes & per extremitatem perpendicularis transeunt. Etenim ponamus rectam illam ad planum perpendicularem non insistere perpendiculariter ad aliquam ex prædictis lineis, jam linea illa infra planum deprimitur vel attollitur supra idem planum, ac proinde non jaceret in eodem plano (quod est contra hypoth.)

COR. V. Duæ rectæ ad idem planum perpendiculares vel æqualiter inclinatæ, sunt inter se parallelæ, & contra. Etenim rectarum illarum extremitates communi recta in plano jungantur, duæ illæ lineæ ad planum perpendiculares vel æqualiter inclinatæ, erunt quoque perpendiculares vel æqualiter inclinatæ ad eandem lineam jungentem; est enim in eodem plano. Quare (ex parallelarum def.) rectæ illæ erunt parallelæ, & viceversa.

PROP. II. DUO PLANA SIBI MUTUO INCLINATA EASDEM HABENT PROPRIETATES QUAS IN RECTIS AD SE INVICEM INCLINATIS DEMONSTRAVIMUS. Ponamus planum aliquod A immobile in quo jaceat planum aliud B lineis rectis terminatum, qualia sunt  
poly-

polygona rectilinea ; hæc duo plana utpote omni crassitie destituta in unum coalescunt planum . At sit planum B, quod revolvi intelligatur circa latus aliquod plano A fixum perpetuo manens , totum plani motum sibi facile quisque repræsentabit . Et quidem 1.<sup>o</sup> ab ipso motus initio nihil duobus planis manebit commune præter rectam , circa quam planum B revolvitur , quæ proinde est utriusque plani interseccio . . . 2.<sup>o</sup> planum illud singulos percurreret inclinationis gradus , si tandiu convertatur , donec ad oppositam plani A partem perveniat . . . 3.<sup>o</sup> planum revolvens plano immoto fiet perpendiculare , ubi ad eum pervenerit situm in quo non magis pendeat ex una parte quam ex alia . . . 4.<sup>o</sup> Singulos inclinationis gradus metietur arcus circuli cujus centrum perpetuo manebit in communi planorum interseccione . Quia vero centrum in ipso circuli plano jacet , necessum est hujus arcus centrum esse in linea recta cujus revolutione generatur ipsum arcus planum . . . 5.<sup>o</sup> Si concipiatur linea quædam sublimis, cui perpendiculariter affixa sit recta alia, hæc recta planum describet , interea dum linea sublimis circa seipsam convertitur in eodem perpetuo manens loco . Si autem duæ lineæ sibi invicem non forent perpendiculares , jam figura revolvendo descripta plana non foret ; sed ex una parte convexa & ex altera concava , ut patet . Quare ex ipsa plani formatione evidens est revolutione rectæ planum describi non posse , nisi recta revolvens sit ad lineam in qua revolvitur perpendicularis . . . 6.<sup>o</sup> Centrum arcus in quo sumuntur gradus inclinationis plani unius ad aliud , positum est in perpendiculari ex puncto quolibet arcus ad planorum interseccionem ducta . Quare si describatur semicirculus cujus centrum sit in linea duobus planis communi , & cujus planum sit ad planum immotum perpendiculare , per hujus semicirculi gradus metiri licebit omnes plani mobilis inclinationes . Quare generatim plana duo ad se invicem inclinata eandem

eadem habent proprietates, quæ in mutua linearum inclinatione demonstrantur.

COR. I. Planum plano occurrens vel duos angulos rectos facit vel duobus rectis æquales (Prop. 1. cap. 1.)

COR. II. In planorum intersectione æquales sunt anguli ad verticem oppositi. (Cor. 2. Prop. 1. cap. 1.)

COR. III. Si plana quotlibet eandem habeant communem intersectionem, summa angulorum omnium est  $360^\circ$  (Cor. 1. Prop. 1. cap. 1.)

COR. IV. Ex puncto dato extra planum vel intra planum, unica perpendicularis ad planum duci potest (Cor. 4. Prop. 1. cap. 1.)

COR. V. Distantia puncti alicujus a plano dato, est perpendicularis ex puncto dato ad planum ducta (ex def.)

COR. VI. Planum secans duo vel plura plana parallela efficit angulos alternos externos æquales, item æquales angulos alternos internos. Præterea angulus internus alterius interni supplementum est, atque etiam angulus externus est supplementum alterius (Prop. 2. cap. 1.)

COR. VII. Si duo aut plura plana parallela alio plano secantur, communes intersectiones erunt parallelae. Si enim non sint parallelae, sibi occurrere possunt, ac proinde & plana ipsa in quibus hæ lineæ jacent, ideoque plana non forent parallela, quod est contra hyp.

## CAPUT II.

### *De Superficierum mensura.*

**P**ROP. I. SUPERFICIES PARALLELOGRAMMI RECTANGULI ÆQUALIS EST PRODUCTO EX BASI IN ALTITUDINEM. Sit parallelogrammum rectangulum ABCD (Fig. 25.) cujus altitudo AD certum contineat pedum numerum E. G. 7, basis autem AB octo contineat; divisum intelligi poterit parallelogrammum in 7 superficies ut DM, quæ singulae continent



tinent octo minores superficies quadratas, five octo pedes *quadratos*, ut vocant. Quare habebitur parallelogrammi totius superficies, si octo pedes quadrati qui in prima superficie continentur toties sumantur quot sunt æquales superficies ut DM, ac proinde superficies tota parallelogrammi erit  $7 \times 8$ , nempe 56 pedum quadratorum. Evidens est in hac demonstratione fingi posse alium quemlibet partium numerum, atque eadem valet demonstratio etiam si altitudo & basis parallelogrammi ponantur *incommensurabiles*, ut patet ex Prop. 1. cap. 4.

COR. I. Si parallelogrammum BD per diagonalem dividatur, habebuntur triangula duo rectangula æqualia, quorum proinde superficies utpote dimidia parallelogrammi, erit dimidium productum ex basi in altitudinem.

Eadem est demonstratio pro triangulo quolibet etiam non rectangulo. Sit enim triangulum CAB (Fig. 26.) non rectangulum, ex puncto A demittatur perpendicularis AD, compleaturque rectangulum FCBE, erit triangulum CAD dimidium rectanguli FACD, & triangulum DAB dimidium rectanguli DABE, quare ut ante, superficies trianguli est dimidium productum ex basi in altitudinem.

Idem patet etiam si perpendicularis EB trianguli, CED, cadat extra basim. Nam triangulum DEB est dimidium rectanguli DAEB, & triangulum CEB est dimidium rectanguli CFEB; ergo triangulum CED, seu  $CEB - DEB = \frac{1}{2} CB \times AD - \frac{1}{2} DB \times AD = \frac{CB - DB}{2} \times AD = \frac{1}{2} CD \times AD$ ; ac

proinde trianguli cujuslibet superficies æqualis est dimidio producto ex basi in altitudinem.

COR. II. Cum parallelogrammum quodlibet dividi possit in duo triangula æqualia, quæ ipsam habent parallelogrammi basim eandemque altitudinem, patet

tet generatim superficiem parallelogrammi cujuscumque esse productum ex basi in altitudinem.

COR. III. Quotlibet triangula ideoque etiam quotlibet parallelogramma inter easdem parallelas & super eadem vel æquali basi constituta, sunt æqualia. Ergo etiam triangula inter easdem parallelas cum parallelogrammis constituta & super eadem basi sunt parallelogrammorum dimidia ac proinde etiam inter se æqualia. Ex hac propositione pendet vulgaris demonstratio theorematum quod alio modo jam demonstravimus; nempe *quadratum hypotenuse in triangulo rectangulo, æquale esse quadratis laterum*. Hanc vero geometriæ fecunditatem totiusque doctrinæ geometricæ conjunctionem, variis exemplis tyronibus sæpe ostendere debet peritus magister.

COR. IV. Cum triangula sint ut dimidium productum ex basi in altitudinem, erunt etiam ut productum totum; hoc est, triangulorum superficies sunt in ratione composita basium & altitudinum; ac proinde, si bases fuerint æquales, triangula erunt inter se ut altitudines; si autem altitudines fuerint æquales, erunt inter se ut bases.

COR. V. Si altitudo trianguli unius sit ad trianguli alterius altitudinem ut basis secundi trianguli ad basim primi, hoc est, si bases sint in ratione inversa altitudinum, triangula sunt æqualia. In hoc enim casu habetur proportio in qua productum extremorum æquale est producto mediorum, hoc est, productum ex altitudine primi trianguli in basim æquale est producto ex altitudine secundi trianguli in suam basim, ideoque triangula sunt æqualia: & viceversa si triangula sunt æqualia, erunt bases in ratione inversa altitudinum.

COR. VI. In triangulis similibus superficies sunt in ratione duplicata laterum homologorum. Etenim cum triangula sint in ratione composita basium & altitu-

titu-

titudinum, atque (ex hyp.) sint similia, loco basis substitui poterit altitudo & contra: Quare triangula similia sunt ut quadrata laterum homologorum.

PROP. II. SUPERFICIES POLYGONI REGULARIS ÆQUALIS EST DIMIDIO PRODUCTO EX PERPENDICULARI PER CENTRUM POLYGONI AD LATUS UNUM DEMISSA, IN POLYGONI CIRCUMFERENTIAM. Etenim triangula omnia, in quæ resolvitur polygonum regulare, sunt æqualia (Prop. 5. cap. 3.) ideoque eandem habent altitudinem CI (Fig. 11.). Sed superficies polygoni regularis  $= CI \times \frac{1}{2} AB + CI \times \frac{1}{2} BD + CI \times \frac{1}{2} DE$  &c. Quare cum  $AB + BD + DE$  &c. sit tota polygoni peripheria, patet superficiem totam polygoni æqualem esse producto ex altitudine CI in dimidiam polygoni peripheriam, vel dimidio producto ex peripheria polygoni in altitudinem.

COR. I. Superficies circuli æqualis est dimidio producto ex radio in circumferentiam.

COR. II. Si ex centro circuli ad circumferentiam ducantur radii duo, pars circuli duobus radiis & arcu comprehensa *Sector* dicitur; evidens autem est hujus sectoris superficiem æqualem esse dimidio producto ex arcu in radium.

PROP. III. FIGURARUM SIMILIORUM SUPERFICIES SUNT IN RATIONE DUPLICATA LATERUM HOMOLOGORUM. Etenim triangula homologa in quæ reducuntur figuræ similes, sunt earumdem figurarum partes similes (Prop. 4. cap. 4.), ac proinde triangula homologa erunt ut polygona tota; sed triangula similia sunt in ratione duplicata laterum homologorum; ergo in eadem etiam ratione sunt figuræ similes quælibet.

COR. I. Superficies circulorum sunt ut quadrata radiorum vel diametrorum.

SCHOL. Ex propositionibus præcedentibus nota quidem est ratio quam habent variæ circulorum peripheriæ atque etiam illorum superficies ad suos radios; at ratio accurata inter circuli circumferentiam illiusque

Arith.

H

dia-

diametrum nondum definiri potuit, ita ut magnitudine diametri numeris expressa, numeris accurate exprimi non possit circuli circumferentia, ac proinde nec ipsa circuli superficies. In hoc sensu intelligi debet quod vulgo dicitur, nondum scilicet inventam esse circuli *quadraturam*, quod quidem *quadraturæ* nomen adhiberi solet eo quod *quadratum* sit cujuslibet superficiei communis mensura, ut jam demonstravimus. Eo igitur reducti sunt Geometrarum conatus ut ad illam quadraturam proxime & quantum voluerint accedant; hanc tamen accurate non attingant. Quæ ratione autem hanc *approximationem* tentare soleant Geometræ ex ipsis elementis licebit intelligere. Divisus concipiatur circulus primo in quatuor partes æquales, deinde in 8, in 16, in 32, in 64, in 128 &c. prout cuique libuerit, & concipiamus per ea divisionum puncta tangentes & chordas respective ductas, habebuntur polygoni duo quorum unum *inscriptum* circulo, alterum autem *circumscriptum*; quæ quidem ambo constant triangulis æqualibus. Porro, per methodos explicatas, in his triangulis haberi semper poterunt bases quæ in primo casu sunt circulorum chordæ, in altero autem tangentes, ac proinde omnium quoque chordarum & tangentium summa innotescet, hoc est perimenter polygoni inscripti, quæ circuli circumferentia proxime minor est, & polygoni circumscripti perimenter quæ proxime major est, ita ut defectus vel excessus, quantum cuique placuerit, tenuis sit & intra angustissimos limites contrahatur. Hac methodo Archimedes invenit diametrum ad peripheriam esse in ratione 7 ad 22 ita ut exiguus omnino sit peripheriæ sic inventæ excessus supra veram. Hæc eadem ratio subtilius ab aliis quæ sita est & statuitur ut 1 ad 3, 14159265 &c. perductis decimalibus numeris usque ad notas 127; quæ quidem *approximatio* est fere infinita; sed omnium vulgarissima & elegantissima ratio diametri ad peripheriam ea est quam exprimunt numeri

meri 113, & 355. Quare data circuli diametro habebitur peripheria, si hæc fiat proportio 113 est ad 355 ut diameter data ad peripheriam quæsitam; hæc multiplicetur per quartam diametri partem, habebitur superficies circuli sive, ut vocant, *area*. Hæc pauca dicta sint de ratione diametri ad peripheriam, sive de quadratura circuli quam audacter se invenisse non raro jactitant viri geometriæ imperiti, qui ipsum quidem quæstionis statum ut plurimum non intelligunt.

Simili methodo figura quælibet curvilinea generatim dividi potest in partes rectilineas; aliquando per geometriam sublimiorem figuræ curvilineæ area accurate haberi potest, sed commodissima & generalis est praxis qua figuræ curvilineæ circumferentia in minimas partes & *physice* rectilineas dividitur & deinde figuræ totius area investigatur, ut fieri solet in polygonorum mensura.

Porro dum superficierum magnitudinem *pedibus quadratis*, aut alia qualibet mensura exprimimus, id nequaquam haberi debet tanquam contrarium iis quæ de numerorum *concretorum* multiplicatione demonstravimus in arithmetica; non enim pedes per pedes multiplicantur. Ita dum parallelogrammi superficies invenitur; multiplicando basim per altitudinem, hac operatione hoc unum significant Geometriæ; si nempe habeantur parallelogramma duo, adhibeaturque quantitas *linearis* quælibet *a* pro communi basium & altitudinum mensura, & sit *B* numerus integer aut fractus, rationalis vel irrationalis exprimens quoties basis parallelogrammi unius contineat quantitatem *a*; atque *H* exprimat quoties altitudo ejusdem parallelogrammi eandem contineat mensuram. Item sit *b* numerus exprimens quoties mensura *a*, contineatur in basi alterius parallelogrammi *b*; autem exponat quoties altitudo parallelogrammi ejusdem contineat mensuram *a*, parallelogrammorum illorum su-

perficies erunt inter se ut productum ex duobus numeris  $B, H$ , ad productum ex numeris duobus  $b, b$ ; hæc est genuina hujus operationis notio; quare dum dicitur parallelogrammi superficiem æqualem esse, producto ex basi in altitudinem, *æqualitas* proprie dicta intelligi non debet, sed mera proportio. Hæc eadem observatio ad physicam sæpe transferri debet, ubi de spatii velocitatis & temporis mensura sermo est.

### SECTIO III.

#### De Geometria Solidorum.

#### CAPUT I.

##### De Solidorum genesis & proprietatibus.

**P**ROP. I. SOLIDORUM RECTILINEORUM GENESIM EXPLICARE. Si figura rectilinea  $AGR$  supra immotam rectam  $AE$  (Fig. 27.) motu sibi semper parallelo feratur; solidum  $AGROFE$  inde genitum *prisma* dicitur; & *rectum* vocatur, si  $AE$  describenti plano recta fuerit, sin minus, *obliquum*. Si planum describens fuerit parallelogrammum, solidum inde genitum dicitur *parallelepipedum*. Si autem planum describens sit quadratum, solidum *cubus* nuncupatur. Basis solidi seu planum describens potest esse polygonum quodlibet, & solidum inde genitum *prismatis* nomen retinet, si e singulis polygoni angulis extra planum confurgant lineæ æquales & parallele terminantes rectilineam solidi faciem. At si rectæ lineæ in apicem coeunt, solidum *pyramis* dicitur (Fig. 28.)

**COR. I.** Prisma igitur opposita latera  $AGR, EFO$ , æqualia habet, similia & parallela; cum  $AGR$  fluendo per  $AE$ , motu sibi semper parallelo tandem congruat cum  $EFO$ . Præterea dum planum  $AGR$  motu sibi parallelo describit prisma  $AGROFE$ , latera  $AG, GR, RA$  motu sibi semper parallelo describunt parallelogramma  $AEFG, GFOR, ROEA$ , ac pro-

proinde prisma tot parallelogrammis circumcirca terminatur quot sunt latera plani describentis.

COR. II. Parallelopipedum sex parallelogrammis terminatur; cubus autem sex quadratis æqualibus. Nam præter facies quatuor parallelo laterum motu genitas, sunt etiam facies duæ oppositæ parallelo basis motu descriptæ. Illa autem basis in primo casu est parallelogrammum, in altero autem quadratum.

COR. III. In pyramide si omnia latera basis sunt æqualia inter se & latera rectilinea ipsius pyramidis pariter inter se æqualia, erunt omnes facies triangula isoscelia æqualia.

COR. IV. Quævis sectio prismatis vel pyramidis facta plano basi parallelo est figura prorsus similis basi. Etenim sectionis parallelæ singula latera sunt singulis lateribus basis parallela, cum sint intersectiones planorum parallelorum cum iisdem planis. Quare singuli anguli homologi erunt æquales (Prop. 2. cap. præc.) ac proinde sectio basi similis est.

COR. V. In prismatico sectio basi parallela, ipsi basi æqualis est; in pyramide autem latera sectionis homologa sunt minora in ratione distantie sectionis a vertice ad distantiam basis ab eodem. In prismatico patet æqualitas; cum facies sint parallelogramma; ac proinde latera sectionis homologa æqualia sunt lateribus basis, ideoque sectio prorsus æqualis est basi. In pyramide proportio etiam patet; nam ob sectionem parallelam, in unaquaque facie habebuntur triangula duo similia.

COR. VI. Omnia prismata collata inter se atque etiam omnes pyramides inter se comparatæ, si super basibus æqualibus & inter eadem plana parallela constituentur, spatia solida respective æqualia comprehendunt. Secentur enim quocumque planis, quæ sint basibus parallela; sectiones unius prismatis vel pyramidis æquales semper erunt sectionibus respondentibus alterius. Nam in prismatico omnes erunt æ-

quales eidem basi; in pyramide erunt ipsi basi similes; & singula latera in una pyramide erunt ad latera homologa in pyramide altera in eadem data ratione, nempe in ratione distantie basis a vertice ad sectionis distantiam ab eodem vertice, quæ quidem ratio eadem est, ut patet: cum pyramides terminentur plano, basium & sectionum planis parallelo. Porro solida illa concipi possunt tanquam composita ex iis omnibus sectionibus, quarum singulæ cum singulis æqualia sint, erunt & ipsa solida æqualia.

COR. VII. Pyramides basium æqualium in eodem apicem desinentes, vel eandem utcumque altitudinem habentes sunt æquales. Nam per communem verticem ductum intelligatur planum basium planis parallelum; pyramides semper erunt super æqualibus basibus & in iisdem planis parallelis. Similiter si bases in eodem plano constituentur, vertices in eadem altitudine ad idem planum basibus parallelum terminabuntur.

COR. VIII. Si pyramides eandem habeant altitudinem, erunt inter se, ut bases. Etenim basis major divisa intelligatur, si fieri possit, in partes basi minori æquales, concipi poterit pyramis major tanquam composita ex diversis pyramidibus quæ basim habeant basi minori æqualem; sed pyramides illæ singulæ erunt minori pyramidi æquales, ergo pyramis major est ad minorem ut pyramidum æqualium numerus in majori pyramide ad pyramidem minorem, hoc est, pyramides illæ sunt inter se ut bases.

At si basis major minorem basim non contineret accurate, sed tamen habeant aliquam communem mensuram; dividi singantur bases in partes huic mensuræ communi æquales, jam pyramides duæ tot alias continebunt pyramides æquales quot sunt in utraque pyramide partes communes, ac proinde pyramides sunt etiam ut bases.

Tandem si pyramidum bases forent incommensurabi-

rabi-



fabiles, adhibeatur aliqua mensura, quæ minuatur in infinitum donec fiat utriusque basis mensura communis, quemadmodum dictum est de figurarum similitudine, eodem modo patet in hoc etiam casu pyramides esse inter se ut bases.

PROP. II. SOLIDORUM CURVILINEORUM GENESIM EXPLICARE. Si recta sublimis motu sibi semper parallelo circuli circumferentiam radat, figura solida hoc motu genita *cylindrus* dicitur. At si recta per aliquod punctum fixum & sublime perpetuo transiens, altera extremitate radat circuli circumferentiam, solidum hoc motu genitum *conus* vocatur. Utriusque figuræ *basis* vocatur circulus cujus circumferentiam recta percurrit. Patet cylindrum duobus circulis, conum autem circulo unico terminari. Recta per utriusque circuli centrum in cylindro transiens, in cono autem per basis centrum ipsumque coni verticem *axis* dicitur. Si axis sit perpendicularis basi, cylindrus vel conus *rectus* solidum genitum appellatur; secus autem *obliquus* vocatur. Si autem basis fuerit quævis alia curva, solidum dicitur *cylindricum* vel *conoïdicum*. Figura 29. refert cylindrum rectum, figura autem 30 conum rectum repræsentat. Si semicirculus AHB (Fig. 31.), circa inmotam diametrum AB in orbem ducatur, donec ad pristinum situm redeat, solidum inde genitum *sphæra* dicitur.

COR. I. Si basis prismatis, vel pyramidis, aucto numero laterum, & imminuta magnitudine in infinitum, habeat in curvam continuam, prima abit in solidum cylindricum, pyramis in conoïdicum. Item prisma cujus latera sunt perpendicularia basi, niutatur in cylindrum rectum; pyramis vero in qua basis latera sunt æqualia & distantia a vertice æquales, abit in conum rectum.

COR. II. Si sphæra plano quovis secetur, sectio erit circulus qui erit omnium maximus, si sectionis planum transeat per centrum sphærae, ac deinde erit

major vel minor prout planum sectionis magis vel minus recedet a centro sphaerae. Sit enim sectio FIH, ad cuius planum ducatur diameter perpendicularis AB, quae plano secanti occurrat in E. Si punctum E congruat cum centro C, patet rectas EI fore radios sphaerae. Si autem cadat extra, in triangulis CEI, CEF, anguli ad E erunt recti, latus CE commune & basis CI = CF; quare quodvis latus EI = EF ac proinde in utroque casu sectio erit circulus cuius centrum E; illud vero centrum in primo casu coincidet cum centro sphaerae. Patet autem ob angulum rectum in E, radium circuli EF, semper minorem fore radio sphaerae CF, nisi radii illi congruant abeunte E in C. Evidens etiam est eo minorem fore chordam HF, nempe circuli diametrum, quo maior fuerit distantia CE.

COR. III. Sphaera considerari potest tanquam composita ex pyramidulis aequalibus numero infinitis & infinite parvis quarum bases sunt in ipsa sphaerae superficie, vertex autem communis est ipsum sphaerae centrum.

SCHOL. In capite praecedenti ubi prismata & pyramides inter se comparavimus, aliqua dubitatio suboriri posset, quod nempe solida e superficiebus composita habere videamur. Et re quidem vera linea producit motu continuo puncti, superficies motu continuo lineae, solidum motu continuo superficiei; at linea non ex punctis, sed ex lineis, superficies ex areolis non ex lineis, solidum ex spatiolis solidis, non ex superficiebus componitur. Neque genuinam linearum, superficierum & solidorum notionem tyronibus proponunt nonnulli magistri qui lineas tanquam e punctis, superficies ex lineis, solida ex superficiebus composita repraesentant. Itaque dum (in cor. 6. cap. praec.) ex sectionum aequalitate prismatum & pyramidum aequalitatem concludimus, id non debet intelligi quasi prismata & pyramides ex sectionibus pla-

planis componi velimus; nam loco sectionis unius considerari possent sectiones duæ infinite proximæ, quarum (in cit. coroll.) eadem foret distantia sive altitudo, ut patet ex planorum parallelismo. Igitur minima solida duabus sectionibus infinite vicinis comprehensa forent æqualia in casu proposito; quare communem altitudinem negligere licuit solamque sectionum æqualitatem considerare; id vero facere nunquam licet nisi præter sectionum æqualitatem, æquales etiam sint binarum quarumcumque indefinite proximarum distantia. Porro evidens est hanc methodum ad *exhaustionum* methodum sæpius explicatam reduci, ac proinde ad severitatem geometricam esse omnino compositam.

## CAPUT II.

*De Solidorum mensura.*

**PROP. I.** PRISMATIS CUJUS LATERA RECTILINEA SUNT BASI PERPENDICULARIA SUPERFICIEM METIRI. Singulæ prismatis facies in hoc casu sunt rectangula sub singulis lateribus basis singulisque prismatis lateribus rectilineis contenta: ideoque omnium hujusmodi rectangulorum summa est tota basis perimetro in latus rectilineum ducta. Quare prismatis superficies, demptis basibus, est productum ex perimetro basis in unum e lateribus rectilineis. Huic producto addatur dupla basis superficies, habebitur superficies tota prismatis.

**COR. I.** Cum sex quadratis æqualibus terminetur cubus, habebitur tota cubi superficies, si quadrati unius superficies sexies sumatur. Quia vero parallelopipedum sex terminatur superficiebus quarum duæ quælibet oppositæ sunt æquales, inveniantur tres inæquales superficies illarumque summa bis sumatur, habebitur tota parallelopipedi superficies.

**COR. II.** Cum basis cylindri considerari possit  
tan-

tanquam polygonum regulare ex lateribus numero infinitis & infinite parvis compositum, cylindrus haberi poterit tanquam prisma *infinitilaterum* cujus proinde superficies habebitur, si tota basis perimeter seu circuli circumferentia ducatur in altitudinem & producto addatur dupla basis sive circuli superficies.

PROP. II. PYRAMIDIS CUJUS LATERA OMNIA SUNT ÆQUALIA, ET BASIS LATERA SUNT ETIAM ÆQUALIA, SUPERFICIEM INVENIRE. Cum facies omnes pyramidis in hoc casu sint triangula isoscelia æqualia, erit omnium triangulorum summa æqualis dimidio producto ex tota basis perimetro in perpendicularum ex vertice pyramidis demissum ad latus quodlibet basis; nam triangulum quodlibet æquatur dimidio producto ex latere basis ducto in suum perpendicularum. Hæc autem singula perpendiculara sunt æqualia; habebitur ergo in hoc casu pyramidis superficies, dempta basi.

COR. I. Conus est pyramis *infinitilatera* ac proinde coni recti superficies æqualis est dimidio producto ex circumferentia basis in longitudinem sive latus coni, dempta tamen basi.

COR. II. Si pyramis plano basi parallelo truncata ponatur, facies omnes reliquæ pyramidis versus basim abeunt in trapezia æqualia; hæc autem trapezia singula dividi possunt in triangula duo æqualia quorum bases sunt sectionis & basis latera, altitudo autem communis est ipsarum basium distantia perpendicularis. Quare singulorum angulorum mensura est dimidium productum ex singulis basibus in ipsam basium distantiam, ac proinde superficies pyramidis truncatæ æquatur dimidio producto ex summa perimetri basis & sectionis in distantiam perpendicularem basium.

COR. III. Si conus rectus plano basi parallelo truncatus ponatur, coni hujus truncati versus basim superficies æqualis est dimidio producto ex peripheriarum

rum summa in cono truncati longitudinem sive latus. Res autem aliter obtinetur, si inveniatur circulus DE (Fig. 30.), cujus peripheria æqualis sit semisummae peripheriarum EC, GM. Sumatur nempe punctum D medium inter B, G, ducaturque recta DE parallela sectioni BC, hæc erit diameter circuli quæsitæ. Etenim ductis perpendicularibus Bf, Dh, erit ob triangulorum DBf, DGh similitudinem  $Bf : Df = Dh : Gh$ , ac proinde ob  $Bf = Dh$ , erit etiam  $Df = Gh$ ; quare eadem est differentia inter diametros BC, DE, quæ est inter diametros DE, GM; illa nempe differentia est dupla rectæ Df vel Gh, ideoque recta DE est media proportionalis arithmetica inter BC, GM, seu quod idem est, diameter DE æqualis est semisummae diametrorum BC, GM. Sed circuli utpote figuræ similes suas habent peripherias diametris proportionales (Schol. cap. 3.). Ergo circumferentia circuli diametro DE descripti est media proportionalis arithmetica inter circumferentias diametris BC, GM descriptas. Habebitur ergo cono truncati BCGM superficies, si multiplicetur circuli medii DE circumferentia per latus cono BG.

COR. IV. Si concipiatur cylindrus rectus KQLM (Fig. 32.) circumscriptus sphaeræ, habens pro axe diametrum AB, pro basi circulum sphaeræ maximum, superficies segmenti sphaeræ HAF, æqualis erit superficiei cylindri QNRK, & area totius sphaeræ æqualis areæ totius cylindri, demptis basibus. Etenim concipiatur particula quævis Ff circuli *generatoris* ita parva ut infinite accedat ad lineam rectam, productaque Ff usque ad AB in G, recta FtG generabit superficiem cono recti, & Ff superficiem cono truncati cujus mensura erit ipsa Ff ducta in semisummam peripheriarum quarum radii sunt EF, ef; ducta autem PO, ita ut peripheria radio PO descripta æqualis sit semisummae peripheriarum prædictarum,

rum, erit coni truncati superficies ut recta  $Ff$  ducta in circumferentiam cuius radius est  $OP$ . Jam vero ob triacula rectangula similia  $Gef$ ,  $GEF$ ,  $GPO$ ,  $OPC$ , erit  $Ee$  vel  $Nn : Ff = GE : GF = GP : GO = PO : CO$  vel  $EN : BL$ ; ob  $EN = BL = CO$ ; ideoque  $Nn \times EN = fF \times PO$ , ac proinde cum peripheriæ sint ut radii, erit productum ex  $Nn$  in peripheriam radio  $EN$  descriptam æquale producto ex  $fF$ , in peripheriam radio  $PO$  descriptam. Primum autem productum exprimit aream genitam ab  $Nn$ , alterum vero aream genitam ab  $Ff$ . Quare tota area genita a toto arcu  $AfF$ , æquatur toti areæ genitæ a recta  $QN$ ; & abeunte  $REN$  in  $MBL$ , tota sphaeræ superficies totius cylindri superficiei æqualis est, demtis basibus,

**COR. V.** Superficies sphaeræ æqualis est producto ex circumferentia circuli maximi in axem, sive diametrum sphaeræ, ac proinde circuli maximi superficiei quadruplo major est (cor. 1. prop. 2. cap. 2.)

**COR. VI.** Superficies tota cylindri circumscripti, inclusis basibus, est ad totam sphaeræ superficiem ut 3 ad 2. Nam superficies sphaeræ, in hoc casu, basi cylindri quadruplo major est, superficies autem tota cylindri sua basi sexies major est.

**PROP. III. PRISMATIS SOLIDITATEM METIRI.** Polygonum quod prismatis basis est in ipsam prismatis altitudinem ducatur, habebitur soliditas tota prismatis, ut patet ex genesi ipsius solidi quod producitur motu parallelo basis, ac proinde basis sive polygoni superficies per altitudinem multiplicari debet.

**COR. I.** Soliditas cubi habetur multiplicando faciem quadratam basis per ipsum quadrati latus. Parallelopipedi soliditas invenitur, si parallelogrammi superficies per altitudinem multiplicetur; habetur autem soliditas cylindri, si basis, circuli nempe superficies, in altitudinem cylindri ducatur.

**COR. II.** Eadem in solidorum mensura ratiocinatione

tione instituta, quam in metiendis superficiebus adhibuimus, evidens est cubum esse communem solidorum mensuram non secus ac quadratum est mensura superficierum. Itaque pes solidus continet pollices cubicos 1728, nempe tres habet dimensiones, quarum singulæ pedi sive 12 pollicibus æquantur, & ita dicendum de alia qualibet mensura.

PROP. IV. PYRAMIDIS SOLIDITATEM INVENIRE.

Si ad centrum I cubi GL fiat quadrata pyramis (Fig. 33.), cujus basis sit cubi facies quadrata, evidens est totam cubi soliditatem dividi in sex hujusmodi pyramides quadrilateras, æque altas & æqualium basium, ac proinde æquales. Igitur pyramis quælibet erit sexta pars cubi; sed cubi mensura æqualis est producto ex basi in altitudinem, ergo illarum pyramidum quælibet erit æqualis producto ex basi in sextam partem altitudinis HP, vel quod idem est in tertiam partem altitudinis IP. Ergo hujusmodi pyramidis soliditas æqualis est producto ex basi in tertiam partem altitudinis, seu quod idem est, æquatur tertiæ parti cubi ejusdem basis & ejusdem altitudinis.

Generatim pyramis quælibet æqualis est producto ex basi in tertiam partem altitudinis, sive pyramis quælibet est tertia pars prismatis eandem cum ipsa pyramide basim habentis eandemque altitudinem. Etenim sit pyramis quælibet, fingaturque cubus cujus altitudo sit altitudinis pyramidis dupla. Jam si ex centro cubi alia exeat pyramis cujus basis sit facies quadrata cubi, evidens est hanc pyramidem habere eandem cum proposita pyramide altitudinem ac proinde pyramides illæ sunt inter se ut bases (Cor. 8. Prop. 1. cap. præc.) Sed soliditas pyramidis cubi basi innixæ, æqualis est producto ex tertia parte altitudinis in basim, ergo ob altitudinem eandem in utraque pyramide, erit soliditas propositæ pyramidis æqualis producto ex tertia parte altitudinis in basim. Id vero facilius repræsentari potest hoc modo. Sit pyramis

mis quæ sita  $P$ , cujus altitudo  $a$ , basis  $B$ , pyramis autem basi cubi imposita dicatur  $p$ , erit  $P : p = B : b$ ; sed  $p = \frac{1}{3} ab$ , ergo  $P : \frac{1}{3} ab = B : b$ , ideoque  $P = \frac{1}{3} aB$ . Porro hæc pyramis ponitur quadrilatera, facile autem divisa intelligitur in pyramides duas triangulares æqualis basis ejusdem altitudinis, ac proinde pyramis quælibet triangularis æquatur tertiæ parti prismatis triangularis, quod eandem habeat basim eandemque altitudinem. Generatim vero cum pyramis quælibet polygonæ itemque prisma polygonum dividi possint in pyramides triangulares & prismata triangularia ejusdem basis atque ejusdem altitudinis, patet pyramideni quamlibet polygonam esse tertiam partem prismatis polygoni ejusdem basis atque ejusdem altitudinis.

COR. I. Cum cylindrus tanquam prisma infinitilaterum, itidemque conus tanquam pyramis infinitilatera considerari possint, erit conus tertia pars cylindri eandem habentis basim & eandem altitudinem.

COR. II. Cum sphaera haberi possit tanquam composita ex infinitis pyramidulis, quarum vertex communis est in centro sphaeræ, bases autem omnes simul sumptæ totam occupant sphaeræ superficiem, singulæ illæ pyramides æquales sunt producto ex tertia parte radii in suas bases, ac proinde tota pyramidum summa æqualis est producto ex omnibus basibus simul sumptis, hoc est, ex superficie sphaeræ in tertiam partem radii. Ergo tota sphaeræ soliditas habebitur multiplicando tertiam radii partem per circuli maximi superficiem quater sumptam.

COR. III. Cum soliditas cylindri sit productum ex diametro in circulum maximum, soliditas sphaeræ æqualis est duabus tertiis partibus cylindri circumscripti.

PROP. V. SOLIDA DUO SIMILIA, SUNT IN RATIONE TRIPLICATA LATERUM HOMOLOGORUM. Ex solidorum definitione & ex præcedentibus propositionibus evidens est corporis cujuslibet soliditatem esse



se semper ut productum ex aliqua superficie in aliquam axem, vel aliquam altitudinem; superficies autem ex duabus dimensionibus componitur, ergo solidum quodlibet est in ratione composita trium dimensionum homologarum, seu ejusdem nominis; sed solida *similia* ea dicuntur, quæ singulas dimensiones homologas habent proportionales; ergo solida similia sunt in ratione composita ex tribus dimensionibus proportionalibus, ac proinde in ratione triplicata unius cujuslibet dimensionis homologæ.

COR. I. Sphæræ sunt in ratione triplicata diametrorum. Etenim sphaerarum soliditates sunt inter se ut circuli maximi superficies in radium ducta (Cor. 2. prop. præc.). Sed circulorum superficies sunt in ratione duplicata semidiametrorum (Cor. 1. prop. 3. Sect. præc.); ergo sphaæræ sunt in ratione triplicata semidiametrorum vel diametrorum. Idem facile patet ex sphaerarum similitudine, cum enim sphaerarum soliditates per circuli maximi superficiem determinentur, sintque circuli figuræ similes, evidens est sphaeras esse solida similia ac proinde in ratione triplicata diametrorum.

COR. II. Cubi sunt solida similia, itemque similes sunt cylindri sphaeris circumscripti (Cor. 3. Prop. præc.). Ergo cubi sunt in ratione triplicata laterum, & cylindri sunt in ratione triplicata diametrorum.

COR. III. Prismata omnia, si inter se comparentur, ac pyramides omnes inter se, erunt ut producta ex basibus & altitudinibus; quare si basès fuerint æquales, erunt solida ut solæ altitudines; si autem altitudines fuerint æquales, erunt ut solæ basès. Si ea solida fuerint æqualia, altitudines erunt basibus reciproce proportionales; & viceversa, si basès fuerint altitudinibus reciproce proportionales, solida erunt æqualia. Tandem si basès fuerint similes, & altitudines lateribus basium homologis proportionales, solida erunt in ratione triplicata laterum homologorum, vel altitudinum.

SCHOL.

SCHOL. De solidorum rectorum superficiebus in capite præcedenti sermonem habuimus; verum si solida fuerint obliqua, superficierum mensura sublimiorem geometriam aliquando postulat. Quod spectat solida superficiebus planis terminata, res est nullius difficultatis; cum enim solidorum illorum facies sint polygona rectilinea, ad triangulorum superficiem reduci semper poterit illorum mensura. Prismatis cujusvis exemplo rem illustrabimus. Per punctum quodlibet in aliquo prismatis latere, tractum intelligatur planum ad latus illud perpendiculare; idem planum alia omnia prismatis latera utpote parallela perpendiculariter quoque secabit, atque sectio erit polygonum cujus unumquodque latus ad duo parallela prismatis latera erit perpendiculare. Quare superficies uniuscujusque faciei æquabitur producto ex unoquoque sectionis latere in prismatis latus quodlibet, ob laterum omnium æqualitatem, ac proinde prismatis superficies æquatur producto ex omnibus lateribus sectionis, hoc est, ex tota sectionis perimetro in prismatis latus quodlibet. Jam si prisma rectum ponatur, planum lateri perpendiculare coincidet cum basi, ideoque superficies prismatis æqualis est producto ex perimetro basis in altitudinem, ut ante; quod idem valet in superficie cylindri qui potest considerari tanquam prisma infinitilaterum. At si rectus non fuit cylindrus, planum per cylindri axem vel latus quodlibet perpendiculariter tractum, sectione sua cum cylindro obliquo generabit curvam quæ *ellipsis* vocatur a Geometris, de qua in appendice mox addenda, pauca dicemus. Erit autem cylindri obliqui superficies æqualis producto ex ellipsis circumferentia in latus cylindri. Quod spectat conii obliqui superficiem reduci non posse patet, ut sit in cono recto; cum in cono obliquo æquales non sint lineæ omnes ductæ ex vertice conii in basis circumferentiam. Sed hæc pauca monuisse satis sit; neque enim pertinent ad Geometriæ elementa.

# APPENDIX

## De lineis curvis.

I. **L**ineæ curvæ notionem ita simplicem esse jam observavimus ut explicatione ulla vix clarius effici possit; quare prætermittam definitionem, de lineis curvis generatim & deinde de parabola & ellipsi pauca exponemus, alia deinde, ubi necessitas occurret, demonstraturi.

In curva qualibet (Fig. 34.) recta AD lineas parallelas, ut MM, æqualiter dividens *diameter* curvæ appellatur; *axis* autem vocatur, si easdem parallelas ad angulos rectos secet. Punctum A in axe *vertex* curvæ dicitur; rectæ autem parallelæ MM dicuntur *ordinate*. Pars diametri vel axis inter punctum A, & ordinatam comprehensa dicitur *abscissa*. *Æquatio* curvæ appellatur formula algebraica, quæ relationem inter semiordinate & abscissas exprimit. Ita demonstratum est in circulo (Fig. 16.) quadratum rectæ EO, æquale esse producto ex CO in OL. Jam diameter CL dicatur  $a$ , sitque CO  $= x$ , & OL  $= y$ . Erit OL  $= a - x$ , ac proinde  $y^2 = ax - x^2$ , quæ est æquatio ad circulum. Ex his evidens est ordinate & abscissas curvæ esse quantitates indeterminatas; hæ autem determinantur, sumptis pro arbitrio alterutrius quantitatis valoribus. Ita si in æquatione ad circulum ponatur  $a = 10$ , fiatque successive  $x = 0, 1, 2, 3, 4$  &c. invenietur  $y = 0, 3, 4, 3, 0$  &c. quare si ex singulis punctis erigantur perpendiculares hoc modo determinatæ, & per singulas perpendicularium extremitates ducatur curva, hæc ad quæsitam curvam eo accuratius accedet quo plures erunt hujusmodi perpendiculares. Ordinatæ non solum

*Arith.* lum

lum ad axem, sed ad quamlibet diametrum referri possunt, atque etiam initium abscissarum non a solo diametri aut axis vertice computari potest, sed etiam ab aliis punctis. Ita in circulo abscissæ computari possunt vel ab ipso diametri vertice, vel etiam a centro, atque ita prodeunt diversæ ejusdem curvæ æquationes. Verum quocumque modo curva consideretur, probe distingui debent rectæ ad dextram vel ad sinistram jacentes, & ideo dicuntur *positivæ* vel *negativæ*. Has quidem vel illas appellare licet positivas vel negativas; at ubi appellatio determinata est, hæc semper retineri debet; quare semiordinatæ & abscissæ possunt esse vel negativæ vel positivæ; ratio autem facile pater ex iis quæ de quantitativis positivis & negativis in algebra observavimus.

II. Curva quælibet considerari potest vel tanquam curva *polygona*, vel tanquam curva *accurata*. Primus considerandi modus nihil aliud significat nisi curvam tanquam polygonum infinitilaterum considerari; vel tanquam polygoni inscripti & circumscripti *limitem*. Unum autem probe observandum est in curvarum consideratione; si nempe curvam aliquam velut polygonam quis tractaverit, cavere deinde debet ne eandem curvam velut accuratam habeat, & viceversa; atque etiam eadem regula tenenda est in duarum curvarum consideratione, ambæ scilicet vel tanquam polygonæ; vel tanquam accuratæ considerari debent; inde enim in rebus physicis orti sunt errores aliqui. Rem exemplo demonstrabimus. In circulo quocumque PQD (Fig. 35.) ducantur chordæ æquales & infinitesimæ PD, DE, producatque PD in O, donec DO = PD. Præterea agantur per puncta O, E recta OQ, & per punctum D, tangens DN, rectæ OQ occurrens in N, erit OE = 2NE. Etenim triangulum DOE est isoscele & angulus ODN = angulo NDE ac proinde NO = NE, & OE = 2NE. Jam ponatur corpus aliquod describere arcum circuli infi-

infinitesimum PDE, vi aliqua urgente secundum directionem datam; quæ in loco D corpus a linea recta retrahat. Si consideretur circulus tanquam polygonum, chorda infinitesima PD, erit *spatiolum* tempore præcedenti infinitesimo percursum, eritque DO lineola æqualis & in directum posita spatiolum alterum tempore subsequenti æquali descriptum. Quare si ducatur OE, directioni vis in D agentis parallela, erit hæc lineola OE, vis hujus effectus; vi enim illa corpus ex O transit ad arcum circuli. At si consideretur circulus tanquam accuratus, tangens DN erit lineola vi urgente descripta, ideoque NE vis hujus effectus. Itaque in curva polygonæ vis effectus repræsentatur per OE, & in curva accurata per NE. Quare in virium mensura retinenda est eadem curvarum consideratio, alioqui effectus duplo major æstimeretur. Verum quia in virium doctrina ipsarum virium effectus duntaxat comparamus, res perinde se habet, quæcumque adhibeatur curvarum consideratio, eadem enim prodit effectuum proportio. Hæc autem quæ modo explicavimus referuntur ad virium centralium doctrinam in physica generali demonstrandam.

III. Hæc eadem doctrina ad curvam quamlibet transferri potest; quod ut intelligatur, curvarum descriptionem generatim considerabimus. Curva quælibet planæ considerari solet tanquam motu puncti, & perpetua directionis mutatione in plano genita; hic non agimus de curvis quarum puncta singula in eodem non sunt plano, & ideo dicuntur *duplicis curvaturæ*. Itaque evidens est curvam quamlibet ad lineas duas in plano positione datas, ordinatas nempe & abscissas referendam esse; ad determinandam nempe alicujus curvæ naturam, oportet puncti mobilis vestigia secundum certam eandemque legem ad rectas positione datas referri, ita ut punctum illud secundum eandem omnino legem in quolibet infinitesimo

simo mutatae directionis angulo moveatur; alioqui non eandem sed plures curvas describeret (contra hyp.). Ex hac curvarum consideratione aliqua sane utilissima colliguntur. 1.<sup>o</sup> Recta curvam quamlibet in unico puncto tangit. Ponamus enim rectam in duobus tribusve punctis contiguas curvam tangere, jam punctum mobile directionem perpetuo non mutaret, quod repugnat. . . . . 2.<sup>o</sup> Si descriptus intelligatur circulus qui communem cum data curva tangentem in aliquo puncto habeat, ita ut cujuscumque circuli minoris eandem habentis tangentem, arcus aliquis utrinque circa punctum contactus sit intra curvam, cujuscumque vero circuli majoris arcus sit extra curvam, hunc circulum dicimus curvæ osculatorem in dato puncto, & ipsius curvaturam dicimus *circulari curvaturæ analogam*. Evidens autem est ex geometriæ elementis circuli osculatoris centrum positum esse in concursu duarum perpendicularium ad eandem curvam, ubi puncta duo curvæ ad se invicem in infinitum accedunt; hæc enim est circuli proprietas ut rectæ a centro ad peripheriam ductæ sint ipsi peripheriæ perpendiculares; talis autem recta e centro circuli osculatoris ad curvam ducta vocatur *radius osculator*. . . . 3.<sup>o</sup> Quamvis inter tangentem & arcum circuli transire possint alii circuli innumeri, attamen inter arcum curvæ & arcum circuli osculatoris nullus alius circulus transire potest; nam (ex def.) quicumque minor circulus, est intra curvam, quicumque major est extra ipsam. Tota circulorum osculatorum utilitas eo reducitur ut omnium curvarum arcus infinitesimus considerari possit tanquam circularis. Etenim arcus infinitesimus circuli osculatoris & arcus infinitesimus curvæ easdem habent proprietates, cum radius sit ad circulum osculatorem & ad arcum infinitesimum curvæ perpendicularis. . . . 4.<sup>o</sup> Hinc definiri potest curvarum in quolibet puncto curvatura; satis enim erit diversas circulo-  
lorum

lorum osculatorum curvaturas inter se comparare: quod quidem facile fieri potest. Etenim evidens est diversorum circulorum curvaturas esse in ratione reciproca radiorum; quod ut intelligatur, fingamus duas rectas æquales in circulum flecti, unam quidem in totam circumferentiam, alteram vero in semicircumferentiam tantum: manifestum est semicircumferentiam duplo minus curvam esse quam circumferentiam integram; & duplo major est radius circuli ad quem semicircumferentia illa pertinet. Idem simili ratiocinatione patet, si recta eadem in arcum duplo vel triplo majorem incurvetur, & ita deinceps. Comparari ergo inter se possunt diversæ curvarum curvaturæ atque etiam variæ ejusdem curvæ in diversis punctis curvaturæ; inveniatur nempe in diversis punctis radius circuli osculatoris, hoc est, circuli qui curvam in dato puncto tangens, cum ipsa curva ita congruat ut inter curvam & circulum nullus alius circulus transire possit. Et quidem cum aucto vel diminuto circuli radio, minuatur vel augeatur per gradus illius curvatura, si nullus sit circulus, qui propius quam circulus osculator ad curvam accedat, concludendum est circulum cum ipsa curva in hoc puncto eandem habere curvaturam. Ex his patet finitam esse curvæ alicujus curvaturam, si finitus sit radius osculator; at si radius osculator sit infinitus, curvatura est nulla; tandem si radius osculator  $= 0$ , curvatura est infinita. Cæterum hæc omnia facilius intelligentur, si revocentur in memoriam quæ de methodo *exhaustionum* & de *primis* ac *ultimis rationibus* jam explicata sunt. Hæc pauca quorum usus in physicis institutionibus recurret ex sublimiori doctrina delibasse satis sit. Superest ut parabolæ & ellipseos naturam breviter exponamus.

IV. Si in axe AD (Fig. 34.) sumantur abscissæ quotlibet & ad singula puncta erigantur semiordina-

tæ . ea lege ut abscissæ semper sint ut quadrata ordinatarum , curva per singulas ordinatarum extremitates transiens dicitur *parabola* . Jam abscissa dicatur  $x$  , & ordinata  $y$  , erit semper  $x$  , ut  $y^2$  , ac proinde ratio ordinatarum ad abscissas constans & eadem manet ; quare si  $p$  sit quantitas constans , erit  $\frac{y^2}{x} = p$  , ac pro-

inde  $y^2 = px$  , quæ est æquatio ad parabolam ; nempe in omni parabola quadratum ordinatæ æquale est producto ex abscissa in quantitatem constantem ; hæc autem quantitas constans *parameter* dicitur . Si in axe parabolæ abscindatur recta  $AF$  quæ sit quartæ parametri parti æqualis , punctum  $F$  , parabolæ *focus* appellatur .

COR. I. Quoniam crescente abscissa , crescit etiam quadratum ordinatæ , evidens est parabolam non esse curvam in se redeuntem , sed puncta illius singula ab axe perpetuo recedere in infinitum .

COR. II. Data abscissa qualibet ejusque ordinata , inveniri semper poterit parameter , cum sit tertia proportionalis ad ordinatam & abscissam .

COR. III. Si abscissa ponatur  $= 0$  , fit quoque ordinata perpendicularis  $MM = 0$  , ac proinde puncta  $M, M$  , coeunt in  $A$  , nempe in axis vertice . Quare si per verticem parabolæ ducatur recta ordinatis parallela , hæc erit tangens parabolæ in puncto  $A$  .

COR. IV. Ducta intelligatur secans per punctum  $N$  , quæ parabolæ occurrat in alio puncto  $t$  , ex quo demittatur perpendicularis  $tp$  , ad quam ex puncto  $N$  erigatur perpendicularis  $Nq$  , axi parallela , sit  $PT = s$  ,  $PN = y$  ,  $Nq$  vel  $Pp = f$  erit  $tq = \frac{fy}{s}$  , ob triangulorum  $TNP$  ,  $Nqt$  similitudinem , ac proinde  $pt = y + \frac{fy}{s}$  &  $Ap = x + f$  . Jam sumatur æquatio ad curvam in puncto  $t$  , erit  $pt^2 = Ap \times p = y^2$



$y^2 + \frac{2fy^2}{s} + \frac{f^2y^2}{s^2} = px + pf$ , deletisque in hac æquatione terminis æqualibus  $y^2 = px$ , fiet  $\frac{2fy^2}{s} + \frac{f^2y^2}{s^2} = pf$ , & dividendo per  $f$ , erit  $\frac{2y^2}{s} + \frac{fy^2}{s^2} = p$ . Jam puncta N, t ad se invicem accedant in infinitum mutuoque coeant, secans abit in tangentem, fitque Nq vel Pp = 0; quare  $f = 0$  &  $\frac{fy^2}{s^2} = 0$ , ac proinde æquatio præcedens abit in hanc  $\frac{2y^2}{s} = p$ , &  $2y^2 = ps$ , seu ob  $px = y^2$ , fiet  $2px = ps$ ,  $2x = s = PT$ . Igitur in parabola recta PT, quæ *subtangens* dicitur dupla est abscissæ AP.

COR. V. Recta FN ducta ex foco parabolæ ad extremitatem ordinatæ cujuslibet, æqualis est abscissæ AP & quartæ parti parametri. Nam cum sit  $PF = AP - AF = x - \frac{1}{4}p$ , vel  $= \frac{1}{4}p - x$ , pro ut ordinata jacet supra vel infra punctum F, erit  $PF^2 = AP^2 - AF^2 = x^2 - \frac{x}{2}p + \frac{1}{16}p^2$ . Præterea  $PN^2 = px$ , ergo  $FN^2 = PF^2 + PN^2 = x^2 - \frac{x}{2}p + \frac{1}{16}p^2 + px = x^2 + \frac{x}{2}p + \frac{1}{16}p^2$  &  $FN = x + \frac{1}{4}p = AP + AF$ .

COR. VI. Si per punctum contactus ducatur recta QS axi parallela, angulus GNS æqualis est angulo FNT; nam angulus GNS æquatur angulo FTN; præterea triangulum FTN est isoscele, ob  $FN = AP + AF = AT + AF = FT$ , ac proinde angulus GNS æqualis est angulo FNT. Hæc est tangentis proprietas, quæ in physicis institutionibus erit utilitatis maximæ.

V. Recta quælibet M X (Fig. 36.) ducta ex puncto quolibet parabolæ, & axi AQ parallela diameter parabolæ appellatur. Jam vero agatur ordinata MP ad axem, & ex punctis m, O ducantur parallele mp, OQ. Tandem ex puncto m agatur mS

axi parallela. Dicatur AP,  $x$ ; PM,  $y$ ; Qp,  $f$ ; AQ,  $k$ ; erit  $Ap = k - f$ , & ob triangulorum TPM, mso similitudinem, erit  $TP : PM = mS : SO$ , hoc est,

$$2x : y = f : SO = \frac{fy}{2x}; \text{ ideoque } pm = QS = QO - SO \\ = IM - SO = y - \frac{fy}{2x}.$$

Præterea, ex natura parabolæ  $pm^2 : FM^2 = Ap : AP$ , ideoque  $(y - \frac{fy}{2x})^2 : yy = k - f : x$ , vel  $yy - \frac{fyy}{x} + \frac{ffy}{4xx} : yy = k - f :$

$x$ , ductisque mediis & extremis, erit  $xyy - fyy + \frac{ffy}{4x} = kyy - fyy$ , & dividendo per  $yy$ , factaque reductione erit  $x + \frac{ff}{4x} = k$ , vel  $\frac{ff}{4x} = k - x$ .

Jam vero abscissa ad diametrum MO, dicatur  $x$ , & ordinata mO, dicatur  $y'$ , erit  $MO = PQ = AQ - AP = k = x$ , ideoque  $x' = k - x$ , ac proinde  $\frac{ff}{4x} = x'$ , vel  $ff = 4xx'$ . Sed ob triangulum mSO rectangulum, erit  $mS^2 + SO^2 = mO^2$ , hoc est,  $ff + \frac{ffvy}{4xx} = y'y'$ , & loco  $ff$  substituendo illius valo-

rem  $4xx'$ , itemque loco  $yy$  illius valorem  $px$ , habebitur reductione facta  $4xx' + px' = y'y'$  vel  $(4x + p)x' = y'y'$ . Est autem  $4x + p$  quantitas ad arbitrium sumpta, seu constans, quæ si ducatur  $p'$ , erit  $p'x' = y'y'$ . Aequatio altera ad parabolam respectu diametri cujuscunque; quare quadratum ordinatæ ad diametrum, æquale est producto ex abscissa in quantitatem constantem quæ diametri *parameter* dicitur; & generatim quadrata ordinatarum ad diametrum sunt inter se ut ejusdem diametri abscissæ respective.

VI. Si in axe HI (Fig. 37.) sumantur abscissæ quotlibet, & ad singula puncta erigantur ordinatæ FN, PM ea lege, ut sit semper  $FM^2$  ad  $FN^2$  in ratione  $HF \times FI$

FI ad HP  $\times$  PI, curva per singularum ordinarum extremitates transiens vocatur *Ellipsis* quæ in circumlum abit, si quadrata ordinarum sint æqualia producto ex segmentis abscissarum. Jam dicatur axis major HI = a, ducaturque ex puncto axis medio C recta BCD, quæ dicitur axis minor, sitque BC = b, HP = x, PM = y, PI = a - x, erit  $a - x \times x : y^2 = a^2 : b^2$  &  $y^2 = \frac{ab^2x - b^2x^2}{a^2}$ , quæ est æquatio

ad ellipsim, in qua si ponatur a = b, fit  $y^2 = ax - xx$ , æquatio ad circumlum. Si abscissæ computentur a centro C, fit CP = x, PM = y, fiatque HI = 2a, erit in hoc casu,  $2a - xx : y^2 = aa : bb$ , &  $y^2 = \frac{aabb - bbxx}{a}$ .

Si ex minoris axis extremitate B, tanquam centro, & intervallo BF = CH, tanquam radio describatur arcus circuli, axi majori occurrens in punctis F, f, puncta illa vocantur ellipseos *foci*; evidens autem est hæc puncta a centro ellipseos æqualiter distare; nam ob BC axi perpendicularem, triangula CBF, CBF sunt æqualia.

COR. I. Cum duo ellipseos axes sint constantes, constans etiam est recta iisdem duobus axibus tertia proportionalis; hæc autem linea *parameter* dicitur. Quia autem duo sunt ellipseos axes, duæ etiam sunt parametri; si nempe axis major sit primus proportionis terminus, tertia proportionalis parameter axis majoris dicitur, & contra. Jam si abscissæ ab axis extremitate computentur, fit axis major a, minor b, parameter p; erit  $ap = b^2$ . Si autem abscissæ computentur a centro, fit 2a axis major & 2b axis minor, erit  $2ap = 4b^2$ ; his autem valoribus in utraque æquatione ad ellipsim substitutis, æquatio ellipseos

in primo casu fit  $y^2 = px - \frac{px^2}{a}$ ; in casu altero habetur  $y^2 = \frac{1}{2} 2p - \frac{px^2}{2a}$ .

COR. II.

COR. II. Ex ellipseos æquatione evidens est eam curvam in se redeuntem & undique terminatam esse; crescentibus enim abscissis a centro computatis decrescunt ordinatæ, ac tandem omnino evanescent, si abscissa semiaxi æqualis sumatur. Manifestum etiam est mutua axium in centro C intersectione, ellipsim in quatuor partes similes & æquales dividi, cum eadem sit ad quamlibet partem curvæ æquatio omnesque proprietates perinde se habeant. Quia vero ordinata perpendiculari Nn perpetuo decrescente, puncta N, n coeunt in H, patet tangentem in H esse axi perpendicularem.

COR. III. Distantia focorum a centro facile invenitur; nam cum sit  $BF = HC$ , erit  $FC^2 = HC^2 - BC^2 = HC^2 - BC \times HC + BC$ . Quare distantia foci a centro est media proportionalis inter semiaxium summam illorumque differentiam. Præterea ob triangulum CBF rectangulum, erit  $BC^2 = HC^2 - FC^2$ , ac proinde  $HC - FC : BC = BC : HC + FC$ , seu  $HF : BC = BC : FI$ , nempe semiaxis minor est medius proportionalis inter foci unius distantias ab utroque axis majoris vertice.

COR. IV. Ex ellipseos constructione summa rectarum BF, Bf æqualis est axi majori; at ponamus eandem manere summam in quolibet puncto, sitque  $RF + Rf = HI$ . Dicatur  $HC = a$ ,  $BC = b$ , ordinata  $RS = y$ ,  $CS = x$ ,  $fC = c$ ; erit  $IS = a - x$ ,  $HS = a + x$ ,  $fS = c - x$ ,  $FS = a + x$ ,  $HF$  vel  $If = a - c$ ,  $Hf$  vel  $IF = a + c$ . Jam vero cum sit (per hypoth.)  $FR + fR = 2a$ , si differentia inter FR & fR dicatur  $2z$ , erit  $fR = a - z$ , &  $FR = a + z$ . Jam ob triangula FRS, fRS, rectangula, erit  $fS^2 + SR^2 = fR^2$ , hoc est  $cc - 2cx + x^2 + y^2 = a^2 - 2az + z^2$ . Præterea  $FS^2 + SR^2 = FR^2$ , hoc est  $c^2 + 2cx + xx + y^2 = a^2 + 2az + zz$ ; habentur ergo æquationes duæ quarum prima a secunda subtrahatur,

hatur, fiet  $4cx = 4az$  &  $z = \frac{cx}{a}$ ; quo valore substituto in prima æquatione loco  $z$ , ideoque &  $\frac{c^2x^2}{a^2}$ , loco

co  $z^2$ , erit  $c^2 - 2cx + xx + yy = aa - \frac{2acx}{a} + \frac{c^2x^2}{a^2}$ ,

factaque, ut moris est, reductione habebitur  $a^2c^2 + a^2x^2 + a^2y^2 = a^4 + c^2x^2$ , &  $a^2y^2 = a^4 - a^2c^2 - a^2x^2 + c^2x^2$ , factaque divisione per  $a^2 - c^2$ , habetur  $\frac{a^2y^2}{a^2 - c^2} = a^2 - x^2$ ; loco  $b^2$  substituatur  $a^2 - c^2$ ,

fiet  $\frac{a^2y^2}{b^2} = a^2 - x^2$ , & tandem  $= \frac{a^2b - b^2a^2}{a^2}$ ; quæ

est æquatio ad ellipsim ante inventa. Hæc ergo est ellipseos proprietas ut ductis ex utroque foco rectis ad punctum perimetri quodlibet concurrentibus, rectarum illarum summa sit axi majori semper æqualis. Hanc eandem proprietatem ex æquatione ellipseos derivari facile est; verum ex proprietate ipsa æquationem elicere placuit ut exemplum esset tyronibus, qua ratione ad æquationem curvæ ex data aliqua proprietate pervenire liceat. Hinc evidens est datis duobus ellipseos axibus, ellipsim facili manu describi posse; sumptis nempe in axe majori duobus punctis tanquam focus, his affixum retineatur filum, atque per fili longitudinem ita promoveatur acus aliqua ut filum perpetuo tensum maneat, acus motu suo ellipsis peripheriam percurrat, ut patet ex perpetua partium fili & axis æqualitate.

COR. V. Si ex puncto  $R$  in ellipseos perimetro ad utrumque focum  $f$ ,  $F$  ducantur rectæ  $fR$ ,  $fR$  & in linea producta  $FR$ , sumatur  $RT = Rf$ , ducaturque  $Tf$ , ad quam per punctum medium  $E$  & per punctum  $R$  agatur  $ER$ , hæc erit tangens in  $R$ . Etenim ponamus rectam  $ER$ , ellipsi occurrere in alio puncto  $r$ . Ex hoc puncto, in recta  $RE$ , agantur lineæ

neæ  $rT$ ,  $rf$ ,  $rF$ . Quoniam (per constr.)  $TR = Rf$  &  $fE = ET$ , erit  $RE$  perpendicularis ad  $fT$ , ac proinde singula puncta rectæ  $ERr$  æqualiter distant a punctis  $f$ ,  $T$ , ideoque  $rf = rT$ . Sed  $Fr + rT$  major est quam  $FT$ , ergo etiam  $Fr + rf$  major est quam  $FT$ , ideoque etiam major quam  $HI$ ; cum (per constr.) sit  $FT = HI$ ; quare punctum  $r$  non pertinet ad ellipsim; ergo recta  $RE$  tangit ellipsim in unico puncto  $R$ . Hæc est utilissima in physicis institutionibus tangentis proprietas, quam quidem ex ellipseos æquatione, non secus ac in parabola fecimus, eruere licebat; sed diversas veritatis inveniendæ vias tyronibus demonstrare maxime convenit.

SCHOL. *Sectiones conicæ* appellantur parabola & ellipsis, quibus etiam annumerari debet *hyperbola*, de qua nullum verbum fecimus, utpote nullius fere usus in nostris physicis institutionibus futura. Denominationis ratio facile patebit si tres illas curvas in conii sectione consideremus.

Sit  $ABC$  conus (Fig. 37. 38.) circulari basi insistent, & secetur plano quolibet  $iEM$ . Ponatur sectio alia  $KiL$  parallela basi & occurrens priori sectioni in  $Hi$ , intelligaturque sectio tertia priores duas in  $EH$ ,  $KL$  perpendiculariter bifecans atque etiam conum in triangulo  $ABC$ . Jam producto  $EH$  donec ipsi  $AK$  occurrat in  $D$ , ductisque  $EF$  ac  $DG$  rectæ  $KL$  parallelis & occurrentibus sectioni triangulari in  $F$ ,  $G$ . Dicatur  $EF = a$ ,  $DG = b$ ,  $ED = c$ ,  $EH = x$ , &  $Hi = y$ ; ob triangulorum  $EHL$ ,  $EDG$  similitudinem, erit  $ED(c) : DG(b) = EH(x) : HL = \frac{bx}{c}$ . Simili modo ob triangulorum  $DEF$ ,  $DHK$  similitudinem erit  $DE(c) : EF(a) = DH(c-x)$  (Fig. 37) vel  $(c+x)$  (Fig. 38.):  $HK = \frac{ac \mp ax}{c}$ . Tandem cum sectio  $KiL$  parallela basi sit circulus, ut patet

tet ex generis ipsius conī, erit  $HK \times HL = \overline{Hi}^2$ , hoc est,  $\frac{abx}{c} + \frac{abxx}{cc} = y^2$ . At si ponatur sectionem ita se habere, ut ED non occurrat lateri AK, sed sit ipsi parallela, tunc erit  $HK=EF=a$ , ideoque  $HK \times HL = \overline{Hi}^2$ , hoc est,  $\frac{abx}{c} = y^2$ . Probe notanda est cur-

varum illarum genesis: Sectio conica est ellipsis, si planum secans sectioni triangulari perpendiculares duobus conī lateribus occurrat. At sectio conica dicitur *hyperbola*, si planum secans neque sit conī lateribus parallelum, neque duo secet conī latera, sed in hoc casu sectio ita se habet ut planum secans productum, cono ad verticem opposito occurrat in D (Fig. 38.), alteraque sectione generet curvam, quæ *hyperbola opposita* vocatur. Igitur in æquatione ad hyperbolam, punctum D sumitur in hyperbola opposita, & productum ex segmentis abscissarum est  $DH \times EH$ .

Quoad tertiam æquationem  $\frac{abx}{c} = y^2$ , patet eam esse ad parabolam cujus parameter  $\frac{ab}{c}$ . In hac autem curva planum secans est alterutri lateri conī parallelum. Itaque cum ex conī sectione natæ sint tres illæ curvæ, patet cur illis factum sit *sectionum conicarum* nomen.

F I N I S.

[illegible]

$\frac{d}{dt} \left( \frac{\partial L}{\partial \dot{x}} \right) = \frac{\partial L}{\partial x}$

Figure 1. The effect of the concentration of the  $\text{H}_2\text{O}_2$  solution on the amount of the released  $\text{H}_2\text{O}$  from the  $\text{H}_2\text{O}_2$ -loaded hydrogel. The amount of the released  $\text{H}_2\text{O}$  was measured by the weight difference of the hydrogel before and after the release. The concentration of the  $\text{H}_2\text{O}_2$  solution was 0.1, 0.2, 0.3, 0.4, 0.5, 0.6, 0.7, 0.8, 0.9, and 1.0 wt. %.

[illegible][illegible]

$\frac{\partial}{\partial t} \left( \frac{\partial \phi}{\partial t} \right) = \frac{\partial^2 \phi}{\partial t^2}$

$\frac{1}{\sqrt{\pi}} \int_{-\infty}^{\infty} f(x) \delta(x-a) dx = f(a)$

10. *Chlorophyll *a** and *Chlorophyll *b** were determined by the method of Arar and Collins (1971).

Figure 1. The effect of the concentration of the *Agrobacterium* suspension on the transformation efficiency of *Agrobacterium* strains. The concentration of the *Agrobacterium* suspension was 10<sup>6</sup> cells/ml (○), 10<sup>7</sup> cells/ml (□), 10<sup>8</sup> cells/ml (△), 10<sup>9</sup> cells/ml (◇), and 10<sup>10</sup> cells/ml (●). The error bars represent the standard deviation of three independent experiments.

$$= \frac{1}{\sqrt{\pi}} \int_{-\infty}^{\infty} e^{-t^2} dt = 1$$

1. *Journal of the American Medical Association*, 1997; 277: 1033-1038.

[illegible]

...and the  $\beta$  values are

<sup>a</sup> Values are means ± SD.

Figure 1. The effect of the concentration of the *Agrobacterium* strain on the transformation efficiency of *Agrobacterium* strain 1024. The concentration of the *Agrobacterium* strain 1024 was 10<sup>6</sup> cells/ml (A), 10<sup>7</sup> cells/ml (B), 10<sup>8</sup> cells/ml (C), and 10<sup>9</sup> cells/ml (D). The concentration of the *Agrobacterium* strain 1024 was 10<sup>6</sup> cells/ml (A), 10<sup>7</sup> cells/ml (B), 10<sup>8</sup> cells/ml (C), and 10<sup>9</sup> cells/ml (D). The concentration of the *Agrobacterium* strain 1024 was 10<sup>6</sup> cells/ml (A), 10<sup>7</sup> cells/ml (B), 10<sup>8</sup> cells/ml (C), and 10<sup>9</sup> cells/ml (D).







Tab. I Geom.



12'







